

Am of

I TEOLOGIA DO PCS
TEOLOGIA DO KITAB
MISI OM EVANGELISASI
TUDUKAN DO PASTORAL CARE

T.A. Forscher

**1997
PCS Kudat**

**Ongotudukan sid PLA om Kursus Tumpuk
ontok di toun 1990 - 1996**

Pirin di: *Syarikat Perusahaan Percetakan TEP, Kudat*

I TEOLOGIA DO PCS

Ong usuron-ku i kuran o kinosinaan di Teologia ko Doktrin di PCS, suvai garanggazon-ku laid i kinojodian do Basel Mission sid Europe om i vaza patod di teologia dino siti ponong.

I hiza di kovian dit abad ko-18, mad norungoi banal it ongohoturan dit ongopomogunan sid Europe om sid Amerika. Nokosurut-no i hiza di retanko hiza do koposikan do pomogunan (engl. Enlightenment) sampai nokosimban i kiroon om itungon dot ulun kananganko i kobuatan om kinembulazan do sompomogunan. Guluko di hiza diri retanko i pomogunan iadko pinggan om it adau mintutuk do pomogunan. Iri-ogi nohorotizan-no dot i pomogunan iadko bola di tumurug. Iti no sabap do varo hiza dot otitiu di mato dot adau om hiza dot otolikudan, ino-no sodop, sampai i vulan, nga koruhang do pomogunan di mintutuk sid pomogunan sid saralom dot songvulan. Sid saralom di kinohorotizan dino nokembulai-no i kiroon dot ong iadino, amu otopot i boros do Kitab sampai kaluto dati ong minsanko i boros do varo Kinoringan, i minongurug do pomogunan nga baiko vudut di gorija om i Pope, bai vudut om vaza momorinta di razat. Na sid Fransis nokembulai-no i kodim dot, Kolobusan, koperadan om kopiobpinezan, retan dot aso tuan om raja ko uripon, inoi nga enizo o hak dit sokoviai it ongoulun. Atag do nunu songhoturan, amu-no momingig, raja om ugama, gima obebas kavi it ongoulun, ka. Sid Paris, it ibu kota do Fransis nokengkakat-no it enjin pomudung di liou dot ulun, ombo it amu sumuhut di hoturan vagu, raja, montiri, pandita, mutip. Nodurhaka banal i pomogunan do Fransis diri.

Na amu songkuro diri kengkakat-no it iso o kopitan do sojal, i ngaran dau i Napoleon. Iosido minoniim posuvang dot ensanan it ongopomogunan sid hoturan vagu dino sampai minongorumpak sid saralom do duvo nopod toun do minonoruvang di Masir om sid Germani sampai sid Russia. Notori-po iosido sampai notorungku dara, minogidu-no iosido sid torungku om minongoguli-no vagu dara di gama momorinta dot Europe. Topot notori-no vagu iosido di Britis om German ontok di toun 1815 sampai nokotorungku-no iosido sid iso o puru sid tanga do rahat.

Ino hiza diri nohorotizan-no dit ongoulun Kristian sid Eropa Tanga dot kakali agazo o pomogunan dit a-po nokorongou di Habal do Kovosihan, tu mad agazo-po o pomogunan sid sampaping do pomogunan. Ong sid England noko-timpun-no laid monuhu i gorija dit a-ko piro o missionari mamantau sid ongokoloni do British sid Afrika om Asia do pendongou di Habal do Kovo-

sihan sid Ongokolonial om i pasok razat. Na i habal di kinapangazazadan dioti di Habal do Kovosihan nokorikot sid Eropa Tanga sampai varo-no pongitungan dot ulun dot atag ong mamung sid gama posurut di Habal do Kovosihan dino sid pentongkop do pomogunan, isuhut di suhu di Yesus diri sid Matius 28,19-20 om sid Matius 24,14, do suvai kotongkop sid pomogunan (ekumene) i Habal do Kovosihan om rumikot-ogi vagu i Tuhan Yesus, ka. Na sid bandar Basel, sid pivolitan do tolu o pomogunan, ino-no Swiss, Germani om Fransis, i bandar dit obebas o hoturan, miuumpug-no it a-ko piro it ulun Kristian sampai miniupakat mangahatul do sikul do missionari di kadapat pamung sid gama dit ongosharekat Mission sid England. Ino-no i kinojodian do Basel Mission (1815 ino-no i hiza di notori-no i Napoleon). Na it ongoulun dino antad sid Swiss om Germani om Fransis sampai Austria om Russia, minsanko tasantanid-tanid o denominasi dioti, ino-no o pinopezo dioti, i tugas om suhu di Yesus do pendongou di kenginan do Kinoringan sid pentongkop do pomogunan. Iti-no o sabap i Basel Mission najadi do sarikat mission dot ekumenical om international. Pinolingan ong i toriso-iso o vaza humarati om posondot di kosipan sid Kinoringan, inoi nga i Kitab banal o puun om origi di kosipan. Sabap sid saralom dit ongogorija di tasantanid ot denominasi di manantu om monodiri dot ombo banal i kosipan dau, mad nolingan dioti i tugas dit inanu sid Tuhan Yesus. Bai minanaud-po di dau do watas, isuhut di hoturan do raja om daerah o gama dit ongogorija diri. Iti-no o sabap dot opungaranan it ongogorija diri Gereja Anglikan, Swiss, German, ko Wuerttemberg. Manjadi antad diri, it ulun do Swiss antad sid tradisi di Zwingli om Calvin om it ulun do German sid tradisi di Luther. Na it ulun antad sid duvo ko tolu o tradisi diri, enizo-no ioti sinumikul sid Basel sampai jinumadi do missionari, gulu rumikot sid-po Afrika Timor sid tinaud do CMS (Church Missionary Society) om LMS (London Missionary Society), om iri-ogi sid Ghana dot i Basel Mission kondiri o pinapanau om minamalanja dit ongomissionari sid Ghana it ontok di toun 1828. Iri-ogi sid Kaling (1834) om Kina (1847), om Cameroon (1885). Manjadi ino hoturan do Basel kananganko i teologia om doktrin minokihatul di Kitab sampai engat it Ekumene om monongloub dit ongobansa (international) pitutungkus-tungkus-no sampai i hiza di kinotimpunaan di BM sid Sabah. I Honegger, Hausermann om Sigrist, nga ulun do Swiss om Gereja Reformed antawa Presbyterian (gereja di kumavid di hoturan do varo't ongosukod sid ipat-ipat i piumpugan dot ipat piumpugan, nokengkakat kondiri). Topot ong i Forschner om i Dilger, antad sid Germani Selatan sampai Gereja do Lutheran o ngaran dot okonko Lutheran dot ortodox.

Na i kinotimpunaan diri (antad di Disember 1952), ioti kavi minangahabal di

Habal do Kovosihan, isuhut di boros do Kitab sampai aso vaza monodiri dit ongotudukan do denominasi. Banal-no ong varo laid pitonidan sid kobuatan dioti. Ong i Honegger, hiza dot amu-po kotimpuun sumambayang, minonigup iosido sid rinuvang do gereja. Iri-ogi minonuhu iosido dit ongokusai dot eduon it ongosigal ong sumambayang. Opongo-no, monigup om mogom-ogi vagu sid meja sid rinuvang do gorija. Sabap ong sid Gorija Reformed do Swiss, i meja sid panambayangan bai meja, okonko okiro do padaha. Pengkaa dino i valai do panambayangan okonko valai dot osusi, inoi bai tempat pomumpugan dot ulun, okonko valai do pisomungan do Kinoringan ko valai do Kinoringan. Iti-no o sabap do minsanko mogom sid meja ko monigup, nga aso nunu-nunu. Na kakali minangahatul i Honegger do varo tanda di sangkap di Tuhan Yesus sid rinuvang om sid tiningusan do gorija. (Ong sid tradisi do Swiss tantu aso tanda do sangkap sid gorija i hiza diri). Kagi ong sid a-ko piro o miting dit ongosukod do piumpugan, baiko i tradisi sid Gereja Swiss om Daya o tinutul om pinosondot dau, retanko atag dot sid piumpugan sid Sabah, iadino ot atag. Suvaiko ontok di toun 1956 om varo-ogi't upakat om kinolumbatasan dit umpug dit ongomissionari dot osuhu! ong ahatul o gama sumambayang om pengkakat do piumpugan sampai mogihim sid Kitab dit atag o vaza mangahatul di piumpugan om panambayangan om gorija. Okonko it ongotradisi do gorija sid ongopomogunan ot pongonuvan bahagi di hoturan om tudukan sid Momogun, inoi nga i Kitab banal o puun om inantadon di hoturan ponong sid Momogun di nokokristian-no, ka diri. Manjadi ipat ong kiumpug it ongosukod, kogili-no laid i boros do Kitab om i panarangan di boros dino om iri-ogi kondiri dit Ongokristian Momogun minonguog om minangaratu dit atag o vaza humarati om posondot di kosipan dot ulun Kristian. Iadko i kinsurutan di Habal do Kovosihan sid Kitab, ino-no gulu-po i tuturan di Tuhan Yesus om iri-ogi i gama pazazad di habal dino, iadko i gama di Paulus sid Korintus om Tesalonika, pengkaa dino it ongoliang sid ongopiumpugan do Momogun ponong sid PCS. Iadko i Paulus minangahatul di piumpugan sid Korintus i mangambat iosido sid ongokosusaan dioti, pengkaa dino inonsi-no i boros di Paulus bahagi di kengkakatan do PCS. Bai iso ot origi (1. Kor. 3,11). I tokou, guvas di Kristus, iosido ot ulu di guvas dino (1. Kor. 12) om sid surat di Petrus, i piumpugan diri o bansa do Kinoringan om mad imam dot kosipan, ko i vaza mangahatul, nga i boros di Paulus sid di Timotius o hinumatul. Antad sid gama di iadino, varo-no di hiza 1959 *I hoturan di piumpugan dot ulun Kristian*. I pandita Haeusermann om ioku nokopongonsi di sokovia i ongotudukan do Mission sid saralom do 150 toun. Kagi varo nimuhun laid di guru dahai sid Basel, i Professor Dr. Duerr, i kipangalaman sid Daya i iadino.

Ino dino i pinagaman dahai diri, supaya monodia do ralan dot arantang om otulid bahagi dit ongopumpugan. I Bapa Majimil om i Diyun, i minatai di 30 toun katalib, nga koruhang dahai monodia om pogili sid ongosukod sid miting dioti, supaya olumbatasan dioti.

Na ino hiza diri, varo kounangan antad sid SDA, retanko ong kodung Kristian, suvai sumuhut di hoturan do Yahudi, ino-no adau do Sabat, ka. Amu kavasa mangakan do vogok ko it ongodupot dit asakau, om magavuk, ko kopi om varo-po tii. Ongondu a-kavasa dot anaru ot obuk ko manantapi om mononglungkaki ko kiganggalung ko mononsigal it ongokusai om ogumu-po o vokon o hoturan di moniag di tradisi do Momogun, retanko ino kavi dino antad sid vozoon do rogon, ka. Na sid gama pavalad om mamasa di Kitab kaharati-okoi dot aso hoturan do iadino sid Kitab. Gam ong Kristian mongoguna dit adau do keso (AHAD) ino-no it adau di kinogulianan di Yesus iadko adau di kinourugan vagu do vinangun (tu it adau do Sabat, adau di mongohondom di kinapangaan di kinourugan). Ong varo boros di Paulus, ong sukul kadapat monorima kaseh sid Kinoringan bahagi di kakanan, nunu-nopo songkakanan, nga osusi. Aso boros sid Kitab kananganko i tapi ko obuk. Banal-no, ong it ulun Yahudi suvai kitopi om sumambayang-ogi. Topot i sigal do Momogun, tanda do mongoguna dit ulun vokon. Kodung minsamung dot ulun, suvai mononsigal. Lobipo ong minsamung do Kinoringan sid gorija, ka. (Ong sirung ponong sid Eropa, bai pakazan, hiza dot osogit o pomogunan, supaya amu sogiton it ulu. Topot ong sumuvang sid valai, tantu iduon i sirung ko torindak dino, tu tanid o kogunaan ong sigal om topi sid Eropa - iadko i lintai: ong mongus onkus, iduon ko luvahon, ong sumamung di YB ko montiri, pihoton om atagon - pengkaa dino i sigal, dot amu osodiri tinohian ko inamasan ko tinogob).

Na ontok do nakalabus i Sabah sid hoturan di porinta British, varo't opurimanan dahai dot amu songkuro om amu koho i porinta Sabah om Malaysia do varo-po't ulun antad sid sodu di pazazad di Habal do Kovosihan, retanko, ong banalnoko i hal do Kristian, nga hal dit atag sid Sabah, suvai ulun Sabah kondiri o mangahabal om mangahatul dit ongorombongan do Kristian, ka. Iti-no o sabap i-po toun 1964, varo-no't umba do mangahatul di gorija sid tanga do Momogun sid Sabah. Ong imatan tokou i hoturan di PCS, oruhai kaharati tokou biano do kuran o kosodia di PCS do iadko i gama muvalai. Nosodia-no i mad hopod ot origi. Ino dino inanu sid hoturan do piumpugan di nagama laid 1959. Sid ongoorigi dino kembulai do siongo antad i PCS om nunu i hoturan dau sampai nunu i tugas dau sid tanga di razat Sabah. Na i hiza di toun diri, varo nokotiim do muvalai dit a-ko piro o panambayangan isuhut

di hoturan dino, ino-no varo lumavus di manaan di taap, i sid tanga do bangunan, om iri-ogi it apat it origi sid ongosunduk om i-po't origi ko korokod sid rongobon sampai it apat suluw di mintutuk sid valai dino. I Lumavus, ino-no i Kristus. It origi sid sunduk, i Kitab Laid om Kitab Vagu om i kinapasandatan di kosipan dit Rasul om Reformasi. I korokod sid rongobon, ino-no i kopomodsuan om i meja do Kinoringan, ino-no i potimpakan di kakanan om inumon di poginakanan di Tuhan Yesus. Iri-ogi i hoturan di mangahatul, i vaza monunda di piumpugan om ipat-ipat it ulun o potimpakan do Kitab om palan monuduk om it ongoulun mogom mitotoguvang sid sangkap om sid ulun di sid sampaping, iadko i hoturan minisavo, osodiri ondu om kusai miampaping. I tugas ponong sid porinta om sid ongoulun vokon, ino-no i rinding do gorija, nga ogiang-no, okonko notutup, supaya i Habal kadapat lumabus sid ulun dit amu-po nokosuvang, om i barat antad sid luar kadapat sumuvang. It ongopintuod do rinding, nga kavi-avi it ongoulun di piumpugan o minangagama, iadko dau do bahagi sid puvavalazan. It anganak om ongondu nokopongumpug do watu om pantai sid paluw bahagi monimin di rinantai do gorija, i harati, ensanan it ongoulun Kristian, ondu kusai, anak osukod, nga mitatabang potunggol di panambayanan. Pengkaa dino ogiang-no i taap ponong sid savat om ponong sid Kinoringan do kumiboros do Kinoringan om tumorima di Sundu dau. Iti-no i kasandatan di teologia om Doktrin do PCS i hiza diri. Nakatandon ino sid Hoturan do PCS dit nolumbatos-no i hiza di sinoda keso ontok dit ko-18-20 April 1966. Ogumu it ongogorija vokon, siti ponong, koluu di gorija dit inantadon di misionari dioti, Anglikan sid England ko Baptist sid Amerika ko Belanda om Italy. Ko ong sid Kina di varo kodori it avantang o kobuatano dit ongovalai di banalko tanid mantadko sid Eropa, tigogi, varo bongunan koluu di gereja sid Cologne om sid Rom om London di banalko amu asanggong sid tanga dit ongovalai do Kina. Topot ong i gorija sid Parapat om Kudungkung, Pantai, Tangkarason om it a-ko piro o tempat vokon, nga Pasok Momogun o buatan o valai di nokokristian-no, di posuntu di boros do Kitab, valai di dang Kinoringan sid Sabah, okonko sid Kina ko London.

Aso kiroon i hiza diri do suvai 39 liang iadko i Gereja Anglikan ko 177 o ponuhuan om poniagan iadko i Gereja sid Kamerun (PCC) ko mokihatul di Pope sid Rom antawa pobeas dit ipat-ipat i piumpugan, supaya ikid piumpugan mangahatul di kondiri om mingkakat kondiri (ino-no i tradisi do Presbyterian ko Reformed- dot i BCCM-kagi varo hoturan do iadino. Minsanko kibishop ioti, ino bishop aso hak bahagi di bai iso o piumpugan, sid Kudat ko sid Kota Marudu. Iti-no o sabap osusa i PCS do mamarai di tana do BCCM KM, isuhut di dioti do horogo do 100 Ribu, minsanko i horogo di tana

diri, hiza di minangaplai ioti sid porinta, bai limo ringgit o horogo. Ong i Bishop aso kuasa do moniag dioti do momuhorogo do iadino). Aso kiroon dahai diri do mogihim do varo uskup om varo onom fasal do hoturan Lutheran dit a-milo-milo osusa it ulun Kristian mongohondom sid ginavo (I kosipan om it anaru i tolu o panarangan kananganko i Ama, Anak om Sundu, i hopod pinonuhuan, i panarangan di Luther kananganko i kopomoduan om i poginakanan di Tuhan Yesus, i Pomintaan Dua di Yesus om i panarangan di Luther dino ko kuran i vaza mangada do kasalaan, isuhut di boros di Yesus sid Yahya 20,22), antawa suvai ulion do gorija, ong abarakatan do pope ko bishop di nokotungkus di barakat antad sid di Petrus, i retanko kumoduo di Kristus.

I pongitungan dahai (ongosukod om a-ko piro o misionari) diri, amu atag mongimvagas om pababo dit ongoulun Momogun biano di tradisi di nunu-nopo songbansa sid saralom do duvo ribu toun. Sabap sid a-ko piro o tradisi diri, varo kinolonduan, varo nokotohiang antad sid Habal do Kovosihan ko varo gama pamung ko pagavul do bai koundango sampai lobipo mongoguna di tradisi mantadko i Kitab. Pengkaa dino sid gama mogihim do ngaran sid boros Momogun bahagi di gorija di nokotunggol-no, minancadang-okoi di ngaran do manalahas di tomodon om tugas, ino-no, i gorija di Kristus. Vokon-no ong tihaba i gorija di sid tanga do riniba, ginama dot ulun dit amu tantu sumuhut ko ginama di barat do pensubaan iadko atalahas sid Usuran do gorija sompomogunan. Iti-no o sabap ong potorongot do gorija o ngaran, i tugas do gorija a-insan opongo, ino-no i ngaran om tomodon om tugas tokou sid Protestant Church in Sabah. Ong sid Boros Inggeris, isuhut di vaza monompuru momoros dit ongogorija di nokembulai sid Reformasi, ino-no i gorija di pasasi di kabanaran do Kinoringan, hiza di mad nengkod-no it atarang o kososizan iadko i hiza di reformasi diri. Ino-no i puun di boros dino, PRO ino-no i hal ponong sid katagan, TESTANT ino-no it atag o kososizan, hiza do nakalandu i gorija sid aso tantu-tantu, ponong sid kinembulitan om kapangatagan di goreja di Kristus (Gorija Protestan sid Sabah). Okonko Protestant Church of Sabah - do Sabah iadko Church of England - Anglikan Church. Tu ong sid Gorija Anglikan, i raja dot England ot ulion do gorija, mongontok di Kristus dot ong otopot, i Gorija di Kristus, nga tumongkop do pomogunan om i PCS, nga iso o bahagi di gorija di Kristus sid watas do Sabah. Okonko Sabah manansanganu do gorija.

Manjadi iadino o kinosodiaan di PCS. Ong i bantuk di valai do panambayan-gan diri, nisusui di kobuatano do sulap, ino-no i bongunan sid Momogun, pongizanan do parai om koposizon dot ulun. Iadko i Momogun diri, suvab-suvab minamanau kumaa sid sulap do mongoi do parai, pengkaa it ulun Kri-

stian rumikot sid panambayanan mongoi do kakanan do kapasi, isuhut di boros di Yesus, Okonko baiko kakanan o kapasi di riniba, inoi nga ipat-ipat i boros di kalabpu sid kabang do Kinoringan, ka. Kasalaan-nopo, sid tohudi ong i pinengkakat-no vagu do panambayanan, sinumuhut-no di kobuatano do gudang do barang sampai nolingan-no i teologia di bongunan do PCS, baiko sinumusui dit ongogorija vokon dit aso kinopianangan di teologia do panambayanan. Pengkaa-no dino ino hoturan di mad i piumpugan mitotompuzung di panambayanan, nga nengkod-no sampai varo't ongobongunan biano i retanko gorija do karajaan, iadko mad dang porinta, okonko dang piumpugan. Sid tohudi mad politik o minongurug dit a-ko piro ot ongobongunan do gorija, okonko i kosipan dit ipat-ipat it ulun Kristian om i piumpugan. Ong iadino, okon-noko teologia om koundango-po o arkitekt dit ongopanambayanan do PCS.

Tanid mantadko ino, ogumu-po o hal do jinumadi di mad pinosuntu di kosipan om teologia do PCS, ino-no, ogumu it ongoalun-alun dit unturu do piumpugan o minangagama. It amu-po nokosuvang sid piumpugan, okilong om ohubang i vazaan. Topot i kosipan om teologia o minonulid om minongoluvass dit ongoralan iadko it ongoalun-alun di sinangkul dit ongoulun do piumpugan do PCS diri. Pengkaa dino it ongoRumah Sakit om i kinosimbanan di kopudan dot ulun, tu mongoguna di tana di inurug do Kinoringan, ino-no i mananom do nizuw om kolopioi om it ongototonomon vokon, i kosikuron dit anganak, it ongoponulung di kogoos mamanau sid sodu, tu pazasad di Habal do Kovosihan do vokon songminggu koling sid Tupak ko sid tempat vokon dot okonko nojgian. I harati, i teologia, ino-no i vaza kumiboros do Kinoringan om manarang do Kinoringan okonko hal dot utok om surat om sikul ko kursus, inoi nga jumadi do kopoulosan om kopudan om kotolongan om kapanahan om kasandatan sid ensanan i kavazao dot ulun do posuntu di gama di Yesus om i samod do Kinoringan, supaya it ongoulun vokon kadapat momurimon om mimot sid Kristian dot isai i Kinoringan om i Yesus Kristus.

It ongohal vokon, iadko i pakazan di pandita om ponulung, hiza do mengkhotbah ko momodsu dot ulun om anganak, kiniro dahai diri dot hal dot opodok om bai hal dot oribau o harati. Andaman-ku, i hiza do nokorikot i Rennstich om Rusterholz, minongitung sampai minamalang ioti dot, Atagal-no ong varo-no banat dot asasad. Minsanko sid dahai, okurang ot apakai ong biano, tu banat do professor kodori sid Universiti iti, ka dioti. Suvai adau di kinouliau-ku sid Jermani 1967, nening-ku ioti duvo miboboros dot, Osuhul kumaa kito sid Tukang Jahit mokiukul do banat dot asasad, tu ino banat dino, ong arapakan i soval sid tanga ralan, oruhai monokop, supaya amu emot i

rapak, hiza do sumambayang, ka. I harati, okonko hal do teologia o sabap dioti diri mokiukul do banat diri. Kagi otopot inot inantadon di banat dino, okonko hal do Kitab. Banal-no it Imam sid ulun dot Israel, varo't asasad o pakazan, supaya amu emot i komoluan dau, ka di Kitab. Sabap i hiza diri, tanid-no o pakazan dot ulun dot okonko kisimpon it ongokusai, inoi nga asasad o banat miabal dit ongondou.

Manjadi, atag do sodirizon tokou biano dot ombo i gama tokou sid PCS kembulai antad sid Kitab om ombo i bai susuzan tokou, tu varo gorija vokon di mangagama do iadino, minsanko amu-po elaan ko kaharati dot nunu o sabap do iadino o gama dioti.

Varo-po iso hal dit atag dara pamung siti. Rontob-nopo, tu nabasan-okou laid mongimvagas di hal dino, varo pongitungan-ku dot osuhul ong motos-okou om amu-ku-no ovitai vagu sid di tokou iti. Topot, sabap konihab i New Straits Times minongovit di hal diti, katama-okou mongimbilit di hal diti, ino-no, i hal do boros tokou. Ino-no i tajuk di habal sid New Straits Times: *Painful pollution of Bahasa Malaysia* (New Straits Times 28.4.96). I Minggu i Amai E. minonghotbah sid Taman Gorija PCS sampai tinutul dau dot i hiza do Pentakosta i Petrus nokopenghotbah sid Boros Ibrani. Topot it ongoulun di noumpug siri di tasantanid-tanid o bansa, nokorongou di boros di Petrus sid dau om dau do boros. Gam ongohopod om duvo o bansa di nokorongou do iadino. Baiko it Ongomomogun di noumpug-no sid Taman Gorija PCS, o bai nokorongou-naku sid Bahasa Malaysia. Sabap i Pendeta E. minamasa dit a-ko piro ayat sid UR 2 sid Bahasa Kebangsaan!

Boros di New Straits Times, it kiongosikul sid Semenanjung mamatai di Bahasa M. tu atandas popigavul dot Ingeris om Malayu, gam minsanko i spelling dioti di boros dau kondiri, nga amu-no el-elaan-po. A-ko piro toun antad biano, aso bahasa Melayu tokou, ka dit Professor do University Malaysia sid Kuala Lumpur. Na i dohon do purimon, pengkaa dino ong i Boros Momogun, ong okonko alangkas-kou monimban di vaza dikou mumbongut do duvo linsou Momogun om tolu linsou Bahasa om popigavul banal di duvo i boros dino do sampai, Momogun, nga okon, Malayu, nga okoni o vaza dikou mumbongut om posondot di boros do Kinoringan, minsanko kenginan do Kinoringan dot ipat-ipat i bansa korongou sid dau do boros i kogofoo di gama di Tuhan Yesus. Na sid saralom di gama di Basel Mission sitid Sabah, noko-tiim-okoi do porikot sid ongoulun di Habal do Kovosihan sid dikou do boros, supaya i ginavo dikou otogu om tumimpa sid kodim do Kinoringan. Varo pangalaman di Basel Mission sid Cameroon. Nopongo-po i Kitab Mungkaka

bahagi Cameroon om nopirin-no sid dahai sid Stuttgart, om it a-ko piro o buuk dino nokokirim-no sid Cameroon, varo habal dot "atagal-no ong ikirim-no dikou kavi. Tu ong iokoi diti, bai Pidgin-Inggeris o pakazon ong bianco", ka. Alaid-nopo mahu-tahu i 5000 o Kitab Mungkaka sid Stuttgart ot agazo ot ongkob noponu, varo-no pongitungan di Bible Society dot osuhul ong ijuval i karatas dino dot iada i karatas sid injin silihon do papaid. Iti-no o sabap nijuval-no it ongobuuk dino sid ulun di mangahatul do posilihon i karatas dino do tanid o kogunaan. Manjadi tigogi, limo toun katalib, varo korikot it ongoulun do Cameroon sid Stuttgart sampai nokemot do varo't a-ko piro-po o kopi di Kitab Mungkaka dino sid Musium. Boros dioti, Adeh, iti bala i Kitab dahai. Ozi-okoi do Kitab di iadino. Siombo-ka o kadapat do kitab do iadino, ka dioti. Kangku dioti, Aso-no ong bianco, bai it a-ko piro sid Musium dit amu-no atag dot onuvon-po. I kogumuai dit ongokitab dino, niada-no, tu amu engin i molohing dikou dot pokirim sid dikou diri, kangku. Manjadi banalko orubatan ioti dot amu noguna i Kitab dioti diri. Sabap bianco-ogi om kaharati-no ioti dot i boros Pidgin okonko boros banal, bai vaza miupakat dumagang do sangup om guol sid tuhanan ko tamu. Tau-ma ong i Boros Momogun om i Kitab Momogun, iadino ot ahajangan ko kuran? Ikou-no ot elo mangahatas di nasip di Kitab dikou om i boros dikou.

PASTORAL TEOLOGIA DO KITAB (ituduk-no sid PLA 1990)

Umpatod: I teologia, ino-no i tudukan kananganko i kelaan om kotutunan do Kinoringan ko i vaza momoros om manarang di hal do Kinoringan. I pongoretan dino, inanu-no sid duvo o pongoretan di boros Yunani, ino-no THEOS = Kinoringan om LOGOS, LOGIA = boros om tudukan om hoturan do boros. Na i koubasan do teologia di nituduk s'íd ongouniversiti om it ongosikul do Kitab, pengkaa dino: varo't a-ko piro o segi ko raan do tudukan di napapan o tudukan, ino-no:

Tafsiran ko panarangan dit ongobuuk do Kitab Laid om Kitab Vagu

Dogmatiks ko kosipan, ino-no i gama mongonsi di kosipan

Etika, ino-no i panarangan di gama isuhut di kosipan

Pastoral Teologia, ino-no i vaza monuduk di kosipan sid piumpugan om ipat-ipat it ulun

Pastoral Kaunseling, ino-no i vaza mogkovosihan dit ulun sid piumpugan

Sejarah ko Usuran do Gorija

Sejarah ko usul di Dogmatiks, ino-no i kosurutan di kopongohorotizan di kosipan

Manjadi, vokon-no inot ongotudukan dino ong banalko osodiri. I monuduk di tafsiran amu engat i tudukan di Dogmatiks ko i guru dot Etika, amu elaan do nuu i tudukan do kosipan om i iadino. Ong iadino, ogolivong i murid, tu amu kaharati om amu kemumui di tinomod dit ongotudukan dino, sabap amu koduzan di panangan dit ensanan it ongotudukan dino dit ong sukul atag, osing-gazung o vaza manarang di hal om kenginan do Kinoringan. Ong iadino it ongotudukan, mad monusun dit toriso-iso banang di nosodia do mangavol dara do rinugadin. Topot amu tumoguvang mangavol, bai monguji dit toriso-iso i banang om i warna di banang, aragang ko etom, overuk ko osiloui. Ino gama di iadino amu mongimbulai di votik ko surip dit avol, gima lobipo i gama mongoguna dit ipat-ipat i warna di toriso-riso i banang ko mongoguna dit kapangaan di tapi.

Manjadi ong i tajuk di tudukan diti, retanko PASTORAL TEOLOGIA, ino-no o harati, sid tudukan dino sinompuru om inumpug om inonsi i sokovia i gama do teologia, iadko mangavol dit ongobanang di tasantanid-tanid o warna, supaya varo kosurutan do kapangaan om varo emot dot ombo banal i guna om kuran o harati om kopongentutunan di teologia, ino-no i tudukan kananganko i Kinoringan.

I dogmatiks moniim do mongonsi di kosipan do iadko posondot sid ABC di kosipan, ino-no, isai om kuran om siombo i Kinoringan, i usul om i sabap di

Yesus sampai mongonsi dit ongopangalaman dit ongoulun di minonurat di Kitab Laid om Kitab Vagu. Ino gama dino iadko turupung do Kinoringan di nokosusut sid tanga dit ongopangalaman dit ongoulun di nakasasi-no sid Kitab. Inot ongosasi dino minongusul dit ongopangalaman kananganko i Kinoringan dot i vaza dioti manarang, iadko nokopikondori om kopitoguvang do Kinoringan sampai mamakai ioti di kobuatano do riniba sid vaza manarang. Iti-no o sabap do varo panarangan do varo poo i Kinoringan ko varo kangkab, ginavo, ulu, vuros, odung, tolingo, mato om hakod do Kinoringan. Sid kobuatano do riniba i Kitab manarang di kobuatano do Kinoringan dot ong otopot, Pasa dila om pisok domburan nga aso tinganan mongompus om posondot banal di gama manarang di kobuatano do Kinoringan, sabap aso tinganan dot akandai do riniba mangaharati i kobuatano do Kinoringan. Baiko ngaran-no ohorotizan om ngaran-no ko otutunan. Gam varo boros di rasul Paulus sid 1. Kor 13,12: *Memot tokou do Kinoringan iadko baiko monoromin sid metal di memot dot ondig-ondig dit amu osonsob. Suvaiko hiza do kovian om tumoguvang tokou-ogi do Kinoringan*, ka. Ong i teologia di Silam amu moniim tumoguvang manarang di kobuatano do Kinoringan. Minsanko varo 99 ot ongongaran bahagi di Kinoringan, iso nga aso ngaran dino di mamakai di kobuatano do riniba sid vaza pentutun do Kinoringan.

Vokon-no ong varo tudukan do teologia di mad outboard dit amu kosondot sid vaig, murug-turug it enjin, nga amu mamananau it alud, tu bai barat ot onongon ko iadko kurita di nokotimpak-no sid jack. It enjin poturug dit ongohakod do kurita, topot it ongoruda dino amu kosondot sid alun-alun. Iri-ogi aso rikoton di kurita. Na i Teologia do Kitab monodia di gama monginjil om menggembala dit ongoulun om it ongopiumpungan sid gama misisingilo di vaza mongonsi om posondot di kenginan do Kinoringan, supaya i mononteologia om i mokigazad di guru, sompi tumurut om sumuhut di kenginan do Kinoringan. Manjadi sid a-ko piro laang dino kogili-no i tudukan di Teologia do Kitab.

1. I sokovia i gama do gorija sid gama sumambayang, mengkhotbah, ongosikul om ongokursus do Kitab, i gama mogkovosihan om mangahatul dit ongopiumpungan, nga iso-no o tomodon, ino-no, engin i gorija dot ipat-ipat it ulun do Kristian dot otulungan sid gama jumadi dot ulun di sumuhut di kenginan do Kinoringan. Nosusi tokou-no di Kristus, sabap ino magavi tokou posurut di kosusian dino (1. Tes. 4,1-11) Ong varo 't ulun dit atahakan do kolunduo, nga suvai kiguna i kolunduo dino, ong it ulun dino mongoguna om mamakai di kolundu dino sid avantang o panangan. I gorija aso harati om aso

panangan om guna sid kondiri dau, tu iadko asin dit siri-no ko siri sid pongizanan dot asin. Ko i lampu dit aso sinikit, bai umpakai do valai, topot aso binahang dau. Ko i buuk sid palad dit ulun dit amu elo mamasa, tu buta hurup iosido. Suvai usahaon-no om kiguna-ogi. I Kristus o minangahatul di gorija sampai minangamung di tokou sid gorija dino. Iti-no o sabap dot atag do jumadi tokou do gorija di Kristus. Sumunggu tokou sid rikoton tokou. Kuran-ka ong varo't Amanah Rayat dot ulun dot amu mamananau mongoi it ulun dino? Tu ong iadino, mad aso Amanah Rayat. Manjadi i gorija ino-no i tempat di kosopulan om kotindalan om kopioondusan do Kinoringan om i karajaan di Kristus. Iti-no sabap i tugas di gorija: Posuntu sid tanga do razat dino kosopulan om kotindalan om kopioondusan om i karajaan om hoturan da Kinoringan. Ong amu mongusaha i gorija om ipat-ipat ulun Kristian dino tugas dino, i barakat do Kinoringan di nokosondot sid gorija om ipat-ipat it ulun Kristian sumiliu do lulupu. Iti-no o sabap dot atag do tumoguvang tokou di tugas dino dot aso kovongo-vongo ko kogolivongo, inoi nga tumatap tokou om tumoguvang di tugas tokou sid gorija di Kristus.

2. Na i Pastoral Teologia do Kitab, ino-no i tugas dino, monodiri om mongonsi di tomodon om tugas di gorija sid gama mongintalang di kuasa di karajaan om hoturan do Kinoringan. Ong mokitalahas dara dot isai i gorija, ino-no, Ensanan it ongoulun Kristian di nopodsu-no om nakamung-no sid *guvas di Kristus (1. Kor. 12)*, inot umpug di nohoturan-no di Yesus Kristus. I kosipan dit ongoulun do Kristian sumasi dot, *Yesus-no o Tuhan di vinangun*, ka. Iti-no i kakansangan ko karan di pezau om papanau di tokou.

3. I Paulus minonodiri di situasi om iri-ogi minogkovosihan om minonteologia iosido sid ongopiumpugan om it ongoulion di piumpugan. Ino gama dau dino nakatandon sid ongosurat dau di pakaa sid ongopiumpugan (Rum, 1. + 2. Korintus, Galatia, Efesus, Pilipi,, Kolose, 1. +2. Tesalonika) om i sid a-ko piro ot ulion do gorija (1. +2. Timotius, Titus, Pilemon). Ong monginsosok om momorisa tokou dinot ongosurat dino, mad amu agazo o pitonidan i monurat i Paulus sid piumpugan do Kristian ko sid bai iso't ulun Kristian. Sabap sid toduvo-duvo o surat manalahas i Paulus dit ongokosusaan sid piumpugan om manarang dit ombo it atag om amu. Ong sid surat pakaa sid di Titus om Timotius, bai it okudik nga niamung dau kananganko i gama dioti mangahatul di piumpugan. I harati, I Paulus-no laid o minongimbulai di Teologia do Kitab sid ipat-ipat i piumpugan. Rontob-nopo, ong amu otibang iosido ko varo sangkut dau magandaha sid piumpugan, minonuhu-no i Paulus dot ulun vokon

mongontok dau sid toriso-iso o piumpugan. Inot ulun dino o minangatod di surat di Paulus om minanarang-po di surat dino. Iti-no o sabap dot oruhai kadapat tokou rumamit di teologia do Kitab, tu sinod ongosurat di Paulus om it a-ko piro i rasul vokon o kematan. Kagi, kodung nokogili di Paulus ino teologia dino, niamung-po dau i vaza do kaunseling ponong sid vaza mongusaha di teologia ko kosipan. Imatai ino sid Rom 1-11; 1. Kor.1-4; 2. Kor. 1-7; Gal. 1-4; Efesus 1-4; Fil. 1-2,11; Kol. 1-2; 1. Tes. 1-3; 2. Tes. 1-2. I sokoviai i Teologia do Kitab isunsui di situasi sid ongopiumpugan diri om iri-ogi nakamung-no i gama di Paulus do kaunseling, ino-no Rom 12-16; 1. Kor. 5-16; 2. Kor. 8-13; Gal. 5-6; Efesus 5-6; Fil. 2,12-4; Kol. 3-4; 1. Tes. 4-5; 2. Tes. 3 om i iadino. Na torinsan-insan mogulu mongimpuras i Paulus di kobuatano do piumpugan om it ongoulun di mongunang om iri-ogi mamalang dot ombo it atag do posuruton. I harati, i Paulus tumoguvang di tugas dit ongogorija om ongopiumpugan dot inot ongopiumpugan diri om it ongoanggota di piumpugan, nga ulun di bai kosusuvang om kopopodsu. Sino dino manalahas-nopo i Paulus om mogkovosihan-nopo dit ongokolonduo om ongokokuguzan di piumpugan. Sid ulun dit okugui om it ongokakansang, sid ongoelo om it mad buta hurup sid kosipan o mongoromot i Paulus sampai pembulai di kenginan do Kinoringan om kuran it avantang o hoturan om kosurutan do gorija. Ong bahagi di tokou biano, Amu miuma do mongonsi di Kitab (manafsir) om mongohondom di Kitab sid keso, koduvo, kotolu om kaapat ko kuran-kuran, sampai mangagama do pogihiman iadko Kamus, supaya kemot dot ombo ot ayat mad kopionong di di tokou do situasi sampai mongoduat dot, Nunu-ka i kovosihan do Kinoringan sid ipat-ipat i hal di nokembulai biano om nunu-ka o kenginan do Kinoringan do didino di nokembulai laid diri ko kuran-kuran. Sabap i Kitab amu monuduk di hal dit apokitudukon. Aso-po boros sid Kitab ong i hal do SIMEN, i barang di napakai ong monimen ko mamaitong, ko i hal do kurita di mamakai do petrol ko diesel om ogumu i vokon. Banal-no, varo't ongoulun Kristian di momoros, Ong kodung a-po arait i simen ko motoka sid Kitab, iti-no o sabap dot a-kavasa tumudu ko mamakai di barang di iadino, ka. Ong otopot, sid nunu-nopo i kobuatano om hal atag dot mongoduat it ulun do Kristian dot, Ombo it atag mamakai om mangagama om posurut, isuhut di kenginan do Kinoringan. Ong kiguna i kurita bahagi dit oruhai rumikot sid ulun, aso karaatan ong mamakai. Topot ong oholian tumangkus it ulun ko araat o panau dot ulun sampai kapatai dot ulun ko kopunovot, ino-no tantu okonko kenginan do Kinoringan.

Manjadi iti-no it atag mongoduat om mongimpuras laid dot, Nunu om kuran-ka i situasi tokou biano. Asot ontok ong sid situasi dot Sarikat Amerika o

manarang di kenginan do Kinoringan, tu okonko sid Amerika tokou diti. Siti diti engin-oku posuntu do kuran o vaza mononteologia do Kitab bahagi di situasi biano. Hiza di Kursus Penginjil sid Pantai 1990, minonuduk-oku do iadino: Sodop biano tumoguvang-oku di kobuatano do Sabah didino om nunu banal i tugas tokou ulun do Kristian sid tanga di razat do Sabah. I tugas di Kristian tokou, ino-no ponuhu tokou di Tuhan Yesus kananganko i gama mangagazad om manaud dit ensanan it ongoŭlun do Sabah dot antad sid saralom di kuasa di Yesus om i Sundu do Kinoringan o gama tokou mangagazad om manaud. Kondiri di Yesus nakatanga sid ongoulun om i razat diri, nga minonodiri om minongimpuras iosido di kobuatano dot ulun. Boros dau, Ioti dino nasaadan-no om nopogos, tu aso-no manaud dit avantang o panaud. Nehas ioti, natagak, osizau-no (Mat. 4,23 om 9,35-36) Iri-ogi minomoros i Yesus dot, *Ioku-no diti o manaud dit avantang o panaud* (Yahya 10,11) ka, om, *Toudo-no dikou it ongodomba di natagak*, ka (Mat. 10 om Yahya 21,11-15). Na i tokou biano sid PCS, 1960 tinounan antad di hiza di Yesus diri. Kuran-ka i razat ong biano, om isai-ka it ulun di kumavid di tugas dit antad sid di Yesus diri? Sabap boros di Yesus: Iadko it ama-ku minonuhu dohon o gama-ku monuhu dikou, ka (Yahya 20,21). Manjadi kuran-ka i gama mononteologia ponong sid Ongomomogun om it ongoulun di tanid o bansa, nga ulun sid Sabah om ulun sid simbol tokou? Kuran-ka ong biano i situasi dit Ongomomogun sid Sabah, om it ongoulun do songriniba? Iti-no amu oruhai mongonsi. Suvai kaharati tokou di kobuatano dot ongoulun om ensanan i razat, iri-ogi osodia tokou do poromut sid ongoulun di Habal do Kovosihan.

Tiiman-ku ino ong bahagi di sitid daerah Kudat ponong:

Sid kampong sid Bengkoka: I korikot-oku siti, nemot-ku-no do varo komojuan dara, tu varo't ongovalai dot avantang-vantang, varo't ongokabun, vokon-no ong kivaig do graviti, elektrik, ong osomok sid kadai. Topot ong pajakon-ku mongitung, mad iri-no ko iri dit insan-oku nokositid Tupak. Banal-no, alun-alun varo, obuka om oluvas dara i pomogunan. Amu okuasa do rogon i pomogunan, obebas it ongoulun. It ongokumpani di mangavi di himbaan, ahatal o gama dioti mongoluvas do pomogunan dot mongoi dit ongokazu o tomodon. Sampai jambatanan dioti it ongobavang ko olungan, ong varo kazu sid sampaping do bavang. Rontob-nopo, ong olizudan sampai orulun i jambatan, okonko varo-po mangatag vagu, ong avi-no laid i kayu balak iadko i sid Pias. Sabap i jinambatan di kumpani i bavang diri, okonko i komojuan do pomogunan ot panangan dioti diri, inoi nga bai mangavi do himbaan om i kosuruto di kolunduo dioti antad sid kayu balak.

Banal-no ong sukul aparu it ongoulun om osukup o pangi sampai aso butu, tantu varo oula, kouvaan dot okudik, sazat, dalai, parai di miuma do koposizon suvab-suvab do laba mantadko i hiza di gulu diri. Sabap amu osusa biano do monumad dit ongorogon pengavi dit inomot om it ongopangazam, manuk ko vogok om karabau. Gam varo't ongokabun do nizuw. Kasalaan-nopo, okurang i horogo ong nizuw. Ino-no rontob, amu kopionong i kosurutan do komojuan do pomogunan om i kosurutan di pokititimburuan dot ulun. Ogumu it on-gokenginan dot ulun, ong bai sulung, kosukupan di kopudan suvab-suvab, kakanan, radio ko TV om vokon. I gulu diri, aso badi tantu om aso siin, mad miuma-no it ombo o varo. Topot ong biano, tu osomok it ongokadai om ahatul i gama di radio om TV mongonsug dumagang di retanko kosukupan, amu kopionong i kosiinan om i kenginan dot ongoulun. Minsanko varo't agazo ot noula iadko it ongosangup didino sid Tangkarason, siombo-ka kadapat mongojual di rinibuvan o sangup. Ong mangatod sid bandar, minsanko i panambang a-ongoi ong alaku dara. I harati, it ongoulun dit osodu antad sid bandar, banalko ogumu o kosusaan om kapagasan. Amu otimbang it onghorogo do barang di kadapat dara mongojual om i barang di pokidadagangan. Amahal it ongobarang antad sid sodu, omura banal i dato do barang di varo. Ong sid bandar, tanid-no o kobuatano. Ong sukul atarang o kogojian, minsanko 2000 sampai 3000 Ringgit varo sombulan. Topot ong mitamong sid valai dot ulun, varo antad 300 sampai 1200 Rgt siva somvulan. Ko ong osu, nga limo nalad nga saringgit o horogo ong sid KK. Ong agazo o rato, oruhai do 12 Rgt o horogo. Karan, varo, vaig, varo't antad sid paip do porinta, alun-alun dot avantang, varoi, ong kikurita it ulun. Rontob-nopo, mad aso 't pentaranan do kurita. Suvai mamarai do tempat parking sid bandar do limo-limo nopod siin sanjaham.

Ong kiroon do Sonsabah, varo dati ongolimo peratus di lumundu dot it hasil dioti sid saralom do somvulan, labaan do 5000 Rgt. Varo-no onom nopod peratus di kikosukupan do koposizon suvab-suvab do miuma-po mamarai di siva do TV om it ongobunga di siin di angkat-no. Tu minsanko amu miuma i balanja dioti do monimbaru di nunu-nopo o kenginan dumagang, nga kadapat ioti mangkat do siin sid bank om mangapus-ogi do vulan-vulan. Iri-ogi varo't ongo 35 peratus it ongoulun di razat Sabah di bai ngaran-no kakan iadko i hiza di gulu diri do bai parai om dalai, runti om labuk om tawadak-po. Na suvai adau-adau mansahari ioti dot aso 't umpai bahagi di suvab om suvab dino. Ogumu-po it ongoulun dit opogos mogihim di kosukupan bahagi di bai adau biano. Nemot-ku-no i toun sid Sinukab dot ulun monivak do Garib sid himbaan. Asadapan iosido sid himbaan monivak dot osodu kagi i pongonuvan

dau it apat nenan tivak. Otopuan-po dot umos di nokouli-no iosido sid kadai, tu mogihim dot ulun di dumagang di tivak dau. Sabap iokoi antad sid Kudat sino, kisurupu iosido, tu avi alaku i tivak dau dit apat batang do tororinggit-ringgit o horogo dau. Manjadi minongoduat-oku dizau diri do nunu ot timboruon dau it apat ringgit dino. Boros dau, Dumagang-oku do vagas, ka dot i siin diri, bai miurma do sagantang o vagas. Minsanko asin ko sada do pangavau, nga amu kosukup it siin diri. I harati, ong kouli iosido sid valai, bai insan-no magazau om avi-no i balanja di gama dau dot nasadapan iosido sid himbaan. Na kiroon-ku, kakali ogumu it ongoulun sid Sabah di iadino mansahari suvab-suvab do sukul-po kakan it ongekob dau antad sid kapagasan do gama mansahari.

Na it ongoulun di iadino, kodung oula i dalai ko parai, ong sukul varo't okudik, turus mongokujuval ioti ombo-po i varo, tu monimbaru dit ongobarang dit engin banal dot aso kiroon dot kodung nokujuval-no it hasil, amu-no songkuro om avi-no om osusa-no vagu dumagang do vagas hiza dit amu-po orikot i mongomot vagu. Aso kiroon dot hiza do bai kapangaan mongomot, omura i parai, tu sokoviai it ongoulun nga kiparai. Iti-no o sabap suvai alaku i parai ong omura o horogo mongokujuval. Topot kodung monombitil it ongoulun dit inavi-no laid i parai dau, amañal-no vagu i parai ko vagas sid kadai. Tu ino-no i vaza di kadai mokihuhuntung sid ongobarang. Iri-ogi it ongoulun di monombitil osusa-no vagu mansahari dot opogos o gama do sukul-po kakan i suvang dit ongekob dau.

Manjadi ong iadino it ongoulun sid ongokampong, ulun dit opogos om asaadan iadko boros laid di Tuhan Yesus, kuran-no o gama tokou poromut sid ongoulun di iadino di Habal do Kovosihan om i kenginan do Kinoringan? Sabap iti-no o kenginan di Yesus, i tokou nga ulun di tumalad di Yesus manaud om mangagazad om monunda dit ongoulun di nopogos om nosusa. Ino gama tokou ponong sid ongoulun di iadino o harati mononteologia ko poromut di Habal do Kovosihan, supaya it ongoulun dino momurimon di kovosihan di Tuhan Yesus om tumorima di tinaud iosido di Yesus dit avantang o panaud sid saralom di tugas om vaza tokou monunda om manaud dit ongoulun dino. Sid tugas om gama dino aso bida, i Manaud do Puruvan, Tumpuk ko bai ponulung om osukod do piumpugan ko guru sekolah minggu. Sabap isai-nopo i nakaharati-no di Habal do Kovosihan, iosido dino, nga sasi-no di samod om kenginan do Kinoringan ponong sid isai-nopo it ulun, ulun di dau do bansa ko okon, i nakamung-no iosido sid piumpugan dot ulun do Kristian ko it amu-po. Dot i gama tokou monulung om monunda okonko bai boros om tudukan ko ira, inoi nga kovoza-po dot ombo i sid palad tokou, ino-no mamakai di hiza tokou om

nunu-nopo i sid di tokou, tana, kouvaan, noula, kotibangan, kosihatan. Sabap sid saralom di gama tokou do iadino ohormat-no i Kinoringan, i Minamangun om Minananggun di tokou. Suvai ensanan i kobuatano om gamaon tokou dot osodia om apakai ponong sid kopongusahaan di teologia do Kitab, isuhut di kavazao om gama di Yesus diri.

a) i hal do hiza tokou. Varo suriban di Yesus dot varo tuan di minanahak sid tolu it uripon dau do barang dot ipapakai dioti i barang ponong sid kosurutan o tinomod. Na it iso, tu elo banal, minagavi mangagama sampai nokosurut banal i kogumuo di barang di sid palad dau dino. Agazo ot hasil om uva dau. I koduvo, amu dara miabal o kogumuo di dau do kadapatan, nga kakali ong i koporuo dau sampai kihasil-no. Topot ong i kotolu it uripon, tu obul iosido, bai modop, makan pinosimozo-no dau i barang dino sampai ino barang dino, iri-no ko iri. Korikot-po i hiza do mangalapor-no, ong it iso om i koduvo dino, avantangan-no i tuan di gama dioti mamakai om posinggumu di barang dau dino, gima nokosuhut ioti di suhu dau diri. Topot ong i kotolu, boros dau diri: Tidi-i it okudik it antad laid sid dikau diri, ka. Tu ong iosido dino baiko niatag i barang dino, vokon-no ong inukad sid tana, ko bai nopung sid sahau dit odopon dau ombo i notorima antad sid tuan dau. Amu minongoguna iosido di barang dino. I harati, aso tanggung jawab dau bahagi di barang di nipataud dau di tuan dau.

Manjadi ino suriban dino, agazo o panangan bahagi di tokou om i vaza tokou mongoguna di hiza om it ongobarang tokou. Varo nemot-ku sid sunsud dot ako piro o valai dot ulun do varo kulit do karong do baja. Ong i baja di sid karong dino, minudou-no, tu alaid-no mili-gili sid sunsud sampai mad natanus-no. Nemot-ku-no sid govuton do varo umpug do bibit nizuw di natahakan do porinta ko isai-nopo, supaya atanom i nizuw om ajadi do kabun. Rontob-nopo, banalko anaru i suni dino sampai noruzou-no, tu a-natanom it ongobibit dino. Sinod tempat di kotindalan antad sid lori ko kurita, sino-no o kinoruzahan dit bibit dino. Mad a-korikot i ginavo dit ulun mananom ko minud dot i bibit kondiri tumanom. Ino dino bai duvo o suntuan. Topot varo hinotusan o hal di iadino. Ino-no, okonko aso barang dara sid ongoulun, iadko ino baja ko bibit do nizuw om ogumu it ongohal vokon nokogili di bai rumamit ot usahaon-po, nga kakali amu oguna om amu agama. Ong i sabap do iadino, varo mad obul, varo mad amu elo mangahatul di hiza om koriatan om kotibangan dau. Varo-no ong amu-po orikot i ginavo mananom ko mamakai ko mamaja om vokon-no, varo-no dot ogumu it ongosangkut, retanko varo hal vokon di lobipo ahatul mangagama ko varo koutatang ong hal do moginakan ko moling.

I tokou ulun Kristian, nga ulun dit antad sid kenginan do Kinoringan mopud om kiguna ponong sid kohormatan do Kinoringan. Sabap ino sid gama tokou om i vaza mongumba om mongumpai di gama tokou suvab-suvab kembulai do kuran i vaza tokou mamakai di hiza di nakatahak sid di tokou ponong sid kovosihan om kendazahan do Kinoringan. Okonko bai modop om makan ot apasi tokou ko minud-po do varo manahak om mongopud di tokou, porinta ko koruhang ko kabambol do kopudan. Ino-no o tugas om tinomod tokou, toudon i hiza kondiri bahagi di kopudan om i koriatan monulung om tumabang dit ulun vokon di kikokurangan om it ulun dit amu-po kaharati dit inantadon om kosungguvon di koposizan dau. Ogumu o vaza mongoguna di hiza di nakatahak sid di tokou dit atag banal o mongoriat di hiza dino. Ino dino posuntu-oku sid vaza mananom do nizuw:

It ongotatani banalko mongohodtol monuduk di vaza mananom do nizuw ko i ongobibit vokon, ino-no, suvai osukup kosongou o luvang om oruhai-ogi sumurut i tinanom. Ong nizuw, suvai tolu kaki persegi om aralom, ko ong kolopioi, duvo kaki persegi om aralom, ko sangki, nga tolu kaki, minsanko bai opodok i bibit do sangki. Manjadi ogumu it ongoulun di mananom do bibit di iadino, ino-no o kiro dioti, atagal ong iadno dino kagazo ko aralom o luvang, Sukul-po katanom sampai kosuvang i gamut do bibit, nizuw ko kolopioi om sangki om vokon-po. Manjadi minsanko ogumu ot bibit tonomon, oduruk om opongo-no dara mananom. Ino-no rontob, ong mananom do iadino, it ongogamut do bibit banalko apagon sumurut sumuvang sid tana dit amu nasangkul, gam okodou banal i tana sampai ogumu i bibit rumuzou, ko suvai alaid banal om monguva-ogi. Ong miuma o hiza apakai di mongukad do tana dot osukup i kogozoo do luvang, apapalan-no vagu i tana dino om itanom-ogi i bibit, banalko oruhai it ongogamut sumurut om tumongkop di rontob do nasangkul sampai humakang koduruk i tanom. Amu-po avi sontoun, otongkop-no i nasangkul i tana do gamut om kogoos-no sumurut minsanko sid tana dit amu nasangkul. Manjadi oduruk om tumimpun-no monguva, ong nizuw, varo limo sampai onom toun, ong iadino o gama mananom, ko it ahago o gama mananom do bai ngaran-no koukad, sampai hopod om duvo ko hopod om limo toun om monguva-ogi di bai ngaran-no monguva, gima okugui laid i totonomon dit opogos mogihim do kosurutan sid tana dit okodou banal. I harati, i sanjaham-no di nakamung sid gama mananom do bai iso bibit do nizuw, ong sid moula, varo limo sampai hopod toun o pialatan om monguva-ogi. I kapagasan di bai oduruk hiza do mananom, tu aralom om agazo o luvang, banalko agazo ot oula om ogumu o hiza o kadapatan. Ino-no o lavis di suntuan dino, Suvaiko gunaon banal dit ulun i hiza dau sid gama mamakal om

mongumpai dit ahatul o gama bahagi di kondiri om bahagi dot ulun vokon, ong kodung varo-po koriatan ko kotibangan, iri-ogi oruhai i gama mangahatul di sokoviai it onogamaon, ombo i lobipo ahago om ombo o potohudizon. I hiza kodori diri, varo hiza dot i rogon minoniag dit ongoulun gumama. Kodung opongo mongomot, varo duvo sampai tolu vulan do bai mongivas o tomodon, retanko mongoguna om mongohormat dit ongorogon om pasamba sid rogon, ombo i najanji sid rogon sid saralom do sontoun. Ong biano, varo mad rogon di mangavi banal di hiza om koriatan dot ulun, ino-no i TV. Varo kiroon dot ongoulun, ong nabarazan i laisen do TV, mad orubat ong okonko asadapan osuvaban memot di TV, gima nabarai-no i horogo do memot do TV. Manjadi it ongoulun di iadino, minsanko kumiboros do savo ko anak, ko mamasa do Kitab om magandaha dit ulun do sumakit, nga amu kotibang, gima outatang di gama memot do TV, minsanko bai tayangan sid TV dino. Ong iadino, tantu it ulun mongorubat di hiza dit antad sid Kinoringan bahagi di gama mokioopud kondiri om manaud om mogkovosihan dot ulun.

b) Tana.

Ong i hal do tana kopiakan sid hal do hiza. Ogumu it ongoulun sid som-pomogunan, nga opodok nga aso tana dioti. Vokon-no ong osunsub sid tana dau, tu nokojuval sid kumpani ko ulun do lumundu. Vokon-no ong aso tana laid antad sid molohing om aki sampai bai gumaji o koposizon dioti dino. Vokon-no ong okonko bai aso tana, gam uripon banal sid ulun di kitana. Songkuro-nopo o gama dau gumama bahagi dit ulun di kitana, kakali kiutang iosido bahagi di balanja di nunu sid sanganu do tana, tu sinod kabun om tana dau o kopudan dau. I balanja dit inanu sid sanganu amahal mantadko i gaji dau sid kabun dit ulun. Manjadi okonko bai it ulun dino, inoi nga it anganak dau nga kotungkus-no do kiutang sid ulun dino. Vokon-no ong mintoron sid bandar do minsanko iad do palad o tana, nga aso-no sampai osusa-no it ulun dino dumagang di nunu-nopo i koposizon dau dino. Topot ong i tokou sid Sabah, kakali kitana sampai i tana sid Sabah orombung om kakali miuma o darun om adau om sumuni i kogumuo do kouvaan om totonomon di kiguna bahagi di koposizon dot ulun. Aso-po belantara siti ponong. Boginisan o kouvaan mopud sid pomogunan siti, ong sukul ataud i tana.

Manjadi iti-no o tugas tokou do keso, jadi tokou kondiri o suntuan di miuma do kopovizau om pounsukup di guvas tokou. Ong i bai parai o tonomon, i ginazau bai poponu di gituko, nga okurang o guna bahagi di guvas. Amu otimung sid ginazau i kosukupu do guvas bahagi di kakansango do tulang, nipon, uhat, raha, utok om i gama di guvas monunsub dit ongopanakit om

pohijau dot ulun. Suvai boginisan i kouvaan om miUma-ogi, iadko limau om burungan di banalko kiguna bahagi di mato om i kulit om sumaap do longohon om i mongikod. Sayul bunga om sayul puteh o pakansang dit ongouhat om ponukup do raha. Inot ongototodukan dino lobipo kiguna mantadko i kogumuo dit ongolininsahan dot ubat, i retanko bitamin ko tamba raha, tu mangajaga di guvas di kakalpo osihat, supaya amu kumugui ko mongoruol. Manjadi antad sid gama do momiara banal do tana om kabun dau varo suntuan bahagi dit ongoulun vokon. Tu ong bai momoros om monuhu dit ongoulun mananom, mad a-kosuhut. Suvai kemot do varo kosurutan om kosihatan om sumuhut-ogi. Kokiraai, suvai ipat-ipat it ongakob om valai varo't ongolimo nopod kazu do punti do boginisan, kadau, amas, tumbaga, koling om vokon, om limo kazu ot ampalam om rangalau, burungan, limau bahagi di vonod di popigavul sid punti om pazas, onghopod pazas om vokon, ino-no om miUma-ogi bahagi songkongkob, anganak om osukod. Tanid mantadko ino, a-opikonggian tanom do boginisan o sayul, isuhut do musim, supaya i sokovia i it ongoakanon, nga amu osusa dumagang. Ombo i katanom om kokotu kondiri, lobipo avantang mantadko i barang dit dagangon, okonko bai aso horogo, ong it antad sid kabun dau kondiri.

Pengkaa dino, ong kikabun do nizuw, suvai ahatul o gama mongolugas do miguli-guli luvason, supaya monguva banal i nizuw. Ong oumpug it somumut sid puun do nizuw, amu okorob i tana sid sahau do puun do nizuw. Iri-ogi lobipo monguva.. Manjadi ino gama do mongolugas do kabun, hiza dot aso gama vokon dit ahatul dot lologot-nopo o gama mongolugas. Avantang ong duvo tolu ot ulun mirogop mitatabang mongolugas, supaya amu abasan ong iseso sid gama dino om oonsug-po i vokon sid gama mongolugas.

c) Kotibangan: Ino hal dino miabal i noboros laid ontok sid HIZA, suvai mongoriat it ulun di gama dau sid gama mongumba om mongumpai di sera om ombo it atag do toguvangon. Monodia di luvang do totonomon hiza di manangadau om okurang o gama, ko mananom ong hiza do manampangi, supaya oruhai sumuni om sumurut i totonomon, monodia di bibit hiza dit amupo orikot i hiza do mananom, supaya orilik-po i tagad, nga kakali olugas i tana om oruhai sumurut i bibit. Mongintavun, nga alazan it olombon o kazu bahagi podsudu, supaya amu apagon mogihim do podsudu. Ong varo timboruon, itungon-po laid dot ombo i kiguna banal om ombo kadapat do mihiza monimbaru, supaya amu osusa do miguli-guli sid bandar ko kadai. Minsanko it ongosokupakan nga ahatul o monodia om mogihim dot okonko orubat o panau ko pada, ombo it okonko turus oguna.

d) **Kosihatan.** Varo noboros laid it a-ko piro hal ontok sid TANA. Nga omungon-ku-po it a-ko piro hal. Ong kodori diri, ong monigup i Momogun, bai okudik o sigup o pakazan dau dot i sigup diri, nga kondiri dau o mananom dot a-kopigavul dot ongoubat di mongorongoi di guvas om mongimbulai sakit di retanko kansar, kansar do pomuhobo om kansar sid bulud do hakod. Ong biano, mad okurang it ulun mamakai do putus om sigup do Momogun. Ipat-ipat i bungkus do sigup, varo surat dit antad sid porinta di moniag, retanko i sigup o puun di panakit do kansar. Topot kakali it ogumu it ongoulun di monigup do duvo, tolu bungkus o sigaret sangadau. Manjadi it osusa, okon bai it ulun di monigup ot pasakit di kondiri dau, inoi nga it ongoulun vokon dot anangan i lisun di sigup do koruhang, nga anangan i sakit dino. Biano ogumu it ongoupis, ko sid ongotarabang, a-kavasa monigup. Rontob-nopo, ino-no i kobungoho do porinta, moniag dara monigup, nga kakali mangakun dot it ongokumpani di mongimbulai om mokihuhuntung sid sigup om sigaret, mongonsug dit ongoulun monigup. Sabap agazo o pongonuan do sukoi sid kopongujuvaran do sigup. Atag dara dot it ulun dit oholian monigup dot aso tinganan tiagon, magandaha sid rumah sakit om mogkodimot dit ongoulun dit anangan do kansar sid pomuhobo om hakod. Iri-ogi dara humarati it ulun di dau do rikoton...

Varo-po vagu vaza di mongorongoi di kosihatan sid kobudayaan do Momogun, rontob-nopo it ongokusai. Tu it ongondou do Momogun, nga kakarati dot i kinomol ong iinum, mongorongoi dit ivou om i pongitungan dit atag dot alaid-po, orungoi-po i gituko om it ongvizau. Engat dit ongoondu dot ong oholian miinum, neduan do tuo sampai asot andaman do momiara om monorundakai-po dit anganak om it ongvob ko osuau ponong sid savo dau. Topot ong it ongokusai banalko milawan om mioonsug-onsug moniim dot okonko bahagi di kosihatan, inoi nga bahagi di korungazan om korumaato do guvas. Vokon-no ong somminggu om engkod-ogi it enggolou dot ulu, ko it oruol tizan, vokon-no ong kodung avuk, mibobog sampai varo't asaadan om ahadan, vokon-no ong avi-no banal i balanja dot ongvob do bai i kusai ot kopurimon dot osinangan dau, tu olingan dau dot aso't akanon sid ongvob dau dino. Sabap navi sid inumon i balanja dit idagang dara dot akanon songongvob.

Siti diti, nga it ulun di mononteologia, tumpuk ko kotua gorija om ponulung, ponginjil ko manaud puruvan, nga suvaiko

keso, avantang o suntuan sid ulun vokon, i piumpugan om it ulun vokon
koduvo mangagazad banal om mogkovosihan dit ongvokoruhang om it ulun
vokon dot odoromoi i gama mongonsug sid kavantango.

kotolu, monunda om pemumui om monuduk, supaya ipat-ipat it ulun, nga kitanggung jawab di dau do kosihatan om koposizan.

Iti kavi antad sid hoturan om Habal do Kovosiahan do Kinoringan. I Paulus mangarait dino dot uva di Sundu do Kinoringan: Gal. 5,22 It ongouva do Sundu, ino-no, samod, otomon o ginavo, kopioondusan, kamamanan, kolomian, kovosihan, katatapan, kovonusan, kotulidan. Ong i riniba, monongkudau, momodrusuk, magavuk, mangaladtak dit ulun vokon, mangakan dot ulun, mopud sid gama dot ulun vokon, monguripon, mongorod-sit om mongoloub dot ulun. Om Gal. 5,23-24 I nasanganu-no di Kristus, nakasangkap-no i guvas om kenginan om i kozian dau. Tu bang apasi tokou sid saralom di Sundu, atag-no dot mozo-vozo tokou di vazaan do Sundu. Kadan tokou mokihormat di baiko hormat di riniba om kadan tokou miaanggan-anggan om kadan tokou-o miaagil-agil.

Iti-no o tajuk di tugas tokou. Amu tokou monguasa di vokon sid gama mongogorot om mangaladtak, inoi nga sumusui tokou di gama di Yesus di minonginsibak di kondiri dau (Fil, 2,5-11) I Yesus o minongontok di tokou, supaya i tokou nga mozo di dau do kavazao om kobuatano om gama.

e) I rikoton om panangan di koposizan tokou ino-no i karajaan om hoturan do Kinoringan (ko surga ong sid Injil Matius) ko hoturan om vangun vagu di Kristus. Ino-no o kosungguvo tokou. Sid hoturan dino mongimbulai tokou di kouvaan dit atag ponong sid savo, anganak, om it ongoulun vokon, i sid simbol om it antad sid sodu, i dau do bansa om ugama om bansa om ugama vokon-no. Iti-no o harati di boros di Yesus dot, Ihimo-no laid dikou i karajaan do Kinoringan om i kabanaran dau (Mat. 6,33).

Manjadi iadino o gama-ku diri monuduk sid kursus di sid kampong sid Tupak. Suvai kopionong i tudukan om i tempat monuduk om kiguna-ogi. Suvai kopionong it ongosuntuan di panarangan di Habal do Kovosihan om it kobuatano dot ulun di mongining. Ong ulun di mintoron sid tanga do himbaan dot amu oubas do varo't alun-alun sampai a-kopimot do kurita ko lori, nunu-ka o guna do mamakai do suntuan do kurita om lori. Ko ulun di nokopud sid rinumantai dot asavat sid sarazo dit a-insan nokorikot sid bai botung ko rahat, aso tinganan do manarang di kavazao om kogunaan dot alud om labu. It ulun di nokosikul do Kitab sid Universiti ko college sid bandar, banalko ogumu o pangalaman sid bandar dit a-kopitiim it ongoulun sid kampong. Iti-no o sabap dot it ulun dino osusa mongitung do kuran kadapat iosido minsomok sid ongoulun sid kampong sampai momurimon di dioti do pangalaman om

kohorotizan. Iri-ogi kopionong i gama poromut di Habal do Kovosihan.

I. ISAI-OKU DITI OM ISAI-KA I GORIJA OM PIUMPUGAN?

Ong sumurut tokou sid tudukan do Teologia Kitab, atag dot zazakon i duaton dot, Isai-ka i tokou diti ko ioku om nunu-ka o harati di Goriija om piumpugan? Manjadi i Kitab tumimpa di duaton keso, kananganko it ongoulun ko i tokou. Sid Kinotimpunaan 1-2 varo panarangan dot i riniba, nga boros om palad do Kinoringan o minongurug di riniba. Duvo o vazaan dit usul diri, dot iso-no o tinomod, ino-no, i riniba, inurug do Kinoringan, supaya i riniba wakil do Kinoringan sid tanga do vinangun do mongontupat, mangajaga, mangahatul om mananom sampai monunda om mongumbasih di vinangun om i suvang do pomogunan o tomodon. I riniba mad ponulung do Kinoringan sid gama mongolombus di kinopongouruguan do Kinoringan sid vinangun dino. Varo vagu boros sid Zabur 8 dot, *Nunu-po o kogunaan-nu do kakal-ko-po mongohondom di riniba, sampai manaud-ko nopo dit anganak do riniba. Ikau-no o minangamangkat di riniba dot asavat mantadko it ongomalaikat sampai minanahak di riniba do kovosihan om kohormatan sid riniba. Sokoviai i barang do pomogunan, nga nitahak-nu kavi sid kuasa do riniba, I sapi om domba om it ongodupot sid govuton om it ongoombolog om it ongosada sid rahat om nunu-nopo i suvang do vaig, ka.*

I Zabur dino ovongo, tu ong i Kinoringan o minongurug dit avan om it adau om i vulan om it ongokorimbutuon di banalko agazo om ahatul, nga i riniba di mad opodok banal, di mad bai kilau, nga kakali antad sid Kinoringan, gima inanu dau i riniba do wakil om kumoduvo dau. Iadino i kinohorotizan dit ulun kodori di minonurat di Zabur dino. Topot kuran ong i tokou Momogun ong bianco om sid puru do Sabah? Apapagon do manarang do isai tokou diti ko isai-oku diti? Nunu-ka? Gonsomon, ka, Kimaragang, ka, Tombonuvo, ka ko Rungus. Ulun do kisavo-ka, ko aso-po? Ulun-oku do mukabun, ka? ko kakal-po sumikul do ponginjil? Mad apagon manarang dot, Isai-oku diti? Oruhai dara ong sid vaza mangamu, ino-no, Okon Silam-oku, Okon Kina-oku, Okon RC-oku. Banal-no, kakali Momogun-oku, ulun do pasok Sabah, ulun di nakanansanganu di pomogunan do Sabah diri, hiza dit aso-po't ombuvoi di minonolod di tana om pomogunan tokou. Ino-no o pangalaman, tigogi, varo't ombuvoi di minangarampas di tana siti ko varo't ongoosukod di minongojuval di tana tokou do horogo dot insan kakan om kenum. Vokon-no o pomogunan ong navi o tana om navi-no i himbaan sampai it anganak, nga ensanan nakakaa sid KK mogihim di dau do kosukupan om kopolosizon. Otopot ino boros di Yesus diri dot, *Asaadan om nopogos it ulun diri* om i sisisi diti. Ong iadino,

banal-no ko onong sid di tokou i gama di Yesus mongoromut di Habal do Kovosihan dot, Nokorikot-no i hoturan om karajaan do Kinoringan (Mark. 1,15) *Nokensomok-no i karajaan do Kinoringan. Sabap ino, piguli-kou-no om pangasip-kou-no di boros do Kinoringan, ka dau. Ko boros di Paulus mamalang sid piumpugan do Efesus dot, (2,10) I tokou diti, I Kristus o nakagama. Niurug tokou sid di Yesus Kristus, supaya kembulai i gama dot avantang sid di tokou, i monuluk di sokoviai i nosodia-no laid di Kristus, ka. Iadino i hal do, Isai-oku diti, om Isai-ka tokou diti? ong antad sid Kinoringan o kiroon. Rontob-nopo, ong antad sid riniba o kiroon, kakali tanid.*

Antad di kinotimpunaan, nga mad mongivogu i riniba do Kinoringan om mokitalib do Kinoringan ko mokiropok do Kinoringan. Linumawan i riniba do Kinoringan sampai misingkinoringan-no. Amu engat di riniba i rontob dau. Na ombo i gama di riniba ponong sid kavantango dara, nga kolombus-no sid korumaato. I kosinango dit a-ko piro ot ulun om hal mongimbulai di kosusao di kogumuai. Sid Kinotimpunaan 3,6 varo boros dot ino dino kavi antad sid gama do riniba humambil sid a-pakavasaon do Kinoringan, tu amu engat i rontob dau. Pengkaa dino:

gulu: Avantang ong i mato memot di kouvaan dit a-kavasa mangakan.

iri: oroloi tiakan-no, i tatalanan o mongivou om iri

-ogi: it utok mokiilo om mokipintal, retanko it uva dino popintal do riniba.

I mato, i tatalanan (dila om ivou) om i pongitungan natarik-no sid karanggalan di rontob. Antad diri, nunu-nopo ot elaan di riniba mangagama ponong sid kavantango, nga sid karaatan o korikoton. Suntuan: Nokemot it riniba do tapung di kadapat mamakai sid gama mamabak dot ongopampang. Turus i riniba minangagama do senapang om bajil do mamatai dot ulun. Kodung varo kurita dot oruhai mamananau om mangatod dot ulun sid sodu, turus itangkus do magavi-avi dot sid vaza patangkus, toun-toun kiaksiden di mamatai di hino-tusan ribu ot ulun om i lisun dit ongokurita mamaniit di himbaan. Nemot-no dara di riniba mongubat om mangajaga dit ongopanakit sampai oloun dara it ongoulun, rontob-nopo, mad amu miuma ot akanon bahagi di kasapahan dot ongoriniba. Sid saralom dot 40 toun i pomogunan do Kaling pinosurut monginggazo om nokoponginggumu do pananaman do parai sampai nentolu kogumu it noula. Rontob-nopo, i razat do Kaling di minonombitil laid diri, nga gam nokosurut-no, gam momodlikop-no sampai nengapat-no i gulu diri i kokumuai dit ongokaling. Ong nemot it enjin di tumabang di riniba sid nunu-nopo songgama dot avagat banal, mangaradu, mangakut do barang ko mamasang dit ongokurita, tigogi, rinibuvan om linasaan ot ulun nantakan dot

enjin mangagama dot it ongoulun dino, amu-no kadapat do kogojian sampai tilikop ko bai mokisumad-po do porinta.

Na i Kitab manarang dot okonko impiro-piro dot, I Kinoringan nokoponiim-no mangatag di karanggalan do riniba ampai minongimvagu di hoturan dau. It insan-ogi sid di Ibrahim. Tu i Ibrahim diri nopili do Kinoringan om inanu dot ranzat om bansa vagu, dot i Ibrahim diri okonko ulun do bansa di nokoronuw laid, bai ulun iosido sid tanga do belantara dit aso ngaran diri. Na tinomod do Kinoringan momili di Ibrahim minanahak sid di Ibrahim do tolu o tugas om panangan, ino-no

I Ibrahim abarakatan do Kinoringan om vaza do Kinoringan polombus di barakat dino sid anganak dau, om antad sid anganak ilombus-po i barakat sid ongobansa vokon, ino-no sid sokovia i riniba. Kinotimp. 18,19 Boros di Kinoringan, I Ibrahim o pinili-ku do ponoudon-ku di janji-ku, supaya iosido-no o monuduk di ranzat dau di kenginan do Kinoringan. Ong otuluk i iadino, tantu kosunu-no i janji-ku, ka.

Na i pongoretan *kenginan do Kinoringan*, ong sid boros Ibrani, ino-no o harati, I hal do kopititimbangan dit antad sid Kinoringan. Duvo pongoretan manarang di kenginan do Kinoringan, ino-no:

ZEDAKA = it atag, it avantang, it onong sid sokovia i, it amu monodiri, i kiguna sid sokovia i.

MISPAT = it abanal, it otimbang, it amu avagat ponong sid gibang ko vanan, Ong ponimbang o kiroon, arantai, enizo kogumuo sid sokovia i, asot asavat, asot asala, asot alazan.

Iadino i Kitab manarang di KENGINAN do Kinoringan. Bai iadino, amu apagon dara. Rontob-nopo ong i riniba, minsan duvo-no ot ulun, varoi misolon om misosolod, miaanggan om milalawan. Minsanko bai duvo it anganak dit apid, ragang-po nga misolod di susu dit idi dau sumusu, ka di uskup Augustin TM 430. Kagi, sid Rom 7-8 manarang i rasul Paulus di kuran it ulun Kristian, minsanko nakanu-no iosido di kobebasan antad di gama di Yesus Kristus, nga kakali atarik om sangkahabai sid kobuatano laid diri (f.7) ong kodung moniim it ulun mingkakat kondiri om sumapul kondiri. Sabap kuran-kuran, it ulun nokotombil-no sid kavazao do riniba di tipalid om tilandu sid karaatan. Sid vaza tumatap, tigogi sumumbung it ulun, retanko bai iosido ot atatap om okosog sampai pokihi-no iosido dit ongoulun vokon dit okonko miabal dialo dino. I retan it ulun dot iosido nakanu do Sundu ko manansanganu do Sundu, tigogi banalnoko nakalandu sid kopokiindazahan di mogihim di hormat do dang riniba. Songkuro-nopo tisurut dara i kelino dot ulun, rumaat-no iosido, tu

mavid-kavid iosido di dau do kabanaran om katatapo, okonko i dang Kinoringan di mamanal om manatap dot ulun. Suvai magavi iosido sumasi om kumapit sid kapangaan di gama di Kristus mamanal om manapul om mongumbasih iadko i nokosurat sid F. 8 om otopot-ogi ko otindal om osopulani iosido. Sabap ino, minsanko nokokristian tokou-no, kakali pempatai tokou amu-po opongo i gama sumuhut om tumoguvang sid hoturan om kenginan do Kinoringan, gima songkuro kalaid kakali tokou-po mizau, atarik di kavazao laid di lumandu sid karaatan.

II. Nunu-ka i gorija om piumpugan dot ulun Kristian?

Isai-nopo i mangasip dot i Kristus Yesus nga Tuhan om Mananggung, banalko kiguna iti duaton diti. Tu kodungko *asanganu tokou di Kristus* (2. Kor. 5,17; Rom 8,1; Fil. 3,9; 1. Kor. 15,22 om Efes. 1,4), tantu nokopiamung-no sid guvas di Kristus, ino-no sid gorija. Atag dot it ulun kaharati di kobuatano kondiri do Kristian iosido om elaan dau it inantadon di gorija iadko turunan dau om ohondom it usul do gorija.

Ipat-ipat it ulun ko tumpuk, suvaiko elaan om kaharati dit inantadon dau om elaan dau mongoguna i dau do bantuk. Pengkaa dino it ulun Kristian, tu i kogunaan dau antad sid kobuatano om gama do gorija. It ulun Kristian amu mopud sid puru do bai iosido o sid puru dino, inoi nga nakamung iosido sid piniizaan do gorija, gam iosido dino, nga sambahagi do gorija di Kristus dit aso tinganan iduon ko sodirizon. Ino-no rontob, ong monodiri om humarati tokou di kogunaan do gorija, amu mongimpa tokou ko momorisa di kobuatano do gorija didino, i PCS ko BCCM ko i RC, inoi nga mogihim tokou sid Kitab dot Osusi. Sabap i Kitab Vagu ot undang-undang do gorija. Sabap sid Kitab nakavalang-no om nakatarang-no do sionngo antad i gorija, kuran i kobuatano do gorija om nunu-nopo i tugas di piniizaan dot ulun Kristian om i kosungguvo do gorija. I Kitab pogili om mangahatul di ralan do gorija om i hoturan sid tanga ralan om i kosungguvo om rikoton dino ralan do gorija dino. Ong onsizon tokou ino duaton diti, mad apat it ongovazaan manarang di kobuatano do gorija sid Kitab dino, ino-no

1. I gorija, ino-no i bansa do Kinoringan

I nokogulu kentahan sid Kitab, ino-no, i gorija ajadi do bansa do Kinoringan. Iaditi laid i harati sid Kitab Laid, hiza dot i Kinoringan minongodim di Ibrahim do pajadi di Ibrahim do bansa vagu. Lobipo atarang ong sid 1. Petrus 2,9-10:

Topot ikou dino i varis di nopili-no om i piniizaan di pakarajaan om i rurungan dot osusi, i bansa do pasok do Kinoringan, supaya mangahabal-

kou-no dit agazo o gamaon do Kiningan, i minongodim dikou antad sid otuvong, posuvang dikou sid kanavahan dit aso kerad, ikou diri okonko bansa dau, nga nakajadi-no do bansa dau, ka.

Hondomo-no do kuran i panarangan di pongoretan *bansa* sid ayat dino. Tolu linsou o boros di merad o harati: *varis* - songkovorisan sid iso o bansa. *Bansa* - okonko i hal do kopomorintaan o boroson, inoi nga i hal dot iseso ot inantadon ko turunan, iseso ot undang-undang om adat om usul. *Rurungan* - it ulun dit iseso o turunan om inintoronon. Sid ayat 10 nenduvaan noboros *o bansa*, to posodiri i bansa do Kiningan om it ongobansa vokon. I pongoretan bansa, ong sid boros Ibrani, nga *AM*, ino-no i bansa di dang Kiningan, om iri-ogi *GOYIM* ino-no ulun dit okonko bansa dot Israel, it amu koduzan sampai osodu antad sid Kiningan. Manjadi pentahan i Petrus dot i gorija, ino-no i bansa dit anaru ot usul di kigamut sid Kitab Laid (Ibrahim). Ino-no i gama di Petrus pokogos di gorija sid a-ko piro ayat sid Kitab Laid: Kolobusan 19,5; Yesaia 43,20 om 61,6)

a) i vazaan do Kiningan manapul di bansa dot Israel -minsanko nenhigangan dit ongoulun dot Israel- kakali dot opud, ino-no i gorija o kosunuan di bansa dino (Gal. 6,17)

b) I piniizaan vagu di jinadi di Yesus Kristus (UR 2) nakavantai sid origi, ino-no i Kristus sampai jinumadi do valai do Kiningan om nokotungkus di ngaran om pangkat om kogunaan di bansa do Kiningan. Sid gorija o kembulazan dit umba do Kiningan sampai i gorija ajadi dot Israel vagu, i kumavid om mongolombus di barakat do Kiningan sid ulun vokon.

c) I gorija inantakan dit Israel di gulu antad kavi sid kinopomilian do Kiningan (1. Petr. 2,10: *ikou dino dit okonko bansa dau diri, nga nakajadi-no do bansa dau*). Kondiri di Kiningan o minomili di gorija do bansa dau. Sabap ino, anangan i gorija di boros sid Kitab Laid dot,

Ulangan 7,7-8: Okonko i kosopoho-nu mantadko it ongobansa vokon ot tinomod do Kiningan manamod dikau om momili dikau. Tu otopotko ikau o bansa dot otigas banal. Inoi nga antad sid kinasamadan do Kiningan ot inanu-no om antad sid sumpa sid angaki-nu o gama do Kiningan mangagazad dikau palabus om manapul dikau antad sid kinuripanan-nu sid Masir. ka.

I bansa di pinili do Kiningan sid saralom di kovosihan dau, ino-no i bansa om piniizaan di sid tanga do ralan (Ibrani 13,13-14): *Aso't intoronon tokou siti*

dot atatap, topot ihimon tokou-no it ulion di rumikot-ogi). I gorija masi sid lamas ko sid tanga ralan dot amu avagat i boboon, supaya oruhai o kolombusan. Ihimon di gorija i rikoton om i bandar di noumpai do Kinoringan (Ibrani 11,10): *I Ibrahim diri minonginud-no di pomogunan dot apapag dot i Kinoringan kondiri o poturug sampai mongurug*. Ino-no o kasandatan di boros dino, I gorija koponong sid kosopulan it antad sid Tuhan. Sabap ino, i piniizaan do gorija mongohondom om mongiro di hiza do penlaid, tu ino-no o rikoton om kosungguvon dau. Aso kiroon do gorija di bai didino. Okonko i hoturan do porinta biano ko it ongokiroon biano ko mansahari do miabal dit ongohoturan dit ongorombongan vokon o tomodon. Sabap i gorija, ino-no i piniizaan di varo rikoton, pasasi sid vokon di kohormatan di rumikot-ogi om mongintutun di kobuatano biano dit amu atag sid sahu di kanavahan di rikoton dau.

I piniizaan dot ulun Kristian amu mopud sid kondiri dau, inoi nga i kopolisan om kopudan dau inanu om inontok i kokuasaan di Tuhan di nogulian om i Tuhan di rumikot vagu, i minonori di kapatazan om i pinorikot di kopolisan dit aso kengkadan om i kabanaran om i karajaan do Kinoringan.

Kakali sid tanga ralan i gorija, amu-po miuma om amu-po arangkap i kobuatano biano, inoi nga monginud i gorija di kapamanaran di bansa do Kinoringan, i hiza di kembulazan di kohormatan di Yesus Kristus (1. Petrus 5,10-11):

I Kinoringan, i puun di sokoviai i kovosihan, i minongodim dikou posuvang sid kohormatan dau di sampai penlaid, avazaan-kou-ogi dino do kapagasan di baiko oduruk, iosido dino o mangatag om pakansang om momihot om monungkod dikou. Iosido-no dino o sanganu di kuasa sampai penlaid.

Suvai kaharati tokou dino tolu i vazaan dino, ino-no it usuran dot Israel, i piniizaan di didino om i rikoton tokou sid kohormatan om kagamit tokou-ogi di kobuatano om i suromo di Gorija di Kristus.

2. I gorija, ino-no i guvas di Kristus

I gorija inuji-no sid Kitab iadko guvas di Kristus. Ino pamarasan GUVAS mad posondot banal di kobuatano do gorija dot antad sid Sundu sumurut, migagama-gama ko mioopud-opud i gorija om kiguna-ogi i guvas dino sid vokon. Okonko bai tomod masi. Ong guvas okonko bai iso-no, inoi nga ogumu di nokopioput om miululung om mikakapit-kapit dot iso-no o tomodon om kogunaan. I guvas, ino-no kopiizaan. Pengkaa dino, Ong i Kristus iso-no, i

nogulianan antad sid ulun minatai, nga i guvas dau di nogulianan, ino-no i puku di piniizaan dit ulun Kristian. Sid guvas dau nokopiizo tokou kavi, nakamung sid di Kristus. It onsi banal di pongoretan GUVAS ong boros Ibrani = i kondiri. Manjadi ong sid gorija harati, i tokou nga bahagi di Kristus kondiri. Iadko it ipat-ipat it ulun dot Israel nakamung sid bansa do Kinoringan, ino-no Israel, nga it ipat-ipat it ulun Kristian nga koburuo di Kristus. Ong sid panarangan di Paulus, sondulu, unturu, palad, longon, hakod, karam, kazab om nunu-nopo it ongokoburuo do guvas, obuk, odung, tolingo, mato antawa bai bongit, nga koburuo om bahagi do guvas.

Manjadi i nokopiluluzung sid di Kristus, duvo-no o kosondoto, Keso, i Kristus, ino-no it ovud do kopolizian om kesaan do gorija. I Kristus o pakansang di guvas. Iosido o popizo dit ongokoburuo di tasantanid-tanid o kogunaan om kobuatano, supaya iseso o gama om iseso o rikoton. Non-gokosokot it ongokoburuo sid di Kristus. Iri-ogi, I Kristus, ino-no i ulu di guvas dino. I guvas dit aso't ulu, mad bai buntung-po dit aso guna. Manjadi i kopudan di guvas antad kavi sid ulu, ino-no i Kristus.

Varo-po suntuan dot i gorija iadko sovoon di Kristus. Ino-no o harati, i gorija nokoho dot ensanan manamod om sumuhut om monumbozo di Kristus sampai i kakal-po sitid tanga do riniba, mongontok di Kristus iadko guvas koduvo dau.

I gorija ino-no i pakakas di gama di Kristus manapul di songriniba. I gorija, ino-no i palad, kabang, hakod, boros di Kristus. Iadko i kakal-po riniba i Yesus diri, i gorija najadi i guvas dau sid tanga do riniba. Sid gorija nokoriniba i Yesus Kristus. I gorija mongovit di Habal do Kovosihan, pembulai om polombus di samod do Kinoringan, pendongou dit ensanan i riniba di kogozoo di gama do Kinoringan manapul di songvinangun. Sino dino nokosokot i harati di duvo i pongoretan do Yunani: Katholika -it ensanan, om Apostolika -it antad sid ongorasul. Boros di Paulus sid Efes. 1,3

I gorija ino-no i guvas di Kristus, i kotulukan di monuluk di sokovia i nunu-nopo, ka di Paulus.

I gorija kiguna sid songriniba. Sid gorija o kembulazan di sokovia i kovosihan do Kinoringan ponong sid riniba. Aso't elaan di gorija do sodirizon-po ong bansa, pomogunan, turunan ko rurungan. Tu sid Kristus, tantu aso sodirizon-po vagu di Yahudi ko Yunani, uripon ko bebas, kusai ko ondu (Gal. 3,28)

Aso-no pitonidan-po vagu dot ulun do Yahudi om Yunani. Aso-no bida-po vagu dot uripon om bebas. Aso-no bida-po vagu do kusai om ondu, tu ikou dino sokovia najadi-kou-no dot iso sid Kristus Yesus, ka.

Katholika, ino-no o harati, ensanan songriniba. Manjadi i gorija okonko baiko

popiizo di sokoviai it ongoulun antad siombo-nopo di tasantanid-tanid o bansa, kulit om boros, elo ko a-nokosikul, lumundu ko mosikim, inoi nga i gorija tumorima kavi it ongoulun sid dau om dau do kavazao dot amu mongiro-po do mongoguna dit iso om monginsibak-po do koduvo. Gam i gorija momompon banal di tasantanid-tanid i kavazao dot ulun, supaya riniba ioti kavi isuhut di kovosihan do Kinoringan dit antad di kinotimpunaan manaud di nunu-nopo i talenta om kosodirizan dot ulun. Kagi ino pongoretan katholika momihot om mangalapis do nakamung sid gorija "it agazo o kavut dot ongosasi" (Ibrani 12,1) di nokolimput sid di tokou. Sid gorija nakamung it ongogulu diri om mamung-po i sid tohudi-po, okonko bai popiizo i gorija dit ulun Kristian di didino mizau. I tokou nga nakamung sid ensanan it ulun Kristian di gulu om biano, tu iti-no kavi bansa do Kinoringan om guvas di Kristus. Amu osodiri i hiza di didino om i kodori-no ko i tohudi-po. Tanid-poko ino i gorija asot elaan do rontobon. I gama do gorija sid iso pomogunan, nga gama di songgorija do sompomogunan. Iti-no o sabap dot atag dot elaan dit ongoulun Kristian i katamanan om kosusaan di sokoviai it ongokristian vokon, tu i kosusaan dit iso-no, nga kosusaan di sokoviai.

Ong i pongoretan APOSTOLIKA ino-no o harati, i gorija suvai gorija ong andaman i tugas dau. I gorija suvai hakod, longon, palad, mato ko munung di Kristus ong kopitoguvang dit ongoulun vokon di Kristus sid gama om kobuatano tokou di mad munung, kabang, hakod ko longon di Kristus pembulai di samod do Kinoringan. Antad sid tudukan di Sundu dot Osusi om i kakansangan dau posurut i gorija di gama di Yesus, dot iti-no o gama, mangahabal om pazazad di kovosihan do Kinoringan, povozoon di gama di Yesus monulung, manapul, mananggung di riniba (Yahya 20,21; 13,35; 17,18; Mat. 28,18-20; Lukas 24,45-49; UR 1,8). Sabap ino, asot elaan di gorija do varo-po volit ko rontob dit a-katalib ko kotupak. Aso pomogunan, bansa, boros, kulit, ulun di tanid ot ugama. I gorija ino-no i pakakas om vaza di Kristus do mongontok di Kristus sid tanga do riniba di siombo-nopo. Sabap ino, i gorija okonko mintoron ko mizon sid siombo-nopo om sumodiri, inoi nga jumadi do piniizaan di monozupo diti riniba om mongingut di riniba mozo sid ralan kakaa sid karajaan do Kinoringan.

3. I gorija, ino-no it inintonon di Sundu dot Osusi (ko valai di Sundu).
Sid 1. Kor. 6,19 pomoros i Paulus dot, *A-ka elaan dikou dot ino guvas dikou o valai di Sundu dot Osusi, i notorima dikou antad sid Kinoringan om mizon-izon sid dikou sampai okonko dikou ino guvas dino?* ka dau om sid 1. Kor.

6,15: *Ikou-no dino koburuo di Kristus*, ka dau. Pengkaa dino sid Efesus 2,14-22 om 4,16 ko 1. Kor. 3,9: *i gorija, ino-no i valai do Kinoringan ko valai di Sundu dot Osusi*, ka. Kagi, sokovia i panarangan di Paulus kananganko i Sundu dot Osusi sid 1. Kor. 11-14, ino-no o kosondoto dau, I Sundu dot Osusi, nokezon-no sid gorija. Suvaiko noluhungan di Sundu dot Osusi om jumadi-ogi i gorija do valai di Sundu dot Osusi, ko valai do Kinoringan. Manjadi, i retan do muvalai, ino-no o harati, Amu-po nopongo i valai dino, kakali nokoturugi, kakali pigagama sampai i gorija mad tumabang di Kinoringan muvalai (1. Kor. 3,9-15 om Efes. 4,16):

Antad sid Dau o kopioopudan di piniizaan di guvas om i sokovia it ongo-piuhalan di noginonggoi. Ipat-ipat i koburuo dino nga kiguna kavi sampai kumansang-no i guvas sid samod, ka.

Manjadi duvo-no o kasandatan, varo-no ong nagama laid om varo ong kakali murut-surut. Ong engkod-no i tugas do gorija, mad nopongo-no i valai sampai nokotimpun-no i kotulukan di gama sumambayang sid kovian (Mat. 27,29 ...*sampai it adau di kenuman tokou vagu sid karajaan dit Ama-ku*, ka di Yesus. Suvai sid karajaan do Kinoringan om opongo-ogi i gorija i iadko valai. Manjadi sid pialatan do Pentakosta (UR 2) om i korikatan vagu di Yesus Kristus sumurut-no i gorija i iadko muvalai do jumadi do suntuan sid karajaan do Kinoringan ko it intoronon do Sundu dot Osusi.

Sampai i kinorungazan di panambayangan sid Yerusalim (TM 70) kiniro dit ongoulun dot Israel dot ino valai dino, ino-no ot inintonon do Kinoringan. Topot boros di Paulus, i momihot iosido di noboros laid di Yesus, Okonko i valai banal, inoi nga i piniizaan dot ulun, ino-no ot intoronon do Kinoringan = i gorija, ino-no i pinizanan do Kinoringan om i Sundu dot Osusi, ka. Yahya 2,22 pavalang i Yesus dot iosido-no o mongontok di panambayangan om ajadi do panambayangan dit ulun Kristian. Ong i kakal-po tumoronong it ongoulun Yahudi sid panambayangan diri, tu tumoguvang do Kinoringan, nokopomoros-no laid i Yesus dot iosido-no o vazaan sumamba sid Kinoringan, iosido om i Sundu dot Osusi. Imatai Yahya 4,20 Boros di Yesus, *varo hiza do rumikot do sumamba-kou sid Ama, nga okon-noko sid burul dino om okon-noko sid Yerusalim... suvaiko sumamba sid saralom do Sundu om sid katapatan i gama dau sumamba*, ka di Yesus.

Sid Injil di Yahya varo pongoretan I JAHAM DI RUMIKOT, retanko i kinapatazan om kinogulianan di Yesus (Yah. 13,1 om 16,32). Pinavalang di Yesus do suvai korikot i Sundu dot Osusi om atalahas-ogi i kobuatano dau diri (16,12-15), Manjadi siri-no atalahas-no dot i Yesus ino-no it inintonon do

Kinoringan om i Sundu ino-no i ralan do kopitoguvang di Kinoringan om i riniba. Varo-po boros di Petrus (1. Petr. 2,5) dot it ongoulun Kristian iadko i vatu sid rinding di panambayanan do Kinoringan. Manjadi ong kodung i Kristus o valai ko inintonon di Sundu do Kinoringan om siri kopitoguvang di Kinoringan om i riniba, i gorija, nga mintalang-no dot inintonon ko inizonon do Sundu dot Osusi, tu sid kobuatano dau om i gama dau pengilo i gorija di songriniba di siombo-nopo o kadapatan sumamung om tumoguvang sid Kinoringan, ino-no sid di Yesus Kristus.

Manjadi antad sid mivaris do gorija om i Sundu dot Osusi najadi-no i gorija do piniizaan dot Osusi. Sabap ino i gorija inanu-no do Kinoringan dot uripon om pakakas dau mongolombus di Sundu dot Osusi sid ongoriniba, tu ipanapul dioti.

4. I gorija, ino-no i institusi ko perusahaan

I gorija okonko baiko hal dot osundu om hal dot ulun, inoi nga kionsi om kikobuatano do dang riniba. Ino-no, varo kagaman, varo't undang-undang, varo hoturan, kosungguvo, varo kengkakatan om varo korotuan iadko it ongopiniizaan om rombongon vokon sid tanga do riniba. Amu osodiri i gorija antad sid ongoperusahaan vokon. Minsanko ong otopot-no i gorija, nga ino-no i piniizaan dot ulun om okonko barang ino, kakali varo kobuatano dot atantu sid tanga do riniba di miabal di kobuatano do dang riniba. It ulun vokon memot om mongimot di kobuatano dino: UR 2,46 I piniizan dit ongorasul minong-imbulai sid gama dioti miuumpug sid panambayanan om misosombol-sombol momonginakan sid ongovalai dot otomon o ginavo, ka dit usul sino.

I gama dioti miuumpug jumadi do perusahaan dit emoti om oubas o gama miizo. Varo-po hal vokon di manarang do varo ahatul-no kavi i gorija diri. Ino-no, nopili di Tuhan Yesus i hopod om duvo i rasul, isuhut di kogumuo dit ongorurungan dot Israel. Ioti o pongonuvan dau do pojodizon i gorija do iadko lugu ko gamut do gorija. Iri-ogi i gama di Yesus monuhu do mongoguna di poginakanan dau, inanu dioti do hoturan sumambayang soumul-umul, om i ponuhu do mamanan sid pentongkop do pomogunan do pazazad di Habal do Kovosihan om i gama momodsu om monuduk dit ongoulun sid ngaran dit Ama, Anak om Sundu, jinumadi do hoturan di gorija do iadko i hoturan do rombongan om pertubuhan vokon.

Minsanko i Sundu do Kinoringan o mangagazad di gorija, kakali i gorija okonko sid pialatan dot avan om tana, inoi nga sid tanga do riniba sampai mad kionsi o kobuatano. Sabap ulun mangahatul om ulun monumbozo sampai boros

om gama dot ulun o posurut di suhu do Kinoringan. Sabap ino, alanta banal i kobuatano do gorija sid pialatan dot ulun. Ino-no rontob, minsanko sid tanga do riniba, i gorija amu koluu di vaza do riniba om amu sumuhut di koubasan do riniba sid nunu-nopo, inoi nga andaman di gorija dot agazad iosido di Sundu dot Osusi om engat i tomodon sid pomogunan sampai posurut di tugas do sumasi di karajaan om hoturan do Kinoringan di rumikot-ogi sid tanga do riniba. Sabap ino, it oruntut di gorija sid tanga riniba dino, ino-no, Bansa do Kinoringan, i gorija om guvas di Kristus om valai do Sundu dot Osusi dot otorontog banal i kobuatano dau dino.

Ong onsizon tokou vagu dot, Nunu-ka i gorija, ino-no o timpa dot onibak, I gorija, ino-no i kinogumuai dot ongoulun, ondu, kusai antad sid tasantanid-tanid ot ongovazaan dot amu osodiri-po do bansa, kulit, pomogunan, kolunduan ko kelaan. I gorija, ino-no i piniizaan antad sid sokovia i it ongorurungan, boros, pomogunan om bansa. Ino-no it ongoulun di kinodim do Kinoringan antad sid otuvong, iposuvangon sid kanavaho do Kinoringan, gima i Sundu dot Osusi o avazaan di kovosihan do Kinoringan di nembulai-no sid di Yesus Kristus, it Anak do Kinoringan, i minanapul dioti. I gorija, ino-no i guvas di Kristus, it inintonon di Sundu dot Osusi, i bansa do Kinoringan, i kakalpo sid tanga diti riniba om nunu-nopo it ongokosusaan om kosinangan diti hiza di gulu, biano om rumikot-ogi. I gorija, ino-no it ongoulun di nokodim. Manjadi nunu-ka i tinomod do Kinoringan mongodim dioti? It timpa di duat diti, iadino:

III. I TINOMOD OM PANANGAN DO GORIJA

1. Kor. 1,9: *I Kinoringan minongodim dikou (antad sid kotuvangan) posuvang dikou sid piniizaan dit Anak Dau Yesus Kristus.* Iti-no i gorija, it ongoulun di nokosuhut-no di kodim do Kinoringan sampai atatap ioti monumbozo. Manjadi nunu i tinomod om panangan do Kinoringan mongodim?

1. I tinomod om panangan di kodim do Kinoringan

I gama sumamba sid Kinoringan ot gulu banal o hal di tinomod diti.

Efes.1,6: *..supaya mongindazou tokou di kalabao di kovosihan Dau, ino-no i samod di nitahak Dau sid di tokou, gima i sinamadan Dau, ka di Paulus.*

Ensanan i Kitab Vagu manarang dot it agazo o tomodon do gorija, ino-no, i gama mangarazou om mongohormat do Kinoringan. I sokovia i kavazao do gorija, ino-no susumamba sid Kinoringan. Pengkaa dino i boros di Paulus sid Rom 12,1:

Mindamo-oku dikou ot ongoobpinai, gima i kobinsianan do Kinoringan, patahako-no i guvas dikou do persembaan di mizau om osusi om ikozi do Kinoringan, ino-no ot apatut om atarang o padsamba dikou, ka.

1. Petr. 2,5: *Ikou dino iadko vatu di mizau, pokituridong-kou-no do valai dot osundu om piniizaan dot osusi, supaya kasamba sid Kinoringan do persembaan dot osusi, gima i Kristus, ka.*

I gama sumambayang, ino-no i gama dit a-milo-milo nga osuhut ong ulun dit osopulan di kovosihan do Kinoringan. Sid Zabur 107,2 oonsug it ongoulun di nosopulan momoros dot,

Monorima kaseh-kou-no sid Tuhan, tu avanus iosido om i koruhunan dau, nga amu engkod sampai penlaid, ka.

Pengkaa dino it duvo nopod om apat it ongoulion mindolongoi sid Kentalangan 5,9 dot,

Ikau-no ot apatut manganu di Kitab dino om mamabak dit ongotumbuk dino, tu ikau-no o pinatai om ino kinapatazan-nu o minanapul di sokovia i riniba dit okonko piro-piro o rurungan om boros om bansa om karajaan, supaya otohungkoi ioti do Kinoringan. Jinadi-nu ioti do karajaan dot ongoulun dit osusi di sumamba sid Kinoringan tokou om pinapangahatul-nu ioti di sompomogunan.

Ino-no o sabap do nopili-no i gorija do piniizaan di mamadsamba sid Kinoringan. I Kinoringan o minangalabus di tokou, supaya oindazou iosido. Iti-no o sabap di boros di Musa sid Faraun do ipalabus dau it ongoulun dot Israel:

Iti-no i boros di Tuhan, i Kinoringan dit ulun dot Israel, Polobuso-no ino bansa-ku, supaya ohormatan-oku dioti sid tanga do belantara, (Kolob. 5,1)

Om iadino i gama dit ongoulun di nokotindal antad sid kapagasan om kosusaan dit ahatul sid Kentalangan 7,14-15; 22,3:

Ioti dino nonong dot indorosi dot ahatul om nohugusan it ongogaun dioti om nosiliu dot opurak, gima i raha dit Anak do Domba dino. Ino-no i sabap dot songingkakat ioti sid tinoguvangon dot ogomon do Kinoringan om sumamba ioti sodop adau sid valai do Kinoringan, ka.

Manjadi i gama sumambayang okonko bai tomod dit aso panangan, inoi nga kogunaan do gorija dit aso kerad.

a) I gama pazazad di Habal do Kovosihan.

Ong nokodim-po do Kinoringan i gorija, ino-no o tomodon, Pazazad di Habal do Kovosihan. Iadko i boros di Petrus sid ongoulun di sid tanga dot ongoulun vokon 1. Petr. 2,9:

Ikou dino varis di nopili..., supaya mangahabal-kou-no di kogo zoo di ginama do Kinoringan, i minongodim dikou antad sid otuvong, posuvang dikou sid kanavahan dit aso kerad, ka.

I pongoretan MISSION (Inggeris) antad sid boros Latin ko Rom MISSIO, ino-no o harati, monuhu mamantau ko papanau. Yahya 20,21 varo boros di Yesus dot, *Iadko it ama-ku minonuhu dohon o gama-ku monuhu dikou, ka.*

Ong sid Kitab Vagu i pongoretan do Yunani APOSTOLLOS = rasul = papanau ko porikot o harati. Varo monuhu mongontok dit ulun di monuhu sid rikoton dau. Na i ponuhu ko susuhuon dino, retanko rasul ko missionari. Sid Injil Yahya kondiri di Yesus manarang dot ingapat nopod kaboros dot iosido dino ponuhu do Kinoringan. Ong sid ensanan i Kitab Vagu inghatus om tolu nopod om limo varo monuhu mongontok di monuhu om invalu nopod do papanau o tomodon. Na it onsi dino gama papanau, Poguluvon di Kinoringan, it Ama monuhu di Yesus, it Anak mamantau poromut di samod do Kinoringan sid riniba om iri-ogi i Yesus monuhu di kinoruhangan dau do pengkaa dino. Iti-no o sabap do pinungaranan-no ioti do RASUL ko APOSTEL. Topot i tinomod do monuhu, porikot sid ongoulun di Habal do Kovosihan do Kinoringan, do kuran i Kinoringan manamod om manapul di riniba.

Sabap ino, duvo i tinomod om panangan do gorija: keso, i gama sumamba sampai penlaid dot aso kengkadan, minsanko sid karajaan do Kinoringan, nga iri-no ko iri o padsamba sid Kinoringan. Koduvo, i hiza di kakal-po sid riniba, varo gamaon ponong sid ongoulun vokon: pazazad di Habal do Kovosihan, tu pemumui dit ulun dino. It iso nga ponong sid kohormatan do Kinoringan soumul-umul sampai penlaid om i koduvo, monumbozo di suhu (di raja sid Mat. 22,2..) mongodim om mongoligou di sokovia it ongoulun sid karajaan dau, supaya ensanan i riniba oumpug sid poginakanan dot ahatul.

Minonuhu-no i raja dit ongouripon, tu mongoi dit ongolinigou porikot sid mogontong, ka di suriban di Yesus Luk. 14,15 om Kentalangan 19,17.

Manjadi minsanko agazo i pitonidan di gama penlaid mongohormat do Kinoringan om i gama di didino mongodim om mongingut dit ongoulun vokon, kakali ino duvo i tinomod do mad mioopud-opud om misosokot-sokot. Tu sid Kitab Vagu, suvaiko onong i gama sumamba sid Kinoringan ong atarang i gama monginud di vokon, om suvaiko onong i gama mongodim dit ulun

vokon, ong antad sid atarang o gama sumamba om miizo sid tinoguvangon do Kinoringan o kakansango mongingut.

b) I gama popiopud di gama sumamba om mongodim dit ulun vokon.

I kanangan do kopioopudan di gama sumamba om mongingut dit ulun vokon, nga atarang-no sid ensanan i Kitab Vagu. Boros di Paulus sid 2.Tim 4,6 dot,

Kananganko ioku, mad norikot-no i kapasambaan dohon sampai i kapatazan-ku.

Ino-no i kiniro di Paulus, i kopolisan dau iadko i susumamba, ko i gama dau pahabal di kovosihan do Kinoringan, nga irii. Ko sid Rom 1,9:

I Kinoringan o sambaan-ku sid saralom di ginavo-ku di mangahabal-oku di Habal do Kovosihan dit Anak dau... ko sid Fil. 2,16-17:

Kumavid-oku-no di boros do kapas. Ino iadino dino ajadi dot ipokindazou-ku ontok dit adau di Kristus dot amu porosuma i gama-ku manangkus om amu porosuma o gama-ku magavi, ka.

Kiniro di Paulus it ongoulun di niamung-no sid gorija iadko kouvaan di gama dau do rasul iosido. Rum 15,16 varo boros dau dot,

tu i Kinoringan pajadi dohon do susuhon di Yesus Kristus sid ongoulun do labus om posurut-oku di gama dot osusi, o ino-no pahabal-oku di kovosihan do Kinoringan, supaya kipersembaan-oku dit onong i kenginan do Kinoringan, ino-no it ongoulun do labus di poulion-ku sid dau, tu nosusi-no di Sundu dot Osusi.

Om i gama minta dua dit angaki dau, kiniro di Paulus do kapanambaan 2. Tim. 1,3

Monorima kaseh-oku sid Kinoringan, i sinambaan-ku antadpo dit angaki-ku dot otulid o ginavo sumamba. Sodop adau mongohondom-oku dikau sid saralom di gama-ku minta dua, ka di Paulus, ko inimuhun-no dau it ongoulun sid Rum dot,

"gima i kobinsianan do Kinoringan do patahak i guvas do persembaan di mizau om osusi om ikozi do Kinoringan, tu ino-no ot apatut om atarang o padsamba dikou, ka dau (12,1-2) ko sid Fil, 2,17 I kosipan dikou nga persembaan di kamung sid persembaan om sambayang.

I Samod dit ongoulun sid gorija sid Filipi, nga pinungaranan-no di Paulus dot, *persembaan dit onong sid kenginan om kozian do Kinoringan, iadko avau dot ovongi, (4,18)*

Topot okonko bai i Paulus manarang di tugas do gorija sid gama sumamba. I surat Ibrani om vokon, varo iadino, Ibrani 9,14:

I raha di Kristus o koponusi di purimon do ginavo tokou antad sid

ongogama dot aso tantu-tantu, supaya kadapat tokou sumamba sid Kinoringan do kapasi.

I gama di Yesus o monusi di pongitungan dit ulun Kristian, supaya kedu i sokoviai i kiroon do mad kondiri dau o kadapat di kosopulan om ensanan it ulun Kristian nga osodia o ginavo om gama do tumorima kavi di kakansangan antad sid Kinoringan. Ibrani 12,28:

I tokou diti, tu i karajaan dit amu milod guguron o torimaon tokou, monorima kaseh tokou-no banal, tu iadino o vazaan sumamba sid Kinoringan, dit ikozi dau, sampai obingronok om obingrosi tokou, om 13,15-16: Manjadi pasamba tokou-nopo do persembaan sid Kinoringan, gima i Yesus, do mongindazou tokou dau, o ino-no it uva dit ongomunung di sumasi di ngaran di Yesus. Kadan-no polingan dikou i gama monulung om i gama posurut di piniizaan. Tu ino iadino dino nga mad persembaan dit ikozi do Kinoringan.

Pengkaa dino ong i Yakub 1,26-27:

Iti-no it otopot o gama sumamba sid Kinoringan it Ama dot alus om atatap o vazaaan. Monorundakai dit ongousan-usan om it ongobituanon di sid tanga do kosusaan om manangkis di karalazan diti riniba, ka.

I rasul Petrus o popiamung di hal do kasambaan om i hal do mission om manarang dot i mission, ino-no o hal dit a-milo-milo varo sid gorija (1. Petr.2,5..)

Ikou-no dino.. o piniizaan dot osusi, supaya kasamba sid Kinoringan do persembaan dot osusi, gima i Kristus - 2,9) supaya mangahabal-kou-no dit agazo o gamaon di Kinoringan, i minongodim dikou antad sid otuvong, posuvang dikou sid kanavahan dit aso kerad, ka.

Manjadi momihot i Petrus dot aso tanganan monodiri-po di gama sumamba om i gama pazazad di Habal do Kovosihan, tu enizo o gama dit ipoguna do Kinoringan. Topot okonko bai inot ot atag dot ohondom, inoi nga i kosungguvo di gama sumamba di gorija it amu milod kiroon. Suvai sodirizon tokou ino duvo i kavazao di gama sumamba sid Kinoringan, ino-no, keso i kavazao di gama suvab-suvab om i gama sumambayang ontok dit adau Minggu, ino-no gama miuumpug dit ongoulun di mangasip, tu mangarazou, monorima kaseh, mongohormat, mangakun di kasalaan, mongontok minta dua, sumasi om mongimuhun, tumatap sid gama sumasi om momihot di kosipan sampai mokituduk di Kitab.

Ong i keso o gagamaon di suvab-suvab, nga sinod kopoulosan dit ipat-ipat it ulun Kristian ot ajadi hiza do kikoruhang iosido, ino-no i sumombol iosido sid ulun vokon, i monulung iosido di vokon om pemot sid vokon dot ohoturan-no i kopoulosan dau di pinonuhuan do Kinoringan om i samod do Kinoringan.

Tanid-poko ino, it ulun Kristian minta dua om sumambayang sid ongkob dau kondiri iadko mamasa do Kitab, om nunu-nopo i iadino i kembulai sid valai dau. Ong sumambayang ontok do Minggu, ino-no sid tinoguvangon om umpug dot ulun, okonko osodiri ko iseso it ulun Kristian. Suvai miopud miduvo-duvo ino dino om kiguna-ogi banal. Ong bai it iso o mopud, mad aso kopudan om asot ontok.

Ong hiza do minggu, it ipat-ipat it ulun Kristian dit iseso hiza dit adau keso sampai konom sid dau om dau do valai om gamaon, nga mamung sid piniizaan, supaya opurimanan dot okonko iseso iosido. Kopizo ioti kavi sid piumpugan, tu i kohondom dot minsanko bai ioti nga sambahagi sid gorija di sompomogunan. Manjadi it umpug dioti okonko bai tomod tiumpug, iadko koubasan dit ongoulun vokon, iadko tumpuk mimbola ko tumpuk mintikam ko miinum, inoi nga it umpug dit ongoulun di kinodim do Kinoringan om it nosusi-no di Sundu dot Osusi, varo tomodon om panangan, iadko i boros di Paulus sid 1. Kor. 1,2

..mongirim-oku diti surat sid piumpugan do Kinoringan i sid Korintus, sid ongoulun di nosusi-no di Kristus Yesus, i nosusi, tu nokodim, sampai sid sokovia i it ongoulun di mongodim di ngaran di Tuhan tokou Yesus Kristus i sid siombo-nopo i pomogunan, sid dioti om sid dahai, ka di Paulus.

Kagi impihatan-po i kobuatano do gorija biano dot okonko tomod i varo gorija. Agazo o tomodon do gorija, ino-no, pazazad di Habal do Kovosihan. Iti-no o sabap dot i gama sumambayang nopungaranan-no dit ongoulun Kristian di gulu banal dot, GORIJA = it umpug di dang Kinoringan, ka, om MISSA = it umpug di nosuhu-no do Kinoringan pazazad di Habal do Kovosihan.

I pongoretan GORIJA, varo duvo ot inantadon, EKKLESIA = it umpug di iningutan, om KYRIAKE = i dang Kinoringan (ong sid Inggeris CHURCH iadino ot inantadon).

Ino pongoretan EKKLESIA (Yunani) inanu sid Ulangan 4,10 Boros di Musa, *Popuhondomo-no it anganak-nu i hiza di songingkakat tokou sid tinoguvangon do Tuhan Kinoringan sid harason di burul Torsina. Tu sino-no o boros di Kinoringan sid dohon dot, Popiuumpugon-no kavi i bansa dino. Engin-oku dot ipening dioti i nunu-nopo it imuhun-ku, supaya misingilo ioti do sumuhut dohon om monuduk ioti dit anganak do sumuhut dohon, ka di Kinoringan diri, ka di Musa.*

Ong sid Kitab Vagu, i gorija okonko umpug iadko it ongoumpug vokon do baiko gagamaon ko kopomorintaan ko upakatan do midagang ko mutanom, inoi nga umpug do mamadsamba sid Kinoringan om umpug dit ulun di mangasip.

Sabap ino i gorija, ino-no o kosondoton: i piniizaan dit ulun di sumamung di Tuhan, it ongoulun di nosopulan di Tuhan, i mongohondom om mongoguna om mongimbulit di nagama di Tuhan, i nunu-nopo i nokembulai sid Habal do Kovosihan. Okonko bai tomod miuumpug it ongoulun di mangasip, inoi nga miuumpug, tu mongohondom di tugas ponong sid ulun vokon, ino-no ponong sid songriniba. Tu ioti kavi nosuhu-no do mamananau ipangahabal om ipazasad dioti i samod do Kinoringan. Iti-no o sabap dot i ngaran koduvo dit umpug kodori diri, ino-no, MISSA, ino-no o kosondoto, Umpug dit ulun di nosuhu do Kinoringan. I gulu diri, kodungko opongo-no sumambayang, varo boros dot:

Boros di Yesus, mangahabal-kou-no sid sokoviai it ongobansa di vazaan muli sid Kinoringan om i kaadaan do sala sid saralom di ngaran di Kristus. Tu ikou-no dino o sasi di sokoviai i nongojadi dino, ka di Yesus (Luk. 24,46-53)

Sabap ino, i gama sumambayang ontok do minggu banalko agazo o kanangan bahagi di mission, tu pakansang dit ulun Kristian papanau.

2. I tolu i kobuatano di tugas do gorija.

Ong okodim-no i gorija mamung sid gama di Yesus do mongingut di riniba, tantu ino-no o vazaan,

Pamanau-kou-no om siliho-no dikou i sokoviai it ongobansa do koruhangu, dot ino-no i gama dikou, Podsuon dikou ioti sid saralom di ngaran dit Ama om it Anak om i Sundu dot Osusi om tudukan dikou ioti di sokoviai i nongokemuhunan-ku sid dikou diri, ka di Yesus Mat. 28,18-19.

Manjadi ino gama do iadino, mad tolu-no o kavazao di gama sumambayang sid tinoguvangon do Kinoringan. Ong i Petrus manalahas dino iadko tolu o vaza sumambayang, tu sid gama sumambayang varo bahagi di kazazadan do habal do Kovosihan, iadko i gama do NABI. Varo-po bahagi mongontok di riniba sid tinoguvangon do Kinoringan iadko IMAM (ko ong isuntu sid ugama laid do Momogun bobolizan, i mongolintanga dot ulun om sundu) om varo-po iadko suntuan bahagi di vokon iadko it ULION om iadko i raja. Sino-no atarang dot i gama om i kovongunan do gorija nokopikapit ko iadko duvo o vuos di miampaping di sangalad-no o siin. Ong otopot, minsanko ino tolu o kavazao dino di napakai sid Kitab, bai vaza manarang di kobuatano di Kristus dit aso tinganan manarang dot arangkap om opusok o panarangan.

Varo boros dit ulun di borontuvilon dot, Aso gorija vokon tanidko i gorija di nosuhu sid sompomogunan. Om aso tugas ko mission tanidko i tugas om mission di gorija di Kristus. Ino-no o pasandatan: i gorija dit amu pamaju di gama di kovosihan om samod do Kinoringan okon-noko gorija-po. Antawa i

tugas om mission dit amu posuni om posurut do gorija, ino-no mad aso kanangan.

a) I kobuatano di mad nabi i gorija.

Pinili-no di Kinoringan i gorija do piniizaan di pentahan sid sompomogunan di gama do Kinoringan, isai-nopo it amu-po kotutun do Kinoringan. I gorija iadko piniizaan do nabi *mangahabal dit agazo o gamaon do Kinoringan... tu posuvang dit ulun sid kanavahan dit aso kerad* (1. Petr. 2,9) Ino boros dot "tu", ino-no o harati, kavi-avi i noboros laid, nga ponong sid gama posuvang. I kogunaan di gorija di nopili-no om napangkat-no do bansa do Kinoringan, suvai opud om otontuan sid gama mangahabal dit agazo o gamaon do Kinoringan. Kagi-po i gorija suvai atarang o gama mangahabal dot amu gumavul sid kobuatano dit aso tantu-tantu, inoi nga pembulai di kenginan do Kinoringan sid kavazao dau.

Ino pamarasan dot, "it agazo o gamaon do Kinoringan" manalahas di kosunduvo di kuasa do Kinoringan. Nokosuvang-no sid boros dino i gama do Kinoringan manapul om monobus di riniba. Ogumu i kosunduvo sid Kitab Laid o panangan dino gama mongindazou do Kinoringan (Zabur 33,1-7; 104,1...; Yesaya 42,10-12; 43,21;) Manjadi i gama mangahabal dit agazo o gamaon do Kinoringan, ino-no o harati, pazazad di gama mongindazou do Kinoringan sid tinoguvangon dot ulun. Sid ongoinjil om it ongotudukan di gorija kodori diri atalahas-no dot iri-no ko iri kagazo o gamaon di Yesus ot onsi di nunu-nopo i gama sumasi. Ong i Yahya, kavi-avi it ongotanda di nembulai-no di Yesus ot onsi dit Injil dau. Boros dau (Yahya 20,30)

Manjadi ogumu-po o vokon o tanda do kosunduvo o nagama di Yesus sid tinoguvangon di kinoruhangan dau, it amu nokosurat sid buuk diti. Topot i nokosurat-no siti, nga ino-no i tomodon dot ikou nga mangasipi dot i Yesus dino i Kristus, it Anak do Kinoringan sampai kadapat-kou di koposizan sid saralom di ngaran dau, tu mangasip-kou-no, ka om 1. Yahya 1,13 It nemot-za om it norongou-za, ino-no ot ihabal-za sid dikou, supaya kezo-kou sid dahai sampai kezo-kou di piniizaan dahai sid Ama om sid Anak dau Yesus Kristus, ka.

Minsanko amu nokokondiri i Lukas o sumasi di gama di Yesus, nga kakali do iosido-po o momihot di gama do kosunduvo (Luk. 24,19)

I Yesus dino kikuasa sid gamaon dau om sid boros dau sid tinoguvangon do Kinoringan om i sokoviai it ongoulun, ka di Keleopas.

I Markus manalahas dot i kahabaran di Habal do Kovosihan kopivozo-vozo dit agazo o gamaon do Kinoringan do monguasa dit ongokuasa do rogon (Mark.

1,14, 21-23 om 3,13-15).

Minamanau-no i Yesus kumaa sid pomogunan do Galilea, tu mangahabal di Habal do Kovosihan om minonunsub iosido dit ongorogon.

Ong i Matus popirad di gama di Yesus om i gama do Kinoringan sid bansa dot Israel. Pengkaa dino i Petrus minonuturan sid ongoimam om it ongokatib dot, *ikoi diti aso tinganan dot amu momoros di sokoviai i nemot om norongou-za, ka dau* (UR 4,20)

I Paulus om i Stepanus poperad di gama di Kristus sid usuran dit ongoulun dot Israel (UR 7,2-3; 13,17-41; 26,1-29). Manjadi itit ongovaal diti om i vokon, i sid surat dit ongorasul, nga iso-no o panarangan dot i gama mangahabal dit agazo o gamaon do Kinoringan om i kopoulosan di Kristus banalko miabali om kopisusuhut-no. Minsanko i kobuatano di Yesus, retanko kopupusan di boros do Kinoringan sid riniba, ka (Ibrani 1,2). Nokopivaris om nokopikapit i gama di Yesus om i gama do Kinoringan sid bansa dot Israel, ino-no, antad di kinourugan do pomogunan sampai sid kovian, iseso o kosuruto di gama do Kinoringan. Sabap ino, i gama di gorija di mad nabi a-milo-milod pazasad di sokoviai i kenginan do Kinoringan sid songriniba.

Sabap aso-no nalazan-ku diri, inoi nga nokotuduk-ku-no sid dikou i sokoviai i kenginan do Kinoringan, ka di Paulus (UR 20,27)

I gama pazasad, ino-no i vazaan di kodim do Kinoringan posuvang di riniba sid vangun vagu, di nokembulai sid di Kristus (2. Kor. 5,17). I gama mangahabal posurut di kodim do Kinoringan, iadko i nisurat di Petrus (1. Petr. 22,9-10) *Ikou dino i varis di nopili-no.. supaya mangahabal-kou-no dit agazo o gamaon do Kinoringan, i minongodim dikou antad sid otuvong.. ikou dino dit okonko bansa dau diri, nga nakajadi-no do bansa dau.*

Iadko i gama do Kinoringan monuhu om papanau dit Anak dau, lumombus i gama dino dot i Sundu dot Osusi papanau di piniizaan dau sid sompomogunan (Yah.20,21) Pengkaa dino miabal di kodim do Kinoringan i gorija dau o gama do gorija mongodim dit ongoulun vokon. Ino-no rontob, i gama mongodim i gorija pavaal di kodim do Kinoringan sid songriniba. Sabap okonko i gorija o mongodim, inoi nga i gorija bai kabang do Kinoringan mongodim, iadko pakakas do Kinoringan.

Kodung i Yesus o pahabal di kembulazan di karajaan do Kinoringan (Mrk. 11,15) varo gama dau mongodim om mongingut dit ongoulun:

Nosukup-no it ontok om nokorikot-no i karajaan do Kinoringan. Manjadi uli-kou-no sid Kinoringan om pangasip-kou-no di Habal do Kovosihan, ka. Iadino o gama di gorija popiamung di Habal do Kovosihan om i katarangan do nokotimpuun-no i hoturan vagu om i kopoulosan vagu. Kondiri di gorija mad

uva randavi dino hoturan vagu. Kodung kazazad-no i habal, kovoza-no i kodim do pogidu-kou-no sid otuvong om amung-kou-no sid kanavahan do Kinoringan. Sabap iso't ulun nga aso't abanal, ka di Paulus sid ongoulun do Rom (3,10 om 23)

Sokoviai kisala om aso kendazahan sid tinoguvangon do Kinoringan. Ko Efes. 2,1-3 Nensan tokou diri, nga nanangan di rodus do Kinoringan, ka. Otuvong, ino-no o harati, osodu antad sid Kinoringan. Kanavahan do Kinoringan, ino-no, kopioondusan om kosuvangan sid hoturan vagu. Ong kavaliu antad sid otuvong sid kanavahan, tantu ino-no i kosunduvo ajadi-no sid gama dit ipat-ipat it ulun, ondu, kusai, anak, osukod, ombo i mangasip om mongoho dot, i Yesus ino-no i Tuhan om Minananggung dohon, ka. Sabap i mangasip mongoguna di Kristus. It amu mangasip kotongkihal (1. Petr. 2,7-8). Manjadi iti-no i habal dit a-milo-milo nga pendongou sid sompomogunan, sid ipat-ipat it ulun dit a-kopirongou om ipat-ipat i daerah om pomogunan om bansa dot amu-no monodiri dot isai it ongoulun dino, mosikim ko lumundu, akansang ko okugui.

b) I kobuatano do gorija mad Imam (bobolizan), i mongontok di razat sumamba sid Kinoringan.

Keso, I gorija okonko baiko tanggung jawab do kososizan om kahabaran di Habal do Kovosihan, inoi nga varo-po tonggungon dau, ino-no, i gorija iadko i valai do panambayangan ko inintoronon di Sundu dot Osusi, antawa i guvas di Kristus di mongontok di songriniba sid gama sumamba om mongohormat do Kinoringan, I gorija iadko momialatan do riniba om Kinoringan. Iti harati diti inonsizan antad duvo o hal, keso, Ong kodung valai do panambayangan om pasambaan, varo persembaan.

Koduvo, Ong iadko mivaris i gorija om i Kristus, kovoza i gama di gama di Kristus di iadko Imam do kipangkat, i mongontok om bantaran di riniba kumaa sid Kinoringan.

Sid Kitab Laid, nunu-nopo i nokosurat ontokko i kopitoguvangan di riniba sid Kinoringan, varo gama pasamba sid Kinoringan do sasambaon (Kotimp. 4,1-4; 8,20; 14,18; 15,9 om ogumu-po vokon. Na sid Kitab Vagu pengkaa dino, I gama sumamba okonko suvai sid panambayangan ko suvai varo dupot do garason dot isamba, inoi nga hal dot aralom o harati. Sumamba = sumamung di Kristus sid gorija sid saralom di Sundu dot Osusi (Mat. 18,20)

siombo-nopo varo duvo ko tolu ot ulun di mizo sid saralom di ngaran-ku, sino-okunod pialatan dioti dino, ka di Yesus, ko UR 6,13: Boros di Stepanus, I Yesus o mongohuzas di panambayangan om minonimban-po di

hoturan di Musa, ka ko UR 7,48 I Kinoringan i banalko asavat okonko kezon sid valai di ginama di palad do riniba, ka di Stepanus.

I vaza do gorija sumambayang biano mongoguna di gama di Yesus diri dit iseso om it insan-no iosido kotoronong sid Kinoringan om ajadi-no do iadko penlaid-no o gama sumamba sid Kinoringan (Ibrani 9,11)

manjadi i Kristus o najadi dot Imam do kipangkat bahagi dit ongohal dot avantang di rumikot-ogi. Na i panambayangan di dau do hoturan, nga lobipo asavat om lobipo arangkap om okonko nagama di palad do riniba, tu okonko antad sid vinangun diti. Manjadi i kinosuvaan dau dino dit insan-no sumuva sampai kosuva (sid padaha) sid ongkob di banalko osusi, okonko pinatod iosido di raha do banggala do domba antawa raha dot uzog do sapi, inoi nga i raha dau kondiri o nisamba dau dot insan-no sampai nakadapat-no iosido di kosopulan penlaid.

Topot minsanko nosimban-no i vazaan di gulu, i pinakai di Imam do kipangkat diri, varo-po inopung sid tugas do gorija iadko i gama di mad Iman i Kristus, tu:

- I gorija retan do valai do Kinoringan
- i gorija posurut di kazazadan di Habal do Kovosihan sid gama sumambayang om
- I gorija ino-no i piniizaan dit ongoulun dot osusi di mad imam.

Kagi okonko enizo i kososizan di Kitab Vagu kananganko i vaza mamakai di pongoretan IMAM. Ong sid Ibrani, bai iso-no ot Imam, ino-no i Kristus (7,26):

Manjadi i tokou diti, amu milo-milo nga varo't imam do kipangkat do iadino o kobuatano, ino-no, Osusi iosido, aso karaatan dau, aso't asakau, nokosodiri-no iosido antad sid ongoulun di kisala, sampai asavat mantadko surga. Amu osusa iosido pasamba di persembaan suvab-suvab do iadko i vokon it imam do kipangkat di pasamba di persembaan bahagi di kasalaan dau kondiri om iri-ogi bahagi di (kasalaan dit) ongoulun vokon. Sabap i persembaan di Kristus dino, insan-no om nopongo-no sampai penlaid bahagi di sokoviai, ino-no i hiza di pinasamba iosido di kondiri dau.

I gama di Kristus iadko Imam do kipangkat minonutup-no om monongompus-no di gama di Harun. Nokolintanga i Kristus di Janji Vagu.

Basao-no sid Ibrani 8,8- 13!

Tanid mantadko i gama pasamba do dupot, varo tugas dit imam di kipangkat di kakali kumavid i Yesus sid Kitab Vagu, ino-no:

- mongontupat om mangajaga di (pati di pinosuvangan di vatu di pinonuratan)

hopod pinonuhuan ko kenginan do Kinoringan. (Mat. 5,17: Kadan-no jangkaon dikou do mananus-okou di Taurat om i Kitab dit ongonabi. Okonko rinumikot-okou-nopo om mananus, inoi nga monuluk di Taurat, ka di Yesus).

- minsamung dit ongoulun di momodrikot sid panambayangan (tinumorima kavi i Yesus it isai-nopo it ulun di tinumoronong sid dau, minsanko ulun labus Mark. 7.24..)

- mangahatul di gama sumambayang om mongohormat dit ongopoginakanan (gam i Yesus minongimbulai di poginakanan dau kananganko i kapangaadan do sala Yahya 13 om Mat. 26)

- mongumau dit ongoraja, it ongoulun di nolingos i balang om it ongoondu di minusu-no om mamarakat dit ongoulun di muli sid valai. (i gorija mamung sid gama mangada do kasalaan Mat. 18,18: Ombo o boludan dikou sitid pomogunan, ino-no o noboludan-no sid surga. Ombo o huzadan dikou sid pomogunan, ino-no o nohuzadan-no sid surga. Yahya 20,23: ong mangada-kou-no di sala dot ulun, tantu nakada-no i sala dino. Ong amu-kou mangada di sala, tantu a-nakada i sala dino. 2. Kor. 5,18 Ikoiki diti ponuhu di Kristus, tu inanu-okoi di Kinoringan mongingut dot ongoulun)

Sabap ino, i gorija a-milo-milo posurut di gama di Kristus ponong sid songriniba do mongontok minta dau om mogihim di kosinangan do riniba. I gorija kolu di gama di Yesus monian dit onkokogumuo sampai momurimon di kosusaan dit ongoulun dit okugui om nasaadan. Inonsug i gorija di Paulus dot Fil. 2,5-11:

Pongitung-kou-no dit ombo i kopionong di Yesus Kristus jinadi iosido do riniba om i buatan dau iadko i riniba vokon. Minonginsibak iosido di kondiri dau om sinumuhut sampai matai.. sid kazu do sangkap. 1. Petr.2,21: I Kristus o nasaadan-no, tu ikou gima dino, do najadi-no iosido do suntuan dikou, ka.

c) I kobuatano di gorija mad suntuan do karajaan do Kinoringan

I gorija suntuan di piniizaan di masi antad sid kokuasaan do Kinoringan di pinobebas dit ongoulun. I gorija posuntu di kuasa dino sid tanga do riniba di nokuasaan-no dit ongo kuasa vokon sampai nouripon di tasantanid-tanid o kuasa om porinta om pomogos (iadko ongorogon). Iti-no o sabap do retan i gorija do piniizaan di karajaan (1. Petr. 2,9 *Ikou dino piniizaan di pakarajaan* Kental. 1,6 *Pinezoo tokou sid karajaan*, ka ko 5,10 *Jinadi-nu ioti do karajaan dot ongoulun dot osusi*, ka.

Duvo i vaza di gorija pavalang di karajaan do Kinoringan. Keso, i gorija iadko kouvaan randavi di vangun vagu, it inurug do Kinoringan sid di Yesus

Kristus, i nogulianan antad sid ulun minatai:

Isai-nopo i nasanganu di Kristus, vangun vagu-no iosido. I vangun laid dau natanus-no, sampai nokembulai-no banal i vangun vagu (2. Kor. 5,17)

Iadko i kikitibangan tokou banal, tokou-no mongumbasih di sokoviai, gulupo it ongokoruhang di kikosipan (Gal. 6,10 om 15 Suvai i vangun vagu o kiguna.

Efes. 2,10 Sabap i tokou diti, iosido o nakagama. Niurug tokou sid di Yesus Kristus, supaya kembulai i gama dot avantang sid di tokou, ka.

Manjadi i kinogulianan di Kristus om i kina pangkatan dau dot asavatko i sokoviai it ongokuasa vokon o mamanal dot,

- minonori iosido di nunu-nopo songkuasa di manangod do Kinoringan

Sinodol dau i sokoviai it ongokuasa dit a-emot sampai i pakakas do rumpak inanu-no dau om inovit-no dau mabaris sid kinamanangan, tu mangamalu dioti (Kol. 2,15)

iri-ogi mininsavat iosido do nakatalib di sokoviai it ongosurga, supaya opusok di kovosihan dau i sokoviai i vinangun (Efes.4,10)

- minonori-no iosido di kapatazan, tu i gima kinapatazan dau sid kazu do sangkap, dot ino kapatazan dino, uva randavi di Adam, i minongimbulai di sala do riniba.

Nokembulai i kasalaan sitid vinangun antad sid iso ot ulun om antad sid sala dino nokembulai i huntung om ensanan i riniba nga nokuasa-no do huntung, tu sokoviai i riniba minonimbaru kavi do sala (Rom 5,12..om 8,3) Sinuhuno di Kinoringan it Anak dau lumuu di kobuatano do riniba do kisala, sabap gima i kasalaan, sampai minongohukum iosido di sala sid saralom di buatan do riniba.

- Iosido-no o kotimpuunan di ranzat vagu, ino-no i Adam koduvo (1.Kor. 15,45) *nokosurat-no laid dot i gulu i rinibai i Adam, ino-no o napasi do pinuhobo, ka di Kitab. Manjadi i Adam tohudi o ino-no i Sundu o kapapasi.*

Manjadi i Kristus ino-no i Adam tohudi, it nokogulu nogulianan antad sid ulun minatai. (1. Kor. 15,20) *Topot i Kristus dino nogulian antad sid ulun minatai sampai iosido-no o gulu guliani antad sid sokoviai i riniba di minatai, ka.*

(Efes.2,5) napatai tokou-no ong sinod gama pakaso do Kinoringan. Topot pinasi tokou kavi dau sid di Kristus, ka om Kol. 2,13: Topot ong biano, pinasi-kou-no do Kinoringan sid di Kristus. Niada-no dau i sokoviai i kasalaan dikou, ka. Manjadi pentoron iosido dit ulun Kristian sid karajaan dau Efes.

2,6: Pinogulian tokou dau om pinogom dau sid karajaan do surga nivozo di Kristus sampai i Kristus najadi-no do raja dot ongoraja Kental. 1,5 i najadi iosido do mangahatul di sokoviai it ongokuasa do sompomogunan, ka.

Isai-nopo i nokovozi di Kristus gumulian, nga jinadi-no do koruhang dau sid gama mangahatul iadko raja (Kental. 20,6)

Osinang-no it isai-nopo i nakamung sid kogulianan dit ulun minatai, tu sid tinoguvangon do Kinoringan iosido om i Kristus mivozo mangahatul sid saralom do saribu toun koledo.

Koduvo-kagi i gorija nakanu-no do kuasa do mangaladtak dit ongokuasa dot araat sid pomogunan (Efes. 1,22-23 *Nipaladtak kavi di Kinoringan di Kristus om jinadi-no iosido dot ulion do gorija, ino-no i guvas dau, i kotulukan di monuluk di sokoviai i nunu-nopo om Kol. 2,9.. I Kristus ino-no i Tuhan di sokoviai it ongokuasa. Iosido-no ot ulion di sokoviai it ongokuasa om kakansangan. Antad-no sid dau o karangkapan dikou, ka di Paulus.*

- I gorija o monuluk di sokoviai, ino-no o harati, arangkap i kobuatano do gorija, kikoposizan, kikuasa, kikanangan dot i gama monuluk di sokoviai, ino-no i tugas ko i mission do gorija. I gorija o suntuan di songriniba iadko noumba-no laid di Kinoringan i hiza di kinourugan, i minongurug i Kinoringan di riniba kolu di kobuatano dau, supaya ioti kavi piniizaan di mangahatul do sompomogunan om wakil ioti do Kinoringan sid tanga do vinangun. Kodung norungoi-no i koluuan do riniba diri, gima i kinembulazan do karaatan om i kinototongkizadan do riniba sid tinoguvangon do Kinoringan, nehas-no i riniba om norungoi-no i kinovokilan mangahatul di vinangun. Iri-ogi kondiri do Kinoringan minoghiim do vazaan mangatag sampai minongurug do bansa vagu om vangun vagu om piniizaan vagu. I gorija najadi-no ino vangun vagu om randavi sid kouvaan dino hoturan vagu. Inurug-no di Kinoringan sid kabanaran om kosusian dau. Iti-no o sabap dot inimuhun-no i gorija do jumadi do riniba vagu sid Efes. 4,24

Pakazo-no dikou i kobuatano vagu, i kolu di kobuatano do Kinoringan om apasi-kou-ogi sid kabanaran om kosusian isuhut di kenginan do Kinoringan (Efes. 4,24 om 4,3) Toudo-no dikou i piniizaan dit antad sid Sundu do Kinoringan. I kopioondusan do Kinoringan o kogos di piniizaan dikou.

- I gorija mananus dit ongovolit om ongekopiduvaaan dot ulun (Gal. 3,27...) *Songkuro-nopo i nopodsu-no sid ngaran di Kristus. nga nokoluu-kou-no di Kristus. Aso-no pitonidan-po vagu dot ulun do Yahudi om ulun do Yunani. Aso-no bida-po vagu dot uripon om bebas. Aso-no bida-po vagu dot ondu om kusai, tu ikou dino sokoviai najadi--kou-no dot iso-no sid di Yesus Kristus. Kol. 3,10: ..om pakazo-no dikou it ulun vagu, ino-no koimvoguvai isuhut di kotutunai, i kolu di Minongurug dot amu-no osodiri-po i Yahudi om Gerik, i kisunat om it aso o kiroon, ino-no i Kristus.*

- I gorija popiopud di samod do Kinoringan (Efes. 5,2)

.. om posuruto-no dikou i gama manamod iadko i Kristus, i nakapanamod-no dikou sampai nitahak-no dau i koposizan dau mongontok dikou iadko persembaan. Rom 13,8: *Kadan-kou-no miinumpalad, gamko misasamod-kou-no Gal. 5,14 ..tu i sokovia i pinonuhuan nensanan-no notuluk-no sid iso o pamarasan o ino-no, Manamod-ko-no dit ulun vokon iadko i kondirinu, ka.*

- I gorija nensanan do nasanganu-no di Kristus dot aso-no vokon o koponguasa-po di gorija ko koponguripon-po. Gal. 5,1: *I tokou diti nilabus di Kristus antad sid kinouripanan. Sabap ino, kavid-kou-no di kolobusan dino om kadan-kou-no sumulung vagu di sulungan (sungkoliu) di kinouripanan diri. Yahya 8,32 + 36: ..ohorotizan dikou i kabanaran, tu i kabanaran dino o palabus dikou antad sid kinouripanan. Manjadi ong palabus dikou it Anak, tantu kalabus-kou-no antad sid kinouripanan. Rom 8,2: I hoturan do Sundu, i manahak do kapasi sid saralom di Yesus Kristus o pinalabus dohon antad sid hoturan do sala om kapatazan, ka di Paulus.*

- I gorija mamakai di hoturan vagu, i nokotimpuun-no sid koposizan di Yesus, inot ulun antad sid Nasaret. Ino hoturan dino suvai otuluk ong hiza do kovian. Topot i gorija o sumuntu dino kobuatano di Yesus sid tanga do pomogunan di nopogos om nouripanan om nemvagatan di tasantanid-tanid o hoturan do karaatan om ongorogon. Kagi, i gorija mongintutun dinot ongokuasa vokon di sumaap di kenginan do Kinoringan. Efes. 3,9:

Biano-ogi om pengilo-no iosido sid kiongokuasa om sid ongokakansang i vinangun, supaya elaan dioti i sokovia i keloo do Kinoringan dot i gorija o pakakas dau, ka.

Songgii o gama di Yesus dot iamung manarang diti, ino-no, Ong kodung minangahabal i Yesus di karajaan do Kinoringan, varo-no kovoza dit agazo o gamaon dau dot osundu. Kopivoza di habal di hiza vagu om it ongotanda di hiza dino (Mark. 1) om kodung monuhu i Yesus di kinoruhangan dau mamanan pahabal om pokoruhang dit ongoulun, niboros-no laid dau dot,

Sokovia i kuasa, nakatahak-no kavi sid dohon, ka (Matius 28,16-19).

Antad sid kavazao di Yesus di iadino ohorotizan tokou-no dot i gama mangahabal di Habal do Kovosihan kiharati ponong sid kovian om i hiza do penlaid. Ong kodung kahabal-no i Habal di Karajaan do Kinoringan, mad ohukuman-no it ongokuasa vokon om okodim-no it ongoulun di kakal-po sid karajaan do kotuvangan, tu maliu sid kanavahan di karajaan do Kinoringan om lumabus-no antad sid karaatan om i hoturan di kasalaan. Minsanko okugui om orukung i vaza pazazad di Habal do Kovosihan, gima okugui it ulun ko amu elo banal, empihatan i habal dino di kuasa do Kinoringan om i karajaan dau.

Sid kokuguzo dot ulun monori om monguasa i Kinoringan dit ongokuasa. 1. Kor. 1,27-29

Okonko ogumu ot ulun di kiongohukum o vangun o nokodim om okonko ogumu ot ulun di kiongokuasa om okonko ogumu ot ulun do kipangkat o tirsan, gamko it ongobungou sitid vinangun o pinili di Kinoringan, tu mangamalu dit ongoelo. Om it ongokugui o pinili di Kinoringan, tu mangamalu dit ongokakansang, om i tutusan dot osibak sitid vinangun om i kikihizan om it aso guna o pinili do Kinoringan, tu mananus di kiongoguna.

Manjadi antad sid tolu o kobuatano dino ot elaan tokou do minsanko tolu o vazaan, nga iso-no o tugas di gorija. Ensanan i gorija o sinuhu di Kristus do mamanan sid sompomogunan, supaya ajadi i gorija do piniizaan dit iadko nabi om imam om raja dit otunda di Sundu do Kinoringan, supaya i Sundu dino momongo di kosunduvo di vangun vagu.

IV. IT ONSI DI KAHABARAN DO GORIJA

Natarang-no laid do nunu banal i tugas om panangan do gorija, ino-no i gama polombus di Habal do Kovosihan do suvaiko kondiri di gorija, nga sumuhut di Habal do Kovosihan dot ino habal dino mongimvagu di kobuatano do gorija om atag-ogi i gama do gorija polombus di habal dino. Manjadi sid saralom di fasal diti ihimon tokou do humarati do nunu it onsi di Habal do Kovosihan, supaya kaharati tokou i korolomo di tugas do gorija do papakas i gorija di mission do Kinoringan.

Ong mogintutun tokou dit ongobuuk di nokosurat ontok di hal diti, ohorotizan tokou do mad amu oruhai i gama mongonsi. Linasaan it ongobuuk om tasantanid-tanid ot ulun dit elo minogihim monodiri di keloo sid hal diti. Varo iso hal do nokembulai sid sokovia i it ongomanarang, ino-no, i Habal do Kovosihan nga habal do kosinangan om kohigakan dit aso kerad sid sompomogunan antad di kinourugan. It apat Injil manarang di kobuatano di Yesus do pivozoon di kosunduvo om i kuasa dau dot,

it ulun do bolou kosirot om it ulun do kimai kapanau-no om it ulun di kibalang, nga olingasan-no vagu om it bongung nga kening-no, i minatai ogulian-no vagu om i mosikim, nga orikatan-no di Habal do Kovosihan sampai osinang-no it ulun dit amu enggerit dohon, ka di Yesus (Mat. 11,5)

1. I Habal do Kovosihan monuluk di harapan di Kitab Laid.

I Habal do Kovosihan okonko tigogi om varo-ogi, inoi nga sid Habal do

Kovosihan dino kembulai i kotulukan di harapan di Kitab Laid. Sabap ino, gulu-no orikatan it ongoulun dot Israel di Habal do Kovosihan dino (Mat. 15,24) *Amu-oku nosuhu sid tanidko it ongodomba dot Israel di natagak*, ka di Yesus. Ko Mat. 10,5-6 *Kadan-kou-no mamanan sid alun-alun dit ulun dit amu mangasip... inoi nga rumikot-kou-no sid ongodomba di natagak di dang Israel*, ka. Sabap ino atag ong mongitung tokou-po laid i nunu-no i harapan dit ongoulun dot Israel sid Kitab Laid dino.

a) I harapan dot Israel: varo hiza do kabanaran om katapatan

I Kitab Laid hinumarap do varo hiza rumikot do kikabanaran om kikatapatan. Suvaiko agazad-po do kovosihan do Kinoringan om kopongoguna dit ulun vokon om atag-ogi i kopiizaan dot ongoulun. A-kavasa do mangakan do koruhang ko ouripon it ulun vokon. Isai-nopo i monguripon dit ulun vokon, iadko kasaap iosido do Kinoringan. Tu antad sid Kinoringan i koposizan om Kinoringan-no o mangahatul om manaud om monunda dit ongokoposizan dot ulun. Ong ouripon dot ulun iadko amu mongohormat di kuasa do Kinoringan, gima monantuan do vokon. Sabap ino, a-kavasa iri do mongohormat dit ongotiningulun om patong. Tu it tiningulun di mad sasambaon, nga ginama do riniba do monimban do Kinoringan ko i vaza do riniba mokierad do Kinoringan. Boros di Kitab Laid sid Kol. 21-22 dot, Ong i Kinoringan tantu kopikoruhang dit ulun dit okugui, it usan-usan, i bituanon om i mosikim. Hinoturan di Kinoringan it ongoulun dot Israel do posuntu sid ongobansa vokon ombo it abanal om otopot. Tinahakan-no di Kinoringan dot ongopinuhuan om it ongoguru di monuduk di kenginan do Kinoringan. Hinoturan-no dau it ongoraja di mongontupat di bansa, supaya sumuhut om monumbozo it ongoulun di pinonuhuan dino. Hinoturan-no Dau it ongonabi di monuduk om monuduk dit ongokaranggalan om mongimuhun dit atag o gama, supaya i bansa dot Israel o sasi do Kinoringan sid tinoguvangon dit ongoulun om ongobansa vokon. Kolobusan 19,5....:

Ong sukul sumuhut-kou di janji-ku, ajadi-kou-no do bansa-ku. Ensanani pomogunan, nga ioku-no o sanganu. Topot ong ikou dino bansa-ku-no, i bansa di mongoguna dohon.

Kasalaan-nopo, a-nokosuhut i bansa dot Israel. Sid tinoguvangon dit ongobansa vokon minonipu ioti di janji do Kinoringan. I minongimuhun i Yeremia di bansa dau, ino-no i timpa dioti: *Moku, tu nokokuro-ka, tu amu-okoi monimbaru di karaatan? Engin-okoi di iadino di miguguvail om rumaat, isuhut di kenginan-za.* (Yer. 18,12) Minsanko asarok do varo nabi di popuhondom om posuhut dara di bansa dot Israel, nga sinumuhut-no ioti di ginavo kondiri

do gumuvail sid hoturan do Kinoringan.

Ino-no it atag, Kikabananan-kou iadko momurulun o vaig om iadko vosoi dot osou, Amos 5,24 om Mikha 6,8: Niboros-no di Tuhan Kinoringan dot ombo-nopo it avantang. Ino-no o kenginan dau, Posurut-kou-no do kabanaran om i gama misasamod om soumul-umul-kou sid tinoguvangon di Kinoringan dikou dot osibak o ginavo, ka di Mikha.

Antad dino atalahas-no dot amu najadi it Israel do suntuan dit atag. Iri-ogi minamahanda it ongonabi di hiza di rumikot-ogi di *kikabananan iadko momurulun i vaig om iadko vosoi dot osou*. Sabap nojonjizan-no vagu di Kinoringan i nobi di bansa dau. Gam iposurat di Kinoringan i pinonuhuan dau sid ongoginavo dioti (Yer. 31,33), supaya i kabanaran do Kinoringan manganavau di sompomogunan om i songriniba (Yesaya 51,4; 42,4) Ino-no i vazaan do posurut di iadino, sinuhu-no di Kinoringan it uripon dau, i mongovit om pengkakat di kabanaran sid pomogunan (Yes. 11,1-2) om pabanal di kogu-muai (Yes. 53,11), minsanko anangan iosido do kapatazan (53,12).

b) I hiza do kopioondusan.

Miabal di harapan do varo kabanaran om katapatan, varo-po kiroon sid Kitab Laid do rumikot i hiza do kopioondusan, tu kondiri di Kinoringan o mangandus. Sid Hakim 6,24 retan-no laid dot i Kinoringan o Tuhan di kopioondusan, ka. Ko sid Yesaya 45,7 i Kinoringan poturidong di kopioondusan om posuvang dit ongouripon dau sid kopioondusan dino. (Zabur 35,27) Minsanko i bai mongohondom do Kinoringan, ino-no it ulun di noken-ton sid kopioondusan dit ahatul banal (Yesaya 26,3 om Zabur 4,9).

I pongoretan shalom = kopioondusan, ino-no o harati, kosianan, kotulukan, katarangan, aso kokurangan. Iso hal nga aso sid pialatan dot ulun dit amu onong. Atarang om ahatul kavi.

I kopioondusan di narait sid Kitab okonko baiko janji ko taru di manantu di hiza dot aso rumpak ko hiza dot ozom-no i pomogunan, gam i kopioondusan dino mangahatul di kosinangan di suvab-suvab dot i riniba om it ipat-ipat it ulun osinang sid tinoguvangon do Kinoringan om it ulun vokon om isai-nopo. Kopioondusan, ino-no o kosondoto, abarakatan-no it ulun, ko kosinangan, ko kosukupan, kikosopulan, kikoposizon om kikoposizan. Iadino o habal di nabi Yesaya 52,7:

Osinang-no banal ong emot-no it ongomangahabal di mangkus-tangkus sid haras dit ongoburul di mangatod di Habal do Kovosihan, ino-no i habal di kopioondusan.

- Varo kounsapatan sid pialatan dit ongoulun om it ensanan i vinangun:

i mondou mangakan do sakot iadko sapi om i ragang-po momoi sid luvang do vulanut dit opodos. (Yes. 11,6-9)

- Varo kabanaran om katapatan:

mangahatul i Tuhan dit ongoulun do kabanaran dau (11,3-5)

- Varo kosopulan antad sid kinouripanan *I Tuhan monindal di bansa dau om ensanan i sompomogunan nga kemot kavi di kuasa dau. (Yesaya 52,10)*

- Varo kolunduan om kosinangan (Yesaya 66,12)

Porikoton-ku sid dikou i kosinangan dit amu-no engkod. I kolunduo dit ongobansa murulun iadko bavang dit amu masak. Ikou dino iadko anak di ginompi dit idi dau do banalko asamadan dot asot kurang.

- Varo kosusian (Yesaya 11,9)

tu noponu-no i pomogunan di keloo di Tuhan iadko i vaig sid rahat. Kondiri di Tuhan, i raja do kopioondusan o mangatod om mongimbulai dino kopioondusan om i habal do kovosihan.

c) I harapan dit ogomitan sid tanga do kosusaan.

I harapan di nihabal-no di Yesaya diri (40-66) nokembulai-no i hiza di sid kinouripanan it ongoulun dot Israel. Suvaiko nouripon om andaman-ogi dioti i songkuro kogozoo di harapan sid Kinoringan om songkuro kahatul o kotulungan di Yahwe manapul di bansa dau sid Masir diri. Iri-ogi nakaharati-no ioti dit mad garau do harapan vagu, ino-no i kosopulan di rumikot-ogi.

Aso kerad o longoi di kohigakan do harapan tanidko i longoi dit URIPON DI TUHAN sid Kitab di Yesaya. I longoi dino ituduk-no dit ongoulun di nanangan di hukum do Kinoringan. I kakal-po sid kinouripanan, notoguvangan dioti i hiza di rumikot di kopivozo do kabanaran om kopioondusan om kosopulan. Pengkaa dino i habal di Yesaya sid longoi dino,

Insasamadai-no dikou i bansa, ku, ka di boros do Kinoringan dikou. Patatapo-no dikou i ginavo dit ongoulun sid Yerusalim om habarai-no dikou ioti dot, Nakatalib-no i kinouripanan dioti om i kasalaan dioti nga nakada-no. Induvo ioti kohukumai di Tuhan, gima i kinasalaan dioti.

Ungkazut-no, ungzazut-no o Sion, panampai-no pononghokos-no. Indogupai-no i vuros-nu om iduo-no i lisovu. O Yerusalim di noboludan-no, iduo-no i rantai antad sid liou-nu, ot anak do Sion. Tu boros di Tuhan, i monguasa di sokoviai, I nouripanan-ko diri, amu-no nosusa mongohorogo-ko om i niponobusan dikau, nga miradi dot aso-no horogo. Tu kelo-no kavi it ongoulun dot ioku-no ot niponobus dikau. Osinang-no banal ong kemot-po dit ongomangahabal di mamadtangkus sid harason dit ongoburul di mangatod di Habal do Kovosihan om i habal do kopioondusan om kosopulan,

i mangahabal-no dot, I Kinoringan-nu, ino-no o mangahatul (Yesaya 40,1-2; 52,1; 3,6-7)

Ino nongosorou di nabi Yesaya nokembali-no sid tanga do kosusaan. Kagi i F. 53 monuduk di tokou dot a-milo-milo sid tanga do kapagasan dit URIPON DI TUHAN kembali i kabanaran om kopioondusan. Suvai nensibakan-no banal it uripon do Kinoringan om apangkat-ogi iosido. I kembulazan di kopioondusan antad sid gama dau mongontok di kasalaan di kinogumuai. Iosido-no ot inuripon om pinogos, nabambangan, nohukuman sampai pinatai. Ong iosido-no o manaan om mamabo di karaatan di kinogumuai, kalabus-no ioti sampai nobebas-no ioti om tumungag-no vagu i bansa dot Israel om manansanganu-no dit ongobansa vokon (Yesaya 54,1-3) om ajadi-no ioti di mongolintanga dit ongoulun vokon (Yesaya 61,6).

2. I Habal do Kovosihan di notuluk-no di Yesus antad sid Nasarat.

Ong nakaharati-no di harapan di iadino, kaharati tokou-no di Habal do Kovosihan sid Kitab Vagu. I Habal do Kovosihan, ino-no i kotulukan di harapan di Kitab Laid, ino-no i harapan do varo rumikot do Manapul. It ulun dino i Yesus o ngaran antad sid Nasarat o kosondoto di Habal do Kovosihan om kopioondusan do Kinoringan bahagi dit ongoulun di nasaadan om nopogos. I Yesus, ino-no i Habal do Kovosihan di nokoriniba. I hiza di sumuvang i Yesus sid valai do panambayanan sid Nasarat sampai minonuturan siri, minamakai iosido di boros di nabi Yesaya (61) do pengkaa dino:

I Sundu di Tuhan o mozo-vozo dohon, tu nopili-oku-no dau do pahabal di habal do kovosihan sid ongoulun di mosikim. Sinuhu-oku dau pentahan sid ongoulun di nokotorungku do kolobusan om sid ongoulun di bolou do kemot-no vagu ioti om sid ongoulun di nasaadan do varo-no kolobusan sampai pahabal-oku di toun dot avasih antad sid Tuhan.

Na mongusul i Lukas dot linontop-no di Yesus i buuk dino om poulio-ogi dau sid ponulung do panambayanan sampai minogom-no iosido.. om sokovia i it ongoulun sinumiroto-no kavi sid di Yesus. Na tinumimpiun-no i Yesus momoros sid dioti dot, *Biano diti notuluk-no i boros do Kitab dino sid tinoguvangon dikou, ka di Yesus sid Lukas 4,18-21.*

a) I Yesus minongimbulai di hiza vagu

Pinosondot-no i Yesus di nosorou di nabi Yesaya ong kodung momoros iosido dot, Nokorikot-no i hiza vagu diti, ka. I toun dot avasih antad sid Tuhan, nokorikot-neno, ka. I Injil di Markus momihot di boros dino, tu, *nokotorungku-po i Yayha, minamanau-no i Yesus kumaa sid pomogunan do*

Galilea, tu mangahabal di habal do kovosihan do Kinoringan. Iri-no i binoros dau, Nosukup-no it ontok om nokorikot-no i karajaan do Kinoringan. Manjadi, uli-kou-no sid Kinoringan om pangasip-kou-no di habal do kovosihan, ka dau (Mark. 11,14-15)

- Ino pongoretan do karajaan (Yunani BASILEIA) ino-no o harati,
- i vazaan do mangahatul (okonko momorinta, iadko i porinta)
- it ongoulun di nokosuvang sid kuasa do raja
- i pomogunan di nokosuvang sid kuasa do raja

Ong sid boros di Yesus, ino-no o pasandatan: i kotimpunaan di hiza do Kinoringan-no o mangahatul sid palad dit Anak dau. Ino karajaan do Kinoringan o mongimbulai di hoturan vagu, ino-no i hiza di kembulazan di kenginan do Kinoringan di kiguna sid ipat-ipat it ulun di sid sompomogunan. Okonko i kenginan om kozian ko karalazan dit toriso-iso it ulun o momorinta, isuhut di kuasa om pangkat dot ulun, inoi nga i kenginan do Kinoringan mangahatul di sokoviai i nakamung sid piniizaan vagu dit antad sid gama di Yesus om i Sundu do Kinoringan do minsanko it ongokuasa vokon, nga kosuvang om asanganu di hoturan vagu dino. (Mark. 1,27)

bang moniag i Yesus dit ongorogon dot araat, nga sumuhut-no ioti, ka dit ongoulun.

b) I kinembulazan di kabanaran do Kinoringan

Ino hoturan vagu di Yesus pajadi di karajaan om hoturan do kabanaran do Kinoringan. Kondiri di Yesus o jinumadi di kabanaran dino. Sabap i sokoviai i kobuatano om ginama di Yesus minongohukum di hiza om hoturan laid, gima minonuluk iosido di kabanaran do Kinoringan dot ino-no i gama dau, hinumogizo iosido dit ongoulun di nasaadan om i naladtakan dot ulun, ino-no i sokoviai it ongoulun dit aso ngaran om aso hak sid hoturan laid. Kondiri di Yesus minonuluk di sokoviai i pinonuhuan dot i kavazao om i kapatazan dau mad ginumanti di karaatan dot ongoulun. Sid gama di iadino ot ipamanal dau it ongoulun di mangasip sid dau. Rom 3,21...

I Kinoringan o mamanal dit ipat-ipat it ulun di mangasip sid di Yesus Kristus. Amu monodiri i Kinoringan. Sokoviai kisala om asot kendazahan sid tinoguvangon do Kinoringan om nembanaran-no ioti do baiko nisian di kovosihan dau, gima notobus-no sid saralom di gama di Yesus Kristus. Tu iosido dino noumpai-no do Kinoringan dot ipangandus bahagi dit ulun di mangasip sid raha dau, o ino-no i kembulazan di kapamanaran do Kinoringan.

Manjadi i karajaan do Kinoringan ino-no i piniizaan dit ulun di nembanaran

di Yesus Kristus om piniizaan dit ongoulun di posurut di kabanaran do Kinoringan sid sokoviai i gama om kobuatano dau. Sabap i kabanaran di Yesus okonko bai nokembulai sid kazu do sangkap, hiza di kinapatazan di Yesus do nokogizo iosido dit ongoulun di kisala di minomurimon i Yesus di sokoviai i kapagasan om kosusaan di songriniba dot okudik nga aso't alazan, inoi nga kakali mozo-vozo om munda-tunda i Yesus dit ongoulun dit okugui om asaadan om orukung om osusa sid saralom di gama dit ongoulun di sumuhut di hoturan di Yesus (Mat. 25,34...) om manala i Yesus di nunu-nopo o karaatan dot ulun, minsanko i karaatan di baiko posimozo di kotulungan sid ongoulun dit osusa.

I gama dikou dot a-kou monulung dit iso it ulun dit osibak, iadnoko ioku ot a-tinulungan dikou dino, ka di Yesus (Mat. 25,45).

Sabap ino, i Habal do Kovosihan keso habal bahagi sid mosikim om it oruol o ginavo, i bolou, it asaadan, i kopurimon di karaatan dit ulun vokon, i nouripanan om notorungku. Iti habal dino sumaap di nunu-nopo sangkaraatan di sid tanga do riniba. *Suvaiko embanaran, ong i kosipan kopisungkod di gama gumama (Yakub 2,4) posurut di kabanaran.*

c) I kinembulazan di kopioondusan do Kinoringan

Ong notuluk-no di Yesus i kabanaran do Kinoringan, ino-no i hoturan vagu dino o hoturan sid kopioondusan. Sabap mikoduvo-duvo ino nembulai-no di Yesus Kristus. I minongontok i Yesus di riniba matai, minongimbulai iosido di kopioondusan bahagi di riniba. Efes. 2,13..

I hiza diri banalko osodu-kou antad sid Kinoringan. Topot biano, osomok-kou-no sid Kinoringan, gima i Kristus. Tu i raha di Kristus minangapus dit utang dikou. Iosido kondiri pinengkakat di kopioondusan sampai pinopezo dit Ongoyahudi om it okonko Yahudi. Hinuzas-no dau i rininding sid pialatan dioti di kakal-po ioti misasangod-sangod. I kinapatazan dau o minananus di pinonuhuan dit ongoulun do Yahudi di minomogos dit ongoulun sampai minongimbulai iosido dit ulun vagu antad sid nopiduvo i riniba. I duvo misangod dino pinopiandus-no di Kinoringan sid sangkap om pinopezo-no dioti sid kazu do sangkap.

Iti-no o sabap dot notuluk-no i harapan do varo rumikot i hiza do kopioondusan. Sabap i kinapatazan di Kristus o minongohuzas di kuasa do sala om pinedu di tobon di minonobon di kopioondusan do Kinoringan (Yesaya 53,3-5)

Inanangan iosido di hukum do Kinoringan. Asaadan iosido, tu gima i karaatan tokou om nabambangan iosido, gima i kasalaan tokou. Nosopulan tokou, tu i gima hukum di nokonong sid dau om i nabambang iosido, ino-no o kosinangan tokou, ka.

I horogo di kabanaran diri, ino-no i korungazan di kasalaan om koponorian di kapatazan.

Nokembulai-no i kovosihan dino, tu nokorikot-no i Yesus Kristus. Nokuasa-no dau i kapatazan sampai nokopongimbulai-no iosido do koposizan dit amu rumungoi, gima i Habal do Kovosihan (2. Tim. 1,10).

d) I Minongurug di riniba vagu

Ino kopioondusan di ginama di Kristus minongimbulai di hoturan om vangun vagu. I noumba-no laid di Kinoringan di hiza di kinourugani, inimbulit-no sid gama di Yesus Kristus. Tasantanid-tanid o vaza di Paulus manarang di ginama di iadino. Ong sid surat pakaa sid Efesus om Kolose, retanko kosimbanan, povolihan, vangun vagu, ko kojodian di riniba vagu ko ulun vagu di kinenginan laid do Kinoringan, i kopisuhut di noumba-no laid do Kinoringan do kovoza kavi i sokoviai i kosinangan di nosodia-no laid sid riniba diri. Ong Kolose 1,20;

I raha di Kristus sid kazu do sangkap o vinazaan do Kinoringan pandus di sompomogunan om i surga. I sokoviai i nunu-nopo, nokosuvang-no sid kopioondusan dino, tu sid dau o kembulazan di kavi-avi i koposizan di sid surga ko i sid tana. Okonko rontob it emot, inoi nga sokoviai it ongokuasa dit amu-po emot, iosido-no o nipongurug di Kinoringan di sokoviai sampai iosido-no o rikoton di sokoviai.

Ensan i vinangun nokosuvang sid kuasa di Kristus (Mat. 28,16). Iti diti notuluk-no (Efes. 1,22) *Nipaladtak kavi di Kinoringan di Kristus om jinadi-no iosido dot ulion do gorija om Kol. 2,15 Sinolod dau i sokoviai it ongokuasa dit a-emot sampai i pakakas do rumpak inanu-no dau om inovit-no dau mabaris sid kinamanangan, tu mangamalu dioti, ka.*

Ino-no rontob, okonko ensan i riniba nokotiim di kopioondusan dino, gam kakal-po minud-inud iadko i boros di Paulus sid Rom 8,24:

kakalpo bai humarap di kopioondusan.

Manjadi ensan i gorija okodim, tu pazazad dino habal do kopioondusan dino, supaya kemot i songvinangun di kosopulan antad sid kinouripanan sid kinasalaan do riniba. Sabap (Rom 8,20-21)

i vinangun diti nokosuvang-no sid aso tantu-tantu dot okonko dau do kenginan, inoi nga kenginan di pinosuvang (i vozoon do rogon). Topot kiharapan do kalabusi i sokoviai i vinangun antad sid kinouripanan di kobinasaan om osibikan di kohormatan dit anganak do Kinoringan dit amu-no okuasa di nunu-nopo. Sabap elaan tokou dot i sokoviai i vinangun nga mogodoi om kopurimon dot orualan do mad hingoton sampai biano.

Na ipat-ipat it ulun okonko iseso iadko ulun di nokentoron sid iso o puru sid tanga do rahat dot iso nga aso koruhang. Gam it ongoulun kavi osomungan sid a-ko piro o rombongan, piniizaan, kampong ko parti ko kesaan dot aso't elaan dit ulun tumongkizad om sumodiri. Pengkaa dino i gama pahabal di Habal do Kovosihan okonko bai it iso ot ulun o panangan, inoi nga i sokoviai i nokorombongan sid ulun dino, i gagamaan dau, kampong, kesaan, on-gokoruhang sid valai om pomogunan dau, om i dau do kavazao dit atag ko amu. Kuran-kuran nga nokotombil-no it ulun sid karaatan om kasalaan sampai nokensodu antad sid kenginan do Kinoringan. Sabap ino, i Habal do Kovosihan suvaiko ihabal sid ipat-ipat it ulun sid dau om dau do kobuatano om kosusao di suvab-suvab dot okonko bai mogkiro di ginavo dot ulun, inoi i kosopulan dau antad di sokoviai i karaatan dau om it ongovazaan di mongorongoi di kovongunan dau.

Suvai osimbanan-po it ongovazaan kumaa sid karaatan om kasalaan om kouli-ogi it ulun sid Kinoringan. I habal do Kovosihan okonko baiko habal di monimban di ginavo dot ulun, inoi monimban om potorongotog dit ongovazaan dot ongoulun. Sabap i Kristus o Tuhan di songvinangun. I nokoponori i Kristus di kasalaan om kapatazan o kiguna bahagi di sokoviai i kavazao om koposizan do riniba. Sabap ino, suvaiko ihabal-no i kamanangan dau sid siombo-nopo, sid politik, sid ekonomi, sid tasantanid-tanid o kobuatano dit ongorombongan dot ulun di miooduw, miaakan om misasaap-saap, tu ensanan-no dot mokisapul di kuasa di Habal do Kovosihan.

Sinod tanga do riniba ajadi-no i gorija do tanda do kopiondusan, tu sid gorija nokotimpun-no i Kristus di vazaan om vangun vagu dit amu-po oompus. Manjadi i gorija amu bozoturut di kobuatano di riniba biano, gam mangahabal di Kolobusan antad sid kovongunan di mad norungoi-no do kasalaan om kinapatazan. Amu mangakun i gorija di hoturan do kobungahan om vivil, i hoturan di miaakan i songriniba ko i gama dit ongoulun momogos di koruhang ko i nunu-nopo songhoturan di mongusiba om pemozo di bai iso ot ulun sid tanga do riniba.

I gorija mogihim di vazaan do potuluk dit noumba laid do Kinoringan ponong sid riniba. Ong opud i kopiondusan om i samod om i kabanaran sid tanga do gorija, suntuan-no sid kavi-avi it ongoulun vokon di mintutuk sid gorija dino. Sabap ino, okonko bai i gama mangahabal di Habal do Kopiondusan o kiguna bahagi di vokon, inoi nga i gama sumuntu sid vokon dino o kopiondusan dit antad sid di Kristus.

Minsanko iadino o gama do gorija posuntu di kopiondusan, kakali baiko tanda i gorija bahagi di karajaan do Kinoringan. Nokenksomok-no i karajaan dino,

topot amu-po notuluk banal. Bai kolotuzan i gorija dino karajaan om hoturan vagu. Nokembulai-no i kovosihan do Kinoringan, amu-po nokotongkop sid sompomogunan. Tu kakali it ongoulun do momorinta do koruhang om mopud sid ulun vokon iadko magatas do koruhang. Kakali miaanggan-anggan i panganavau om i kotuvangan.

Sabap ino, i habal do gorija okonko atandas Habal do Kovosihan, inoi nga i habal dino pavalang di karaatan om pogili di karanggalan om kobungahan dot ulun. Sabap i boros do kosopulan sid Kinoringan manarang-po di hukum dau om i gama manala dit ongokaraatan. Ong iturut i kopioondusan om kabanaran om i samod sid tanga do razat, a-milo-milo nga igili it ongokaraatan sid tanga do razat om i gama monongkudau om i mongorongoi di piniizaan dot ulun. Ong onsizon-po vagu i Habal do Kovosihan, pengkaa dino,

I Habal do Kovosihan ino-no habal do kosopulan do Kinoringan sid saralom di ginama di Kristus. I habal dino nokoriniba: i Yesus kondiri it antad sid Nasarat o lugu di habal dino. Iti habal diti o nakamanang-no antad kasalaan om kapatazan om momihot sampai manantu dot i Kinoringan o manansanganu di nunu-nopo songhoturan sid sompomogunan. I habal dino pentahan di hoturan vagu, isuhut di harapan laid di sid Kitab Laid diri, ino-no, rumikot-ko mimbulai i vangun vagu dit abanal om andus om asamod. Manjadi iti habal diti pembulai di gama dit atag. Suvaiko kosondot sid vaza mongusaha di palad om longon dot ulun i habal dino, iri-ogi korikot-no om kosunu-no i Habal do Kovosihan.

V: I VAZA MONGUSAHA DI HABAL DO KOVOSIHAN

I vaza mongusaha pengkaa dino o harati: suvaiko muonsi i habal ong kosunu, ombo it ahabal. Amu-po kembulai i kabanaran ong bai moroboros it ulun ko bai itung-itungon do nunu o kabanaran. Suvaiko ahatul i kabanaran om i nunu-nopo sanggamaon dot ulun om korikot-ogi i kabanaran dino. Kondiri di Yesus i nokoriniba o Habal, i minongimbulai di kuasa dau sid tanga tokou, supaya varo kotulungan sid ongoulun di nosusa om nasaadan.

1. It onogamut di kopongusahaan di Habal do Kovosihan.

Ino-no o mad gamut di gama popuonsi di Habal do Kovosihan sid tanga diti riniba, it a-ko piro it ongoayat sid Kitab vagu di retanko: i suhu di papanau dit ulun Kristian.

Mat. 28,18-19: Boros di Yesus, Nakatahak-no kavi sid dohon i kuasa sid surga om sid pomogunan. Sabap ino pamanau-kou-no, jodizo-no dikou do

koruhang-ku i sokoviai it ongobansa .. om tudukai-no ioti di sokoviai it inimuhun-ku sid dikou, ka. Mark. 16,15: Pamanau-kou-no sid pentongkop do pomogunan sampai pangahabal-kou-no di Habal do Kovosihan sid sokoviai i vinangun, ka. Luk. 24,48: Ikou-no dino o sasi di sokoviai it nongojadi dino. ka. UR. 1,8: Ikou dino, amu-no alaid om kotorima-kou-no di kuasa do Sundu dot Osusi sampai ajadi-kou-no do sasi-ku sid Yerusalim om sid Yahudia om sid Samaria sampai sid pentongkop do pomogunan. ka. Yahya 20,21: Iadko i minonuhu dohon di Ama, iadino monuhu-oku-no dikou, ka.

Inot ongoayat dino manarang dit onsi banal di Habal do Kovishan, isuhut di kobuatano om tinomod di Yesus Kristus sid tanga do riniba om kopivozo di kuasa i sid surga sampai sid sompomogunan dit inanu antad sid Kinoringan it Ama. I kosungguvo dino habal dino, ino-no i koponopulan do riniba. Sid ongosuhu dino nokosokot i kososizan do gorija.

a) I gama mangahabal: Okonko bai sid kompusan dit Injil di Markus o varo boros dot, Pamanau-kou-no pahabal, ka, inoi nga mad ensanan it Injil di Markus momoros om monuduk do iadino. Imatai sid Mark. 3,14 om 6,7-13: *Manjadi minomili-no i Yesus do hopod om duvo i kinoruhangan dau do sinuhu dau ioti do mangahabal di Habal do Kovosihan, ka. 13,10: i habal dino, a-milo nga kahabal sid sokoviai it ongobansa, ka. It ongoinjil vokon, iadino: Mat. 26,13; Luk. 9,2 om 10,1; UR 16,10 om 28,31; 1. Kor. 1,17; Rom 10,15; 2. Tim 4,2. Iri-noko iri, i habal do Kovosihan a-milo-milo nga kahabal, tu hal dot agazo, a-kavasa do polingobon ko poolingani.*

Sid Kitab Vagu ohorotizan tokou dot i gorija di gulu banal diri nengat-no dot i Habal do Kovosihan, suvai kahabal om kiguna-ogi dot a-milo-milo nga itongkop sid sompomogunan. Manjadi sid habal dino, tolu o kanangan diri:

- Keso, Onsi banal di Habal, ino-no i Yesus Kristus. Banal-noko minomihot ioti ulun Kristian i hiza diri dot i Yesus Kristus ino-no i kompusan di boros do Kinoringan sid riniba, i minongovit sid riniba di samod do Kinoringan. Sid koposizan di Yesus kondiri o suntuan di samod dino, dot iosido minatai, supaya apasi i riniba.

- Koduvo, I habal di nihabal dioti diri, mad nokopionong di kosusaan dit ongoulun. Okonko enizo om iri-noko iri i habal dino. Ong i hiza di Pentakosta, banalko minomihot i Petrus di habal do kovosihan sid usuran dit ulun Yahudi. Ong sid Athen i Paulus, manarang i Paulus di kuasa do Kinoringan di katalib di nunu-nopo it ongo kuasa vokon. Minsanko it apat injil o pembulai dot okonko enizo i gama mangahabal di gorija di kodori diri di Habal do Kovosihan. Tu

i Yesus, banalko kiontok sid tasantanid-tanid o kosusaan om situasi do riniba. Ong i Yahya diri, pinili dau it ongotuturan om ongosuromo di Habal do Kovosihan kopionong dit ongoulun di misingilo di korolomo do kelaan. Ong i Lukas, minangambat iosido di duat di Teofilus. I Markus sinumusui di Petrus manarang di Habal do Kovosihan. Topot ong i Matius minogihim do vazaan mongimuhun dit ongoulun Kristian dit antad sid bansa do Yahudi.

- Kotolu, I gama dioti mangahabal okonko bai minggongou, inoi nga ihimon dioti it ambat dit ongoulun. Kodung orongou i habal dino om momoros-no it ongoulun dot, *Nunu-ka ot apatut do gamaon-za*, ka (UR 2,41; 2. Kor. 5,20b; Kentalangan 3,20)

Sabap ino, nipataud-no i Habal do Kovosihan sid gorija, supaya i gama pazasad sid ongoulun di habal dino pembulai di sokoviai i gama om vaza di Kristus manapul om posinang di riniba. Suvaiko ipat-ipat it ulun kopionong di habal dino sid dau om dau do kosusaan om kopurimon iosido di kotulungan di Kristus sid tanga di kahangkaban dau om onong-ogi banal i gama do gorija mangahabal om poromut di habal dino. Suvai kasamung it ulun di Yesus Kristus sid habal dino, ino Tuhan i manapul om mangatag di sokoviai it ongokosusaan do riniba sampai mangasip it ulun om muli-no sid Kinoringan do tumurut-no di kovosihan do Kinoringan om varo-ogi kogunaan di gama mangahabal. Sabap ino, i gama mangahabal okonko baiko mamaal di nunu-nopo it usuran di Yesus Kristus.

b) Jodizo dikou do koruhang-ku i sokoviai it ongobansa.

Suvaiko osimbanan i kobuatano dot ulun, ong atarang i tudukan di Habal do Kovosihan. A-milo-milo sumondot i Habal do Kovosihan sid ipat-ipat i ginavo dot ulun om momurimon di kosusaan om kahangkaban, korualan om kokurangan dot ulun do sampai momurimon it ulun do banalko nokorompok i Yesus sid dau do kobuatano. Suvaiko ohorotizan dit ulun dot banalko mongingut i Yesus pokoruhang dau sampai movozo-no it ulun dino om nokontok-ogi baanal i Habal do Kovosihan dino.

It ulun di kumoruhang di Yesus, ino-no, i sokoviai i kobuatano dau osimbanan-no sampai kopionong sid kobuatano di Yesus. Ensanan i koposizan dot ulun mopud sid vazaan om hoturan vagu. Duvo o hal dot ajadi, ino-no i habal dino sumampai banal sid ulun om varo timpa dot ulun om iri-ogi it ulun mamung sid guvas di Kristus, ino-no sid gorija. Iti-no i mad duvo laang dit iseso o panangan: **muli sid Kinoringan om mokipodsu**. Keso, tumolikud di ralan om kobuatano om kavazao laid diri om koduvo, mamung-no sid piniizaan vagu.

Ong pongoretan do Yunani METANOIA = monimban di ginavo, ko Ibrani SHUB = muli sid inantadon, mad duvo o vaza: keso, tumolikud di karaatan om tumoguvang sid Kinoringan sampai mamanan kumaa sid Kinoringan om koduvo, mangasip om humarap sid Kinoringan sampai mongimbulai di gama do samod. Suvai tumopik it ulun sid ralan, ong nakaharati i ginavo dau dot a-onong i kolombusan dau ponong sid rikoton dau. I kosimbanan do ginavo ko kopigontian di kobuatano dot ulun, suvai iosido kondiri ot anangan, iosido om i kavazao, gamaon om kobuatano dau. I Habal do Kovosihan palanta di gama monongkudau om i mokisasavat om i nunu-nopo i vaza dit amu onong, i mongorugi do koruhang ko sumamba sid ulun vokon. Ong kodung kopitoguvang di Habal do Hoturan vagu, a-milo-milo nga tumolikud it ulun sid hoturan laid om tumoguvang-no sid hoturan vagu. Manjadi kodung nokotoguvang-no sid Yesus Kristus, lumuu-no it ulun sid gama di Yesus om sumuhut di kobuatano di Yesus.

Manjadi it ulun di nokosuhut ino, amu-no tumanid sid intoronon dot aso't ulun, ko lumatang antad sid gama dau, ko mogidu sid varis om ongekob dau, inoi nga siri-no ko siri tumimpuun iosido sumuhut om movozo sid vazaan di Kristus. It ulun dino mongohondom om sumusui di gama di Yesus, hiza di nokopomoros i Yesus sid pomogunan dau sid Nasarat dot,

I Sundu di Tuhan o mozo-vozo dohon, tu nopili-oku-no dau do pahabal di habal do kovosihan sid ongoulun do mosikim. Sinuhu-oku-no dau pentahan sid ongoulun di nokotorungku do kolobusan om sid ongoulun do bolou do kemot-no vagu ioti, om sid ongoulun di nasaadan do varo-o kolobusan sampai pahabal-oku di toun dot avasih antad sid Tuhan.

I Kristus-no o Habal do Kovosihan, aso-no vokon o Kristus ot elaan om toguvangan tokou. Varo hiza do nolingang-no di gorija mangahabal i iadino. Vokon-no ong songkoboros di gorija do hal do kasalaan dot ulun, hampanoni do retanko kisala kavi, ka, dot aso tantu-tantu o gama pavalangan ko tuduon it ongokaraatan di nokosusut ko i nakalanta sid razat om isai-nopo. Na asimbanan i kobuatano dot ulun. Vokon-no i gorija ong pinosuhut dit ongoulun sid hoturan do gorija di nokensodu sid hoturan di Kristus. Manjadi ong amu olondok banal i kasalaan, amu atantu i kovosihan di mangada di sala dino.

Pengkaa dino i kopomodusan, ino kopioomungan dit ulun sid guvas di Kristus om i gorija. Rom 6,6:

Amu-ka elaan dikou dot i tokou sokovia i nopodsu mamung sid di Kristus, tantu sid kinapatazan dau o kinopodsuan om kinoomungan tokou?

I kopomodusan dino mad tanda do koulian dot ulun sid Kinoringan. It ongoulun vokon o kemot dot nokouli-no sampai nakasip-no it ulun dino sid

Kinoringan. Sabap ino, i gama pajadi dit ongoulun om ongobansa do koruhang di Yesus, ino-no o harati, popiamung dit ongoulun sid gorija. I gorija ajadi dot ongkob vagu om kovorisan om kopiobpinezan di mongopud sid kopioondusan om samod do Kinoringan om i piniizaan di Sundu dot Osusi. Na i gorija iadko sikul om ipat-ipat it ulun di nakamung-no, nga sumurut-no kumansang om sumukod-no sid gama pazazad om sumasi di Habal do Kovosihan, tu nakamung-no iosido sid piniizaan di posuntu di gama di Yesus om i Habal do Kovosihan.

c) om tudukai-no dikou ioti sumuhut di nunu-nopo i niimuhun-ku sid dikou. I gama sumuhut di Yesus okonko hal dit oduruk om opongo-no, ong kodung nokemumui-no. Gam pempatai-no dot aso-no kapangaan om aso-no kotulukan. Ong misisingilo do nunu-nopo songkotukangan, tolu ko apat toun kapaas-no sampai galaman-no. Ong kumurusus-po dot a-ko piro toun tumukang do iadino, sampai ajadi iosido do guru, retanko mosital do kotukangan. Minsanko lawyer ko dokutol, varo hiza do nokelo-no kavi sampai kigalar it ulun dino. Topot ong Kristian, pempatai nga amu-po opongo sumikul sid di Yesus om sumuhut di kenginan dau.

I Sundu o monuduk dikou di sokovia i hal dino sampai popuhondom dikou di nunu-nopo i noboros-ku sid dikou, ka di Yesus sid Yahya 14,26.

Boros di Paulus, ikou dino iadko babaal di napakai-no sid puvalazon. Nakavantai-kou-no sid ongorasul om it ongonabi. Ioti dino nokototol sid origi do kongkod, ino-no i Yesus Kristus. Iosido o kopihatan om kapangaan di valai dino. Efes. 2,20. Boros di Paulus sid di Timotius: Kovidai-no it nanu-nu sid dohon. I kosipan om i samod sid di Kristus Yesus o monunda dikau. (2. Tim. 1,13) om Pahabaro-no i boros do Kinoringan do kada-no ponodiri do kotibang ko amu it ongoulun mongining. Potolunungo-no i malid, poniag-no om ponginsasamod-no dot alanut o gama-nu mog-kovosihan. (2. Tim 4,2)

I Sundu monuduk dit ongorasul om it ongorasul minongolombus sampai sid di tokou, supaya ilombus vagu antad sid di tokou i Habal do Kovosihan sid isai-nopo i kamung sid piumpugan. Ong i gulu, asarok dot amu kopionong i gama do gorija mangahabal di Habal do Kovosihan om i kobuatano, tu okonko antad sid iseso o ginavo o gama mangahabal. Amu kopionong i gama mangahabal om i kososizan di kobuatano do gorija. Mongingut dara i kabang om boros do gorija, topot moniag ong i kobuatano do gorija. Mongodim ong i habal, nga monunsub ong i gagamao sid ongoulun. Habal dara do kovosihan ot ihabal sid ulun do mosikim. Topot i gorija kondiri o lumundu sampai

monguripon dit ongomosikim. Habal dara do kovosihan bahagi di sokoviai it ongoulun, nga monodiri i gorija dit ongobansa, momingig banal di puhavang om uripon ko usan-usan om panambat sid tinoguvangon do Kinoringan. Iti-no o sabap dot osusa i gorija momorisa di kondiri, supaya i kobuatano do gorija amu monunsub dot ulun ko mongohigong di ralan dot ulun muli sid Kinoringan.

Ong otunda-no it ulun di mangasip do tumorontog iosido muli sid Kinoringan om humarap sampai monimban di kobuatano dau, isuhut di hoturan vagu, sumukod-no iosido sid karangka po di Kristus (Efes. 4,13) Manjadi i Sundu dot Osusi monulung dit ulun om i gorija tumorontog. Ong varo kolonduan dau, kondiri di Yesus o minamahanda di kotulungan di Sundu dot Osusi sid Yahya 14,26 om 15,26:

Ong rumikot i Monginsasamod, i suhuon-ku sid dikou antad sid Ama, ino-no i Sundu do kabanaran it antad sid Ama, iosido-no o pasasi dohon om mangagazad dikou sid katapatan.

2. I gama sumasi

Nunu-ka i harati ong sumasi di Habal do Kovosihan om nunu-ka i pitonidan ong sumasi ko mangahabal ko monuduk? Pengkaa dino, ong sumasi, katalib-po di gama di baiko mangahabal, tu it ulun di kumiboros dit ulun vokon di sid kosusaan, nga momurimon di kosusaan it ulun dino, kapatazan, kasalaan, kohukuman, kaadaan do sala ko kabanaran om kolobusan. Sid saralom dinot ongokosusaan dino orongou dau i habal do Kovosihan di banalko kiguna. Amuno rumosi vagu iosido ko lumungui, inoi nga elaan-no dau do varo katagan. Antad sid ginavo dau o kotontuan do varo kotulungan. I gama sumasi sid ulun di iadino iadko mamanal dit otopot. Mamanal di Habal do Kovosihan kopionong di kosusaan dau. Ino gama mamanal okonko bai mad avantang o tuturan, inoi nga i habal di kiguna, tu posinang dit ulun. Imatai sid Yesaya 42,6:

Boros do Kinoringan, Ioku-no o Tuhan i minongodim dikau om tinahakan-ku ikau do kuasa do pengkakat di kabanaran sid sompomogunan. Ikau-no ot onuvon-ku do panganavau di sokoviai it ongobansa. Ikau-no o posirok dit ulun dot bolou om palabus dit ulun di nokotorungku, ka.

43,10: Ikou-no it ongoulun dot Israel o sisi-ku dot onuvon-ku dot uripon-ku, supaya kelo-kou dohon om kasip sid dohon om kaharati-kou do baiko ioku-no o Kinoringan, ka.

Ong sid Kitab Vagu varo-po harati di pongoretan sumasi dot, mamanal di Habal do Kovosihan pempatai. Minsanko anangan dot ogusa, ko opogos ko

osunsub ko apatai dot ulun, nga kakali sumasi-nopo, Mat. 10,17:

Boros di Yesus, Ontupato-no dikou it ongoulun, tu varo poruput dikou sid pihukuman om alapos-kou-no sid ongopanambayangan dioti. Agazat-kou-no sid tinoguvangon dit ongopomorinta om it ongoraja, sabap gima i ngaran-ku, tu pasasi-kou sid dioti om it ulun dit a-kasip.

Sabap ino, i gama mangahabal di habal do kovosihan, okonko bai mamanal dit usuran di Yesus sid isai-nopo i sid suvang do pomogunan, inoi nga mamanal di kabanaran di habal dino. Ino-no o kosondoto:

- Keso, sumasi dot otopot ino kinorikatan di Yesus antad sid Nasarat. Boros di Petrus sid UR 10,39: *Iokoi-no diti o nakasasi di nunu-nopo i ginama di Yesus sid Yahudia om sid Yerusalim, nisangkap iosido dit ulun do Yahudi.* Iti-no o tinomod do mongimbulit di boros om gama di Yesus sid ongoulun, tu mad akanon om kokorui di gorija sid tanga do ralan sumuhut sid ongoihud di Yesus.

- Koduvo, i gama sumasi iadko momihot om mangalapis di kabanaran di Habal dino. Pengkaa dino i harati di boros di Yesus sid kinoruhangan dau Luk. 24,44-48:

Iti-no i boroson sid dikou di kakal-oku-po sid dikou diri. Amu milo dot a-otuluk kavi i noboros sid Kitab, ka dau om tinalahas-no dau it ongoginavo dioti, supaya ohorotizan dioti it onghal do Kitab om om pomoros-no vagu iosido sid dioti dot, Nokosurat-no laid do iadino i kapagasan di Kristus. Topot adau-po do kotolu ogulian-no iosido antad sid ongoulun minatai sampai varo-no mangahabal sid sokovia i it ongobansa di vazaan muli sid Kinoringan om i kaadaan do kasalaan sid saralom di ngaran di Kristus dot ino dino tumimpun-no sid Yerusalim. Manjadi ikou-no dino o sasi di sokovia i nongojadi dino, ka dau.

I sokovia i nongojadi dino, ka di Yesus, ino-no i gama dau monuduk, i kasansaraan om kinapatazan dau om ogulian-no antad sid ulun minatai, dot i kogunaan dino kbuatano dau dino, ino-no i kembulazan di vazaan muli sid Kinoringan, i kaadaan do kasalaan bahagi dit isai-nopo i mangasip sid Kinoringan. Na sid Usuran dit Ongorasul varo boros dot, *varo kososizan dit ongorasul do iadino, isuhut di niboros laid di Yesus sid dioti* UR 2,32; 3,15; 1,21+22.

- Kotolu, i gama sumasi o mamanal om momihot di katapatan do Kinoringan. Tu i habal do Kovosihan o pembulai om pentalang do Kinoringan sid ongoulun dit a-po kotolunung banal sid Kinoringan. Sabap ino i gama sumasi o mamanal dot i kongkod di sokovia i koposizan, ino-no i Kinoringan. Nokokondiri i Kinoringan minongimbulai di gama sumasi di iadino sid gama di Yesus: Yahya

1,14+ 17 +18.

I boros (do Kinoringan) jinumadi do riniba sampai nokentoron sid di tokou om nokemot tokou di kohormatan dau, o ino-no i kohormatan dit Anak dit iso-no it antad sid Ama, noponu do kovosihan om kabanaran. Manjadi i tokou sokovia i nokotorima antad sid karangkapan dau sid kovosihan om kosianan. Iso't ulun nga aso nokemot do Kinoringan. Baiko it Anak dit iso-no i nokentoron sid kangkab dit Ama, iosido-no o minongovit di habal antad sid dau.

Kodung nokoriniba i Kristus, varo-no kososizan di katapatan do Kinoringan sid riniba. Tu i Kristus o sinumasi do nokemot om nokopikangkab di Kinoringan. Boros di Yesus sid di Pilatus (Yahya 18,37)

I sabap di kinojodizan-ku om kinorikatan-ku sitid vinangun, ino-no, i gama-ku sumasi di kabanaran. Ipat-ipat it ulun di nakantad sid kabanaran, ino-no o mongining di dolou,ku, ka.

Pengkaa dino i Sundu dot Osusi o sumasi di katapatan om iosido nga Sundu di katapatan, tu antad sid Ama om mongontok dit Ama om pembulai di kasandatan di kabanaran sid riniba. Yahya 14,26:

I Sundu dot Osusi, i suhuon dit Ama sid saralom di ngaran-ku, iosido o monuduk dikou di sokovia i hal dino sampai popuhondom dikou di nunu-nopo i noboros-ku sid dikou, ka di Yesus. Yahya 15,26: ong rumikot i Monginsasamod, i suhuon-ku sid dikou it antad sid Ama, ino-no i Sundu do kabanaran it antad sid Ama, iosido-no o pasasi dohon. Topot ikou dino, nga sasii, tu nokovo-ko-kou-no dohon antad di tinimpuuni.

Manjadi it ulun di mangasip, nga sumasii, isuhut di kososizan di Sundu dot otunda it ulun dino di Sundu dot Osusi. (UR 1,8) *Ong ikou dino, amu-no alaid om kotorima-kou-no di kuasa di Sundu dot Osusi sampai ajadi-kou-no do sasi-ku sid Yerusalim om sid Yahudia om sid Samaria sampai sid pentongkop do pomogunan, ka di Yesus. Kagi, nopurimanan-no om notudu-no di Yesus ioti do kinoruhangan (Yahya 20,20) Noboros-po i iadino, nipemot-no di Yesus dioti i palad om it obik dau. Na banal-noko tinumomon i kinoruhangan, tu nemot-no i Tuhan ko i Tomas sid 20,29-31: Kasip-ko-no dino, tu nemot-okou-no dikau. Osinang-no it ulun dit amu-po-ma nokemot, nga kasipi, ka di Yesus.*

I gama sumasi okonko tomodon om gamaon dot ulun antad di kondiri dau, inoi nga suvai notudukan om notulungan di Sundu dot Osusi. Varo boros di Yesus sid di Nikodemus sid injil di Yahya 3,3 dot, *Isai-nopo it amu-po nakalandai vagu antad sid savat, amu kemot di karajaan do Kinoringan, tu suvai jumadi do sasi ong nokemot om nokopurimon kondiri di gama di Yesus.*

Topot kodung nakaharati-no di kabanaran, mad nemvagatan-no it ulun di nakasip dino. Tu isai-nopo i nokopitoguvang-no do Kinoringan, a-milo-milo sumasi-no iosido dot i Kristus-no o Tuhan di dau do koposizan om Tuhan di monguasa di sokoviai sampai sumasi dot i Kristus-no o kongkod di nunu-nopo i sid suvang do pomogunan, antad di kodori om sampai penlaid. Amu miuma do sumasi do nokositi sid riniba i Yesus Kristus dit insani di kodori banal diri, iadko notoliban-no. Inoi nga kiguna ino gama di Yesus diri sampai bianco, tu minsanko bianco, nga monguasa i Kristus di sokoviai om mongohoturan di sompomogunan. Om nunu-nopo i tudukan om ira dau, nga kiguna sid ipat-ipat it ulun. Ino-no o kasandatan, potoguvang dit ongoulun ko i porinta, ko nunu-nopo songhal sid hoturan vagu sid di Kristus. It ulun sid simbol ko isai-nopo i koruhang, a-milo-milo okodim iosido di habal di Yesus dino sampai a-milo-milo tumimpa it ulun di kodim dino.

Ong imbulito-po vagu om onsizon-po, pengkaa dino, I Habal do Kovosihan, ino-no i habal dot avasi dot i Kinoringan om i Yesus Kristus o minanapul di songriniba. Iti habal diti pentahan do nokotimpuun-no i hoturan vagu do Kinoringan dot iosido o mangahatul di sompomogunan om monuluk di nunu-nopo i kovosihan dau sid songriniba. Ino habal dino pembulai di kenginan do Kinoringan om posuhut dit ongoulun sid kabanaran om kopioondusan om samod dau.

I kongkod di habal dino, ino-no i Yesus Kristus. Iosido kondiri o najadi i habal do kovosihan. Sid gama om koposizan dau o minongimbulai i Kinoringan di hoturan vagu om i kenginan dau om i kotulukan di kenginan dau dino. Ino habal do kovosihan o mongodim om mongingut, okonko baiko pazazad om pentahan o habal. Gamko mongingut do kusai om ondu, anak, osukod do tumolikud sid karaatan om tumoguvang sid Kinoringan sampai muli sid Kinoringan om mangasip sid di Yesus om mamung sid piniizaan dau. Isai-nopo i mamung, nga kadapat-no do koposizan vagu. Manganu iosido do kadaan do sala dau. Embanaran iosido om inandus do Kinoringan iosido. Kezo-no iosido sid gorija di Kristus om uva iosido di randavi di vangun vagu, dot ino dino, nga ginama di Kinoringan sid vaza di Yesus Kristus. Iosido dino o tanda do kabanaran om samod om kopioondusan di karajaan do Kinoringan.

Kompusan di habal do kovosihan, kuran o kosuruto? I habal dino okonko baiko hal do pongitungan om keloo, inoi nga i habal do kovosihan o papagavi dit ulun sid gama dau di nunu-nopo. Suvai it ulun manalin di habal do kovosihan sid kobuatano dau om gama dau, i piniizaan dau songkoruhang, sid gama monulung di vokon om mongopud di vokon, monginsasamod di vokon

om i nunu iadino suvab-suvab, iri-ogi tumandon i habal do Kovosihan sid pomogunan om sumuni sid tanga do riniba om sumurut-po om monguva, sid somok ko sid sodu, sid songkoruhang ko sid ongoombuvoi.

Ong kodung iadino i gama dit ipat-ipat it ulun di mangasip, i gorija okonko bai rumamit om tumorima di habal do kovosihan, inoi nga polombus om mamasi om pasasi sampai mongopud di habal om kodim di Kristus sid isai-nopo i vokon. Ino-no i habal do kovosihan di gorija, Habal do kosinangan di nosorou-no laid di nabi Yesaya om tinuluk di Yesus Kristus sid boros om gama dau. Iti-no i tugas do gorija, polombus-po dino habal dino sid pentongkop do pomogunan. Ong sukul mangasip i gorija sid gama mongolombus sid sompomogunan i habal dino, tantu i gorija otopotko bansa do Kinoringan ko guvas di Kristus om valai dit inintonon di Sundu dot Osusi sampai monuluk i gorija di tugas om mission dau di mad nabi om imam om mangahatul i gorija do sompomogunan.

MISI OM EVANGELISASI

MISI antava Mission, ino-no o harati: kitugas do papanau om posurut do tugas. Varo't ulun do potugas ko monuhu di mongontok di monuhu. Iri-ogi it ulun di kitugas ko nosuhu, iadko kondiri di minonuhu o rumikot. Ong sid Kitab, i rasul o ponuhu di Tuhan, mongontok di Tuhan om posurut di gamaon di Tuhan. Iti-no o sabap dot atag do monodiri:

i monuhu > i ponuhu > panangan di suhu.

Kinoringan-no o manamod di riniba, nga okonko kondiri di Kinoringan rumikot, inoi nga minonuhu di Yesus om iri-ogi i rasul porikot di samod do Kinoringan sid riniba. I Yesus om i rasul mongontok di Kinoringan. Sid Matius 28,16-20 mongolumbato i Yesus di kuasa dau do monuhu om iri-ogi manarang di tomodon dau monuhu, ino-no i panangan do papanau di kinoruhangan dau pokoruhang, monuduk om momodsu dit ulun, tu ioti dino ponuhu di Yesus. Sid Yahya 20,21-23 varo vagu boros di Yesus, di nogulian-no iosido do kikalas iosido di nasangkap (di nadamat do paku om bilok i palad om hakod om it obik dau): Iadko it Ama di minonuhu dohon o gama-ku monuhu dikou, ka, om minomoros-no vagu dot, Torima-kou-no di Sundu dot Osusi, ka. Varo-po sid Yahya 13,35: Ong varo gama dikou misasamod, ino-no i pogintutunan di sokoviai it ongoulun dot koruhang-ku ikou, ka di Yesus. Pengkaa dino, sid Yahya 17,21 kembulai dot, i piniizaan dit ongoulun Kristian o vazaan manarik om pemumui dit ongoulun sid kosipan.

Ong mamasa tokou dit Injil di Lukas om it Usuran dit Ongorasul, atalahas banal dot i tinomod di Lukas monurat, ino-no, manarang iosido di gama di Yesus di sid pomogunan iosido om i gama om vaza di Yesus papanau om monuhu di kinoruhangan om rasul dau (UR 1,1-4 om Lukas 1,1-2). Sid Usuran dit Ongorasul i Lukas monuturan-no vagu dot i Tuhan Yesus o minongonsug om minonuhu di Stepanus, ko pinapanau di Pilipus om minongodim di Paulus. I Sundu dot Osusi o mangahatul dioti, moniag do panahon, iadko ponong sid Galatia, monuhu di piumpugan sid Antakia do papanau di Paulus om i iadino. I Sundu potupak di Paulus antad sid Troas kumaa sid Europa. Kondiri di Paulus sumasi Rom 1,16 dot *amu kamalu dohon i Habal do Kovosihan. Sabap i habal dino kuasa do Kinoringan di manapul dit ipat-ipat it ulun di mangasip... om 1. Kor. 9,16: Kosusa dohon ino ong amu-no ihabal-ku i habal dino.*

Ong Evangelisasi, iri-no o harati: monginjil ko posurut di hal dit Ongoinjil! Na i hal do ponginjilan okonko bai kiroon ko kenginan di Yesus om it

ongorasul ko isai-nopo, inoi nga suhu do Kinoringan. Ong it Injil Yahya monuturan om mongusul, dot ingapat nopod pomoros i Yesus dot, Sinuhu-oku di Ama, ka ko, I Ama o minonuhu dohon, ka. Imatai-no sid Yahya F. 3,17+34; 4,34; 5,23+24+30+37+36+38; 6,29+38,39,44; 6,57; 7,33,16,28; 8,16+18+21+23+25+42; 9,4; 10,36; 11,42; 12,44-45+49; 13,20; 14,24; 15,21; 16,5; 17,3+8+18+21+23+25; 20,21.

Iri-ogi i Yesus minomoros sid kinoruhangan dau dot,

Iadko i gama dit Ama monuhu dohon o gama-ku monuhu dikou, ka. I harati, i tugas dit inanu di Yesus antad sid Ama dau o nokolombus sid di tokou. Ino tugas di Yesus diri,

- binanal-no dit Ama dau (F.3,16-17; 4,20; 17,2)
- sinukung-no dit Ama (F. 4,23; 5,19-23; 6,44;14,10
- pinongo dit Ama(F.8,54; 12,28; 17,1)

Topot i sinumuhut di Yesus posurut di tugas dau, ino-no i gama dau: monuluk di kenginan dit Ama (F. 4,34; 17,4;) sid boros dau om sid kobuatan om gama dau: (F. 5,20 +36; 10,32+38; 15,3+22+24; 17,6; 19,30;) Iri-ogi it ongoulun di nokokondiri tinumoguvang di Yesus minongining sampai tinumimpa di boros om gama dau: F. 3,16b; 5,24; 8,24; 17,3; 20,31; om pinolombus-po sid ulun vokon di habal om gama dino: F. 4,38; 13,34-35; 15,27; 17,18; 20,21-23; 20,30-31.

Manjadi iseso it onsi di Misi om Penginjilan, iri-no ko iri ot inantadon. Topot ong engin monodiri:

Misi manarang om pohodtol di tugas antad sid Suhu di Yesus sid ongoulun dit a-korongou i Habal do Kovosihan..

Monginjil manarang di gama posurut di Habal do Kovosihan di siombo-nopo o varo't ulun Kristian, supaya sumurut i kohorotizan dioti sid Habal do Kovosihan om tumatap sid kosipan om koponulukan di kenginan do Kinoringan. Sabap ino, sokoviai i gama do gorija antad kavi sid hoturan di Habal do Kovosihan, sokoviai i gama do gorija nga retan do penginjilan, ong sukul amu olingan di gorija i tugas dau. Ong olingan, tantu ponong sid karaatan o rikoton, tu mad monobon ko mangalalau om moniag dit ongoulun vokon sumuhut di kenginan do Kinoringan, tu i kondiri dioti, nga amu-no nokosuhut.

Pengkaa dino, i sokoviai i gama dit ipat-ipat it ulun Kristian ponong kavi sid penginjilan, ong sukul konong i gama dino. Topot ong amu onong, mad araat o suntuan tokou bahagi sid habal do kovosihan.

NUNU-KA I HABAL DO KOVOSIHAN?

Markus 1,1: *Iti-no i kinotimpuunan di Habal do Kovosihan, ino-no:*

1,15: Nokorikot-no i karajaan do Kinoringan.

I Habal do Kovosihan = I Yesus kondiri, okonko i buuk, Kitab ko it apat Injil di Matius, Markus, Lukas om Yahya, inoi nga i Yesus antad sid Nasarat, i nopungaranan-no dot, I Kristus, ko Almaseh ko Minananggung, ko i Manapul, ko it Anak do Riniba, ko it Anak do Kinoringan.

Lukas 4,18: Boros di Yesus: I Sundu di Tuhan o mozo-vozo dohon, tu nopili-oku-no dau do pahabal di Habal do Kovosihan sid ongoulun di mosikim. Sinuhu-oku dau pentahan... do kolobusan ..sampai pahabal-oku di toun dot avasih antad sid Tuhan, ka om 4,21: Bianco diti notuluk-no i boros do Kitab dino sid tinoguvangon dikou, ka di Yesus sid Nasarat.

Manjadi kuran-nopo i gama pasasi, pembulai, pavalang, manarang, posondot om paharati kananganko i Yesus, nga ino-no penginjilan, ong sukul avalang om amu atabanan ko olingob om orindingan di gama-ku, gima i kobuatano-ku dit amu mionong di boros-ku manarang.

Suntuan: Varo boros dot ulun Afrika diri sid misionari dau: Ino buatan-nu om ino gama-nu lobipo apatong mantadko i boros-nu om tudukan-nu, ka. Bai osusa tokou mongoduat, kuran di misionari diri, Amu-naku elo iosido momoros di boros dot ulun sori, ko i tudukan dau om i kobuatano dau ot amu mionong, iadko it ongo-parisi i hiza di Yesus diri (Matius 23) di minonuhu monuluk di hinotusan ot undang-undang, dot ioti kondiri aso kiroon do sumuhut om monuluk ong i kondiri dau.

It injil Yahya manarang dit a-ko piro o tinomod dit penginjilan:

- Sid F. 20,30-31: *Topot i nokosurat-no siti, nga ino-no i tomodon dot ikou nga mangasipi dot i Yesus dino i Kristus, supaya kadapat-kou di koposizan sid saralom di ngaran dau.*

- I tinomod dit Injil okonko iadko Tata Hukuman mangarait dit ongosala om ombo it a-nonong, ino-no i nokosuvang do sala, inoi nga ponong sid kavantango om katagan o boros di Habal do Kovosihan. Okonko iadko i pinonuhuan di Musa dit atandas: Kada, Kada, kada, inoi nga isuhut di pinonuhuan dot asamod: Manamod-kou-no ko, Samadai-no dikou i Kinoringan om i sid simbol ko it ulun vokon dit osomok sid dikau, ka.

Ong it ongoulun do Yahudi minangazazak di hopod pinonuhuan di Musa manarang dot sampai 666 paras o pinonuhuan om pinoniagan: Topot ong i Yesus tinondugu-no sid iso ot ayat sid Habal do Kovosihan, ino-no. Yayha 3,16: *Banal-noko minamanod i Kinoringan do riniba sampai supaya ipat-ipat it ulun ... kasanganu di koposizan penlaid, ka.*

Ong sid Yahya: **Koposizan penlaid**

ong sid Matius : **I karajaan do surga (4,17, 6,33)**

ong sid Markus : **I karajaan do Kinoringan (1,15)**

I panangan om rikoton tokou

Sabap it ongoulun do Yahudi amu katama mangarait di ngaran do Kinoringan, minamakai-no ioti di pongoretan dot "surga", ong i Matius, tu ulun do Yahudi, surga o pinongoretan di minonurat iosido dit Injil dau bahagi dit ulun Kristian di bansa do Yahudi. Sabap koubasan dit ulun Yahudi ong kodung noboros o surga ko avan, mad Kinoringan-no o noboros (Mat. 5,34-35)

Nunu-ka ot onsi di Misi? Ong i Yesus minomoros: Piguli-kou-no sid Kinoringan, ka. Ino-no o harati, it ulun di nokedu-no sampai mad nolingan-no do siombo ko isai i Kinoringan, nga kakali i Kinoringan ot inantadon om koposizan dau, tu i Kinoringan o minongurug di riniba (Kinotimp.1-2) Ong miguli-no vagu it ulun sid inantadon dau, iadko it anak dit andaman-no sid tanga do kosusaan do varo molohing dau sampai muli-no vagu om ajadi-no vagu dot anak iosido di molohing dau. Ino-no o harati, nokouli-no sid Kinoringan. Na vokon-no ong osimbanaan-no i gama monginjil sid gama pakaraat dit ongoulun om monuhu do mokiada di kasalaan om mamajal banal dit ulun sid gama mangarait di sokovia i karaatan om kasalaan om kobungahan dau. Topot ong i Yesus kondiri om it ulun di kumavid di tugas dau do Misi, mongonsug om mongingut sampai mongoligou dit ulun di sid tanga do kosusaan om kosoduvan antad sid Kinoringan, supaya it ulun dino humarati dit inantadon dau sampai muli-no vagu iosido mamung sid katamanan sid Kinoringan. Noligou-no iosido sid kapagantangan, sid poginakanan do Mogontong (Luk. 14) Ino-no i Habal do Kovosihan: it ulun di nokotorungku, varo-no kolobusan, it ulun sid kotuvongo, nga kouli-no sid kanavahan, it ulun dit agazo ot utang, nga varo-no minangapus dit utang dau. Okonko i gama rumonok do Kinoringan o pemumui dit ulun, inoi nga sid gama kaharati di kogozoo di samod do Kinoringan om mangasip sampai humarap iosido di koposizan vagu. Banal-no, ong kodungko tumoguvang-no it ulun sid Kinoringan om sid vaza ponong sid Kinoringan, ino-no o harati, nokotolikud-no iosido sid karaatan om i kobuatano laid om i kotuvongo om i kinuripanan, ino-no i hoturan di minongorugi dit ulun, sampai nokotolikud-no iosido sid ongokuasa vokon di minomorinta dit ulun diri, iadko it ongorogon diri, ko it ongorogon vagu di mad kinomol, mokilalaba, monongkudau om i nuu-nopo it ongohal di moniim momorinta om monguripon dit ulun dot iseso iosido koturidong ponong sid Kinoringan.

Na i vaza di Yesus pentalang di Habal do Kovosihan minamakai iosido di pongitungan om i kelaan dit ongoulun diri. I samod om kenginan do Kino-

- ringan (dit a-emot) dit inovit di Yesus sid riniba, minanarang iosido sid
- panganavau do pomogunan (Yahya 8,12 om Matius 5,13) di sid tanga do kotuvangan di manganavau dit ensanan i vinangun. Nakalanta-no kavi i kobuatano dot ulun, ombo it amu kalanta-no om atag-po i ralan kumaa sid Kinoringan. Varo-no ong sid
 - pembulai-oku di kalaba do kopoulosan (Yahya 10,10) ko
 - Alus-no i dohon do solungan om agaan o boboon, okonko nemvagatan dit adat om undang-undang dit orugi banal, isuhut di gama dit Ongoparsisi posondot di pinonuhuan. (Matius 11,25-30, Yahya 12,47 om 8,15)

I tugas di Yesus, di nakaraliu sid di tokou:

- posurut di gama dit Ama om i kenginan do Kinoringan (Yahya 5,30; 6,38) pasasi dit Ama (Yahya 3,11+32; 5,19; 6,26+28+38+40; 14,9)
 - manahak di kopoulosan penlaid (Y.F. 3,16; 4,10+14; 10,10; 17,2; 20,30-31)
- Kagi, varo tomodon sid gama monuhu, Okonko baiko tomod monuhu, ko sukul monuhu, inoi nga varo panangan: **supaya** ... F. 3,16+17; 10,10; 1,7a-8; 1,31; 17,21+23; 16,13-14; 17,17-20)

Tanid mantadko it ongojinil vokon di manarang di kopomodsuan do tanda do kamung-no it ulun Kristian sid piumpugan, om i poginakanan di Tuhan Yesus o tanda di piniizaan sid Yesus Kristus, it Injil Yahya manarang di tinomod di **kopomodsuan** sid hal vokon, i retanko

I KALANDEZAN VAGU ANTAD SID SAVAT (Y.3,3-8)

om I VAIG DOT OVUD (F. 4)

om I NOSUSI-NO DI SUNDU DOT OSUSI (F. 3)

sampai I KOPOSIZAN PENLAID (iadko sid savat)

om i hal di **poginakanan di Tuhan Yesus:**

I KAKANAN DO KAPASI (F. 6,31-59 13,1-17; 13, 34-35; 15, 9-17)

Nihodtol banal di Yesus i kopiizaan sid poginakanan diri di minomoug i Yesus di hakod di kinoruhangan dau. Pengkaa dino, i suriban di puun dot anggur kananganko i piniizaan dot ulun Kristian suvai kototol sid puun om opud-ogi, ino-no i Yesus o puun. Varot a-kopiro o suntuan om suriban di Yesus manarang di Habal do Kovosihan dit amu oruhai tarangan, supaya aramit dit ongoulun.

I Yesus o posuntu di gama monginjlil

Sid iso o tuturan di Kitab muonsi tokou sid vaza di Yesus monginjlil om posurut di tugas ko misi dau: Sino dino momorisa om mongimpuras tokou di gama di Yesus diri om it ondu do Samaria sid talaga di Yakub Yahya 4,1-42.

It Injil di Yesus okonko iadko piring ko i kaset di kapasang-po sid enjin, nga kidolou-no do montou-lontou sid isai-nopo it ulun dit osomungan di Yesus. Gam i penginjilan di Yesus kopionong dit ipat-ipat i situasi dino.

4,1-3 I rikoton-no dara di Yesus sid ongoulun do Yahudi. Topot amu tinorima iosido dioti. Iadko noboludan i vazaan dot Injil. Iri-ogi minogidu-no i Yesus kumaa sid Samaria, ino-no sid ongoulun di retanko ulun do labus. Nokembulai-no sid Samaria di hiza di Yerobeam (930 TGM) it ugama vokon. Kagi, i narakop-no it ongoulun dot Israel inovit sid Assur (Irak ong biano) TGM 722, varo-not ulun vokon di nokosuruvang sid Israel Utara (ko Samaria) di banalko tanid o kosipan di nakagavul sid ugama laid it antad sid Yerobeam. 4,4 Baiko minaza dara i Yesus sid Samaria dino, okonko sino o rikoton.

4,5-6 Anaru i gama di Yahya manarang di situasi om i pinonginjilan di Yesus di hiza dot ohuzan om vitilon om tuliohon sampai losuan-po i Yesus dot adau. Mad opupusan iosido dit ongoulun do Yahudi sampai mad osusa-no dot iduanan.

4,7-8 dot tigogi, kopitoguvang di Yesus om it ondu do Samaria, inot ondu dino kikhizon sid kampung dino. Iti-no o sabap do hizaon dit ondu do sumakai it adau sumagou, tu asot ulun sid talaga dino. Rumosi it ondu dot apajal ko agauk om ousiba iosido dit ongoondu do kampung. Sabap it ondu dino banalko monongkusai, varo iivoguvan om pajalon it ondu dino.

Na i Yesus amu tumimpuun monuduk om monginjil dit ondu dino, gam mokitahak-po dot inumon om manarang di dau do kokurangan. Ino gama di Yesus dino amu sinumuhut di koubasan dit Ongoyahudi diri: keso ong iseso ot ondu om kusai, amu atag do miboro-boros, ong okonko kikoruhang, lobipo, ong ulun do Yahudi, tu amu gumavul ko kumiboros dot ulun Samaria. Kagi-po inot ondu di sinumagou dino di hiza do mogom-ogom i Yesus sid talaga, ondu dot okonko baiko akanggau, gamko ogilat ko akahag sampai bansa dit amu pisuau dit ulun do Yahudi, tu it ulun do Samaria, minsanko misirok dit ongoulun do Yahudi nga amu. Lobi-po ong inot ondu dino, tu minsanko sandad ongondou, nga amu-no katama mobpuput, tu ulun do borosala. Na hiza diri, atalahas-no dot amu nokosodia i Yesus do monginjil dit ondu dino, baiko pinogili-po sid ondu di sampit dau, nopupusan-no, do niopung do koruhang, tuliohon-po. Sid ayat 8 manarang-ogi i Yahya dot aso sino i kinoruhangan di Yesus.

4,9 Mad natanapan i Yesus, koluu dot amu-no andaman dau dot omba it atag om amu, sampai inot ondu dino, nga katama-no mamalang dit amu atag i kavazao dau. Inot ongoulun do Samaria ong kodungko kasamung dit ongoulun do Yahudi, kopurimon-no di gama dioti kumihi di bansa dau, tu kumiboros,

nga amu, tobion nga amu, salamaton-po nga amu-no. Gamko asakahan it ongoulun dot Yahudi di Samaria, tu tai o kematan, lobi-po ong inot ondu, tu kingeran dot araat, tu kikihizon, laladtakon om pangangada iosido sid kampong dau.

Na i hiza di mongiseso dara iosido sid talaga dino, tu rumosi dot osomungan om toroon dot ulun om sandad ongoondu, tigogi varo kusai dot ulun Yahudi kumiboros dau sampai mokisagou dau dot inumon sino. Iadko kusai di banalko arampus. Tu it ongokusai sid ongoulun do Yahudi di hiza diri amu mongoguna dit ongondou, piradoni do dupot ko barang ko bai pangazam it ongondou.

Na sabap tu iseso it ondu antad sid kampong dau dino, aso mangahabal-ko kasasi di dau do karaatan, amu minogidu it ondu dino sampai nakatama-no kumitoguvang di kusai sid talaga dino do nivuvud-no pavalang sid kusai i kavazao dau. Ino-no, ong iseso ot ondu sid talaga, amu kavasa dot isai-nopo i kusai tumoronong, lobi-lobipo ong it ongoulun do Yahudi, tu gam amu kumiboros dit ongoulun do Samaria, ino-po-ka om mokitahak dot inumon o kavasa.

4,10.. Topot varo daialog dioti do miontok di kosusaan dit ondu dino. Manarang i Yesus do varo tahak antad sid Kinoringan sampai iosido-no o polombus di tahak dino, ino-no i vaig antad sid ovud do kapasi, i kopomodsuan om koposizan penlaid o boroson di Yesus. Sid boros di iadino mongonsug i Yesus dit ondu pogili di dau do kenginan om harapan.

Ong it tumimpuuni, it ondu mongitung dot i kusai dino uluni do kapadatai, tu kisasagou, kipolihan sampai iadko sandad kusai iosido, tu amu nikokihi. Tinarangan-po dau i sanganu di talaga. Nakatama-no iosido monginsosok sampai binokulianan-no dau it ulun dit osumbung om oburuvak sid talaga dino. Tu retanko varo-po panagahan do vaig tanid mantadko sid talaga dino, do gam amu-no tuliohon it ulun ong kenun. Gam minokinun-no it ondu do Samaria dino. *Penumo-okun-no di vaig dino, supaya amu-no tuliohon-okun-po vagu.* Mad kenginan dit ondu dot edu-no i kosusaan do sumagou, kokiraai iadko i biano, tu kisusoni it ongoulou do paip sid rinding dot ongovalai sid ogumu o kampong, nga kivaig-no. Na sid 4,13 tinaringan-no di Yesus it ondu dino dot okonko i makan om minum om mansahari sampai i modop o kapasi do riniba om ulun, inoi nga i kisungguvon do koposizan penlaid.

4,16 Pinembulai-no i Yesus di kosusaan dit ondu do sinuhu-no dau mongoi di savo dau. Okonko insan-insan o gama di Yesus pembulai di kosusaan dit ondu dino, inoi nga obohinut. Na hohorotizan-po dit ondu dot amu milod olimon i karaatan dau sid tinoguvangon dit ulun dino, tinumopik-no sid hal vokon, sid rohani, ino-no i kopigogogutan dit ulun Yahudi om Samaria, tu mangalalau

dara, supaya amu kovungkaza banal i dau do karaatan. Amu ozi it ondu dot i Yesus mongimpuras vagu di dau do hal om kobuatano.

4,21-24 Na i Yesus amu monginaru di kobuatano dit ondu, gam manarang dot i Habal do Kovosihan okonko bai ugama om vaza dot ongoulun sumuhut di hal do rohani om i tampat om adat, hal do kavasa om amu, vaza monuluk do hurup do pinonuhuan, inoi nga i kenginan do Kinoringan o tomodon. Ino-no suvaiko abanal it ulun sid tinoguvangon do Kinoringan, om iseso o ginavo sumuhut om mongimbulai di kabanaran do Kinoringan. Sabap kalanta kavi i kobuatano om kavazao dot ulun sid tinoguvangon do Kinoringan dot iso nga asot kosusut om oolim dot ulun.

Sid keloo om kiroon dit ondu tinumimpun-no i Yesus mangagazad dit ondu di vazaan lumombus. Tasanglaang-laang o vaza dau mangagazad. Amu monuhu iosido do tumuhop sid luvang dit amu-po elaan dot songkuro o karalom om nunu i kosondoto. Om it ondu, nga humarati-no dot isai banal i Yesus do nakaharati-po, minintoron-no iosido kumidaialog. Nokorikot-no kagi i kinoruhangan do nongokovongo-no ioti dino, tu mitoguvang-guvang di Yesus om it ondu sino.

It ondu, nga nolingan-no i tinomod dau sid talaga, niopung-no i panahagan sid talaga om hinumago-no muli sid kampong om ingutai-no dau it ongoulun sino, ino-no it ongoulun dit amu kukumiboros, gam kukumihi om mongusiba dau diri. Mad nolingan-no kavi dau ino kobuatano dioti dino dit amu atag. Sabap baiko iso-po ot engat dau, engin iosido dot ioti-po o kasamung di Yesus om mongining di tudukan dau.

4,31-38 I gama di kinoruhangan di Yesus, monodia di kakanan dau (monorundakai di Yesus). Ino gama dino monguji i Yesus ponong sid dau do tomodon om i gama dau posurut di kenginan do Kinoringan. Topot ong it ulun do kampong, kodung nokening di Habal do Kovosihan sid di Yesus, sinumamung-no sampai minongohormat-no di Yesus, tu it ondu di nokotorima di Habal do Kovosihan pinolombus-no di habal dino sid dioti.

39-42 Na i kososizan dit ondu dino dit amu-no ekum iosido do mongohondom di dau do kobuatano dit amu atag o minanarik dit ongoginavo dit ongoulun sid kampong sampai minozo om tinumoronong-no ioti, tu mongining di Yesus. Ong i timpuuni, bai minangasip ioti, gima i kososizan dit ondu. Topot kodung nokotoguvang-no om nokening-no di Yesus, nakaharati-no ioti dot isai i Yesus om kuran di Yesus mongodim om potugas dioti. It ininjilan di Yesus jinumadi do penginjil di Yesus...

Ong onsizon tokou i gama di penginjil dino, varo't a-ko piro o hal dit apakai

mongohondom, nga okonko harati dot otimumung ot oboros kavi iti:

- I gama penginjil, sid khotbah atag ong posurut sid gorija ko sid umpug sid valai dot ulun (kebaktian) ko hiza do magandaha dot ongosirang.

- Kadan oviton i Habal dit amu mionong sid ongoulun. It Injil, ino-no i Yesus Kristus kondiri, okonko buuk ko bai tangon om tuturan kodori dit avantang ong mongining, topot aso kosungguvo do guna om aso panangan. Kondiri di Yesus engin mamakai di penginjil do iadko pakakas dau, munung om kabang dau do mongogiang om porikot sid ginavo dit ongoulun di Habal do Kovosihan, supaya ioti nga ajadi do sasi om pakakas di samod do Kinoringan.

- I Habal do Kovosihan okonko habal di manala ko mongohukum dit ulun. Kokiraai, it ulun di sid tanga do rahat ko sid valai di humandab-no, ko i nohotungan do kazu iosido sampai a-nokedu, atagali ong ogumu o boros sid dau do manarang dit ongokosusaan dau. Baik sopulon sampai iduon i kazu di nokodsit, supaya kedu iosido o tugas tokou. It Injil iadko ginazau bahagi di lumikop, okonko ice-cream, antava kotulungan, okonko gambar hidup.

- I Habal do Kovosihan, habal biano, okonko habal kodori, ponong sid kosusaan biano om didino, tu mongonsug om manarik om mongodim dit ulun dino-no.

- Sid gama penginjil, sompikiguna i tudukan-ku om i kobuatano-ku, ko i gama-ku sid ulun di mongining (Yakub 2,14-20) Ong amu kopionong i boros-ku om i gamaon-ku, mad porosuma i tudukan antava i gama momudali di tudukan.

- I penginjil om it ongoulun di mongining, sompi ohoturanan om anangan di Habal do Kovosihan. Amu atag do misingkinoringan sid tinoguvangon dit ongoulun di mongining.

- Atag dot ahandaman tokou sid gama tokou monginjil do momporompok i kondiri di Yesus nga sinoi di tokou o kopurimanan tokou. Atag do minta dua isuhut di boros di Matius 18,20 Ong mongingut dit ongoulun minta dua, avantang ong popuhondom-po dioti dot "sino-no i Yesus".

- I gama penginjil okonko baiko tugas om gagamaon di penginjil om pandita. Ioti kondiri, nga sumurut humarati dit Injil sid gama mangaharati di Habal do

Kovosihan sid ulun vokon. Sabap ino, it ongomongining okonko rontob mongoduat om mokihaharati di penginjil om iosido o tumimpa, inoi nga atag ong miduduat om mititimpa-timpa, misuli-suli, sampai sompi mindamo-po di kotulungan di Sundu do Kinoringan do mongogiang di mato om tolingo om ginavo. Iadko i Petrus sinod tuturan di Kornelius: i Petrus kondiri nga osusa mongogiang di ginavo dau, supaya kaharati iosido di vaza do Kinoringan mongodim dit ongoulun dit okonko Yahudi (UR 10).

- Sid gama mongining di Habal do Kovosihan mimbulai i harati om i kanangan di Habal dino bahagi biano om ponong sid kosusao om kosinango dot ulun, sampai i kuran di gama sumuhut. I gama mongining o mongimbulai di gama humarati om i gama sumuhut om posondot di Habal do Kovosihan sid praktik (kopongusahaan).

- Ong kemot do kosondoto ko kolombuso dit ulun dit otudukan di Habal do Kovosihan, atag do posurut-po di kolombuso dino, iadko sid Usuran dit Ongorasul F. 2,37 om 43-46: otobok-no i ginavo dioti om minokitalahas-no ioti dot, Nunu-ka it apatut o gama-za? ka dioti.

Noboros-no iti kavi, kakali atag do sodirizon-po i vaza poromut di Habal do Kovosihan. Okonko oruhai manalahas om manarang i Habal dino, ino-no i samod do Kinoringan, dit inovit di Yesus om ino hoturan vagu di posunu di kenginan do Kinoringan. Minsanko i kondiri di kinoruhangan di Yesus, nga kakali ot amu oruhai rumamit, nakaharati-no ngaran dara, nga oruhai dot noling-an-no vagu. (I Petrus minihiza-no sumasi dot i Yesus o Minananggung om mangahavud di Yesus posurut di tugas di Minananggung Matius 16). Iti-no o sabap do minta dua i Yesus bahagi di kosipan di Petrus, supaya tumatap iosido om patatap-po di koruhang dau (Lukas 22)

Minsanko i Yesus, amu hinumarap dot oruhai ioti rumamit om sumuhut. Iti-no o sabap dot sid ogumu o suriban om suntuan minanarang i Yesus di hoturan om karajaan do Kinoringan. Ong otopot, minsanko i pongoretan: Karajaan do Kinoringan, nga baiko suriban, boros om pongoretan dot ulun om hal do sandad riniba, isunsui do riniba mongitung do varo raja om hoturan do karajaan sid razat. Sabap banalko tanid mantadko i sokoviai it ongohoturan om vazaan do riniba mangahatul dot ulun ong i gama do Kinoringan mangahatul, mangatag, manapul dit amu ahatul om it amu atag om it natagak. Imatai sid ongosuriban sid Matius 13 om Markus 2 sampai Lukas 5, ino turu suriban di karajaan do Kinoringan. It ongoulun amu nakaharati om it kinoruhangan di

Yesus, nga minokitarang-no.

Ong i tudukan di Quran, mogihim do lojik di dang riniba, iri-ogi mongitung dot ombo it otopot. Boros di Muhamad: I Yesus nabi do Kinoringan, amu mangakun i Kinoringan dot it ulun dot araat o mongohukum om mamatai di Yesus. Iti-no o sabap dot i Yesus diri inongoi-no sid surga iadko i nabi Elia. Amu minatai i Yesus sid kazu do sangkap, ka di Muhamad. Pongitungan di iadino sumuhut di koubasan mongitung di dang sandad riniba. It Ongoyunani, ulun di mokiilo banal, iadino o boroson, ino-no, i tuturan di kinapatazan di Yesus sid kazu do sangkap dino nga kobungoho, okonko hal dot keloo, ka. Pengkaa dino, it ulun Yahudi minongitung dino gama di Yesus do karaagan. I boros sid Yunani, sakandalon = hal dot amu opirongou om amu opibambaran di riniba, oholian kobolikung om karaat, ka (1. Kor. 1,18-25). I vaza dinot ongopongitungan dino, pengkaa: karajaan ko hoturan do pomogunan, varo iso ot ulun di dikuasa, i mogom sid savat, iadko iosido o tumorindak sid sokoviai i razat. Sid sahou dau varo-po't ulun vokon di kumavid di hoturan antad sid ulion sid savat om polombus-no di kuasa om hoturan ponong sid sibak. Topot ong i razat, a-mili-milo nga sumuhut dot ombo i nahatul antad sid savat. Ong iadino, it ongoulun sid sibak manaan om mamabo di nunu-nopo i nokotimpak sid kazab dioti dino, avantang ko araat o nisuhu. Manjadi minsanko it ulion retanko tanggung jawab di razat, ong otopot, iosido-no o boboon-ko saanon di razat. Minsanko retan do montiri ko minister, tu i harati di pangkat dino: uripon do razat, ong otopot, kakali ioti-no o tumorindak om mogom sid savat i binabo do razat. Banal-no, varo tanggung jawab dioti dino, rontob-nopo ino hoturan dau dino isuhut di dioti do kenginan om pongitungan dot alambat banal do kenginan dioti do kopionong di kenginan dit ongoulun dit aso hak om aso ngaran. Iti-no o sabap do varo suriban di vaza dino, Ino-no, Ong umau, kuokuozon momurugou pagavul sid vaig, kakali do lumantung sid soribau i umau. Aso't umau lumosod sid nanad. Iti-no i koubasan do sandad riniba, isai-nopo i varo kuasa dau.

Topot ong i hoturan di karajaan do Kinoringan, tanid-no. I Kinoringani, jinumadi do riniba sampai lumalam sid isai-nopo it ulun dit osibak om aso ngaran. Bituanon, usan-usan, panambat, ulun di nohukuman, kibalang, kiragai o kinoruhang di Yesus om notulungan di Yesus. Ino-no i panangan, asot asavat om aso't osibak. Aso mangaladtak om aso't ladtakon. Sabap ensanan i riniba asamadan do Kinoringan, otimbang i gama do Kinoringan sid isai-nopo it ulun, mosikim, lumundu, akansang ko okugui, ulun do kisala om ulun dot apaham

om elin (Mat. 5,43-48) Ino hoturan di Yesus dino minangasau di hoturan dit ugama do Yahudi om i hoturan di Kaisar do Rom. Iti-no o sabap dot pinatai i Yesus sid kazu do sangkap. Topot nogulian vagu, tu vaza do Kinoringan monimban di hoturan do kapatazan. Iri-ogi, it ulun di retanko mizau, mad minatai-no, tu mozo iosido di hoturan do kapatazan om korugizan om kapangaladtakan dot ulun. Topot ong it ulun di sumuhut di hoturan di Yesus, ikasana dot ulun. Topot minsanko apatai, nga mad iosido-no o kumavid di koposizan penlaid.

Sid Luk. 9,61-62 mongimbulai i Yesus di tanid o pongohorotizan dot ombo i kapatazan om koposizan, ombo i kiguna om it aso: Posuruto-no i Habal do Kovosihan sid gama mozo di Yesus, okonko mozo dit undang-undang do sandad riniba, retanko i tugas keso, mongolobong di minatai...(it ulun di minanarang di sangkut dau mozo di Yesus, retanko osusa-po do mongolobong dit ama dau. Na it ama dau amu-po minatai. I boros diri bai vaza mangamu, tu i kenginan dit ongkob dau kakali asavat-ko i kenginan do Kinoringan sid dau do kiroon).

Insan-po dino, sid riniba, i raja, i montiri om it ongoYB manalahas om mangaratu om manantu dot ombo it abanal om oebas om atag dot oguna dot ulun. Ioti mongorontob dit ongokuasa om gama dot ulun, atag ko amu, abanal ko amu. I hiza di kakali kavasa monguripon dot ulun, mongojuval om dumagang iadko dupot, retanko it ongolumundu di manansanganu dot uripon dot iosido kikuasa do mamatai om mongopud, mangalapos om polikop. Omboko iosido. Aso-no kosumbarali dit atag o gama.

I hiza do kolonial, retan dit ongopomogunan do Europa dot ioti-no o kadapat manansanganu dit ongopomogunan vokon. Kagi i kiroon do iadino, inanu-no di Pope antad sid boros di Yesus sid Matius 28,16: Sokoviai i kuasa sid surga om sid pomogunan, nitahak-no kavi sid dohon, ka di Yesus. Na i Pope, retanko sakai-no di Yesus, minonuhu dit ongobansa do Europa do manansanganu (ong otopot monoruvang om manakau) di sokoviai it ongopomogunan vokon.

I hiza di hoturan do Komunism sid Europa Timur, retanko i razat o mangahatul di pomogunan sampai it ongoulion, bai palad di razat. Dot ong otopot, inot ongoulion do parti Komunism om sakup dioti dino, banalko minangaladtak om minongorugi di pomogunan dioti sampai aso komojuan sid dioti dino sid saralom do hinapad-hapadan toun.

Sid hoturan do kapitalism (hoturan do ringgit) retanko i ringgit om it

ongohorogo o mangahatul di pomogunan, ino-no varo kobebasan bahagi di sokoviai it ulun. Isai i kisiin, kadapat dumagang om midagang. Isai i kibarang, palaku di barang dau, ong sukul elaan dau palaku. Isai i kogoos gumama, kadapat mongojuval di kakansango dau sid ongokilang om kumpani kumaraja sampai tumorima di horogo di kansang om gama dau. Rontob-nopo, ino hoturan dino mamakai dit akal dot ulun: Kodung okudik o barang do kagaratan dara dit ulun dumagang, pensavaton-no i horogo, supaya ogumu o kohuntungan, tu i kosompito dot ulun jumadi do kotibangan mongorugi dot ulun. Kodung ogumu o barang, okurang o horogo sampai kakali amu alaku. Na it ulun di kaharati di hoturan dino, hiza dot omura i barang, ovion-no dumagang om itahu-no, supaya hiza dot okurang ino barang dino, (tu iosido o minangavi dit ongobarang dino itahu sid gudang dau) om ogorot it ulun dumagang, palaku iosido di barang dino dot asavat o horogo. Ino hoturan dino, i gama midagang o mangahatul ko mongorugi om mangakan dot ulun. Ong omungon siti do bai iso o suntuan: I hiza di toun 1956, sangkarong o nizuw, 17 Rgt diri. Horogo do Landrover, 7000 \$. Bianco, varo-no ong sangkarong nizuw bai hopod ringgit. Topot ong i Landrover, nga 70 000 sampai 80 000 Ringgit.

Sid sokoviai it ongohoturan di iadino sandad riniba, ombo-ko i momorinta, iosido o manarang om manantu ombo it abanal sid dau do hoturan. Topot ong i Kinoringan, tanid banal o hoturan om tanid o kenginan. Amu ozi iosido dot aladtakan it isai-nopo it ulun, bituanon, usan-usan, panambat, ulun do mosikim, ondu, anak ko lumohing-no it ulun. Ipat-ipat it ulun kingaran om kihak sid tinoguvangon do Kinoringan. Tinarang-no laid di Musa ino kabanaran do Kinoringan, om iri-ogi i Yesus nga minonginggulit om minongohodtol dino kabanaran dino.

Ong onsizon tokou i Habal do Kovosihan dot onibak o gama, mad tolu o pon-goretan om osukup-ogi bahagi di gama manarang, ino-no

KABANARAN KOBEBASAN/KOLOBUSAN SAMOD

1. KABANARAN

Nunu-ka o harati sid Kitab : KABANARAN?

Sid a-ko piro ot ayat tumarang i harati dino:

a) Ong arait sid Kitab i kasalaan di mad kasangai do karaatan, atalahas-no dot ino gama dino sumaap di kabanaran! 1.Yahya 1,9-2,1+6: misangai di kasalaan om karaatan. Baiko i Yesus ot abanal.

Na it ulun di sid tinoguvangon di Tuhan, sumuhut di kobuatano di Yesus(6).

Rom 6,12: Kadan-no dot i sala o raja di guvas dikou...

Rom 6,13: Kadan-no jumadi do pakakas do karaatan, ..gam jodizo-no do pakakas do kabanaran. 16: isai-nopo o patahakan di guvas dikou, tantu ajadi-kou-no dot uripon dau. Ong i kasalaan o patahakan, kosunggu-kou sid kapatazan. Ong obinsuhut-kou-no do Kinoringan, kosunggu-kou sid kabanaran.

18: nakalabus-kou-no sid kuasa do kasalaan om najadi-kou-no dot uripon di kabanaran.

19: i gulu minongimbulai di karaatan, ong biano, uripon-kou do kabanaran do pongimbulai di kosusian.

b) **Kinoringan mongining om mongontupat**, ong varo karaatan sid tanga do riniba! Kinotimpunan 4,10: Boros do Kinoringan sid di Kain: Nunu-ka o ginama-nu diri? Tu kinodim-oku di raha dit obpinai-nu antad sid tana.

Kinot.6,5: Nemot-no di Tuhan do gumazo-no i karaatan do riniba..

6,11: i pomogunan dino nopusok-no do karaatan om guvail sid tinoguvan-gon do Kinoringan.

Kinot.18,20: Banalko araat i gulonggong dit ongoulun do Sodom om Gomora. Yehezk.16,49-50 Ino-no i karaatan dit obpinai-nu Sodom. Amu minongontupat ioti dit ongomosikim om it ousiba o ngaran. Osumbung ioti om gugumuvail sampai minonimbaru dit onghal dit ikasana-ku. Sabap ino rinungoi-ku ioti.

c) **Kinoringan posurut di kabanaran om katapatan**

Kinot.4,9: Boros di Kinoringan sid di Kain: Siombo-no it obpinai-nu. Boros di Kain: Tau. A-ku elaan. Ioku-naku o mongontupat dit obpinai-ku? ka. Na inot timpa di Kain o harati, amu tumorima iosido di tugas dau do mongontupat om manamod dit obpinai (it riniba vokon). Iti mad onsi banal di kenginan do Kinoringan, ipat-ipat it ulun kitugas sid ulun vokon. Banal-no, engin i Kinoringan dot i tokou sokoviai, momoros om mongusaha dot,

IOKU O MONGONTUPAT DIT OBPINAI-KU!

Yesaya 5,7: Boros di nabi Yesaya: Minonginud Kinoringan do kabanaran, topot imatai-no biano, baiko karaatan. Minonginud iosido dit avantang o gama, topot biano ogulou-no ioti do mititipu om miooduw.

d) **Kinoringan mangahatul om posurut di kabanaran**

Kolobusan 22,21-26: *Kadan-no monusa ko mongorodsit dit panambat.. Kadan-no mangaladtak di bituanon om usan-usan. Ong aladtakan do sampai mongogizak toti, iningon-ku i dolou om it ihad dioti dino sampai mongoloub-oku dioti sampai rodusan-ku om punsoon-ku ikou om pempuson-ku i savo om*

anganak dikou do bituanon om usan-usan. Ong pangkat-kou do siin sid ulun di mosikim sid sombol, kada-kou-no pokibunga ko mokisanda di kurilib dau.. Ulangan 15,4 Polobuso-no it obpinai-nu antad sid longon-nu, supaya aso mosikim sid pialatan dikou.. (7) kada-kou-no kodoot om kokodou do ginavo ong varo mosikim sid pialatan dikou do , (9) Apatut dot osukup o gama-nu manahak dau dot otomon o ginavo-nu. Sabap barakatan-ko do Kinoringan sid saralom di sokovia i gagamaon-nu.

Zabur 98,2 om 103,6 I Kinoringan mongimbulai di kabanaran sid tinoguvangan di sokovia it ongobansa. Yesaya 1,17 Ihimo-no dikou i kabanaran.

Yesaya 41,10 I longon-ku do vanan o mangagazad pakansang dikou sid kabanaran (kamanangan).

Yes.42,3 It uripon di Tuhan pentalang di hukum do kabanaran sid sokovia i.

Yeremia 7,5 Suvaiko simbanan dikou i kavazao om i kobuatano dikou di didino om mongimbulai-kou do kabanaran sid pialatan dikou. Amu-kou-no momogos dit ongopanambat om it usan-usan om it ongobituanon ko monguzapo do raha dit aso sala sid valai...

Amos 5,24 Ino-no o kenginan-ku, ka di Kinoringan, kikabanaran-kou iadko momurulun o vaig om iadko vosoi dot osou.

Mikha 6,8 Nokentahan-no di Tuhan sid dikou i nunu-nopo it avantang om ombo it onggohon dau sid dikou, o ino-no: Posurut-kou do kabanaran om i gama misasamod, om soumul-umul-kou sid tinoguvangan do Kinoringan dot osibak o ginavo dikou.

Rom 3,21 Ong biano nokembulai-no i kapamanaran do Kinoringan dot okonko i pinonuhuan o minongimbulai, iadko i niintahan-no laid sid pinonuhuan om sid ongonabi dot i Kinoringan o mamanal dit ipat-ipat it ulun di mangasip sid di Yesus Kristus.

Rom 3,25-26 I kolonuto do Kinoringan pinosimozo di kasalaan di gulu, supaya kembulai i kapamanaran dau biano dot iosido-no ot abanal om iosido-no o mamanal dit isai-nopo i mangasip sid di Yesus.

e) I kabanaran do Kinoringan mongimbulai di kabanaran tokou

Rom 12,21 Kadan-ko-no mokitori do karaatan, inoi nga torio-no do kovosihan i karaatan. Rom 14,17 Sabap i karajaan do Kinoringan okonko hal do kakanan om kenuman, inoi nga kabanaran om kopioondusan om katamanan sid saralom di Sundu dot Osusi. Isai-nopo i mokikoburuo di Kristus do iadino, iosido-no ot ikozi do Kinoringan sampai oguna dot ulun.

2. Timotius 3,16-17 I nunu-nopo i nokosurat sid Kitab... kiguna do pakazon manarang di katapatan om monugat dit ongovudut om potolunung di golivong

sampai mangagazad sid ralan do kabanaran.

Fil.1,11 Osukup banal sid dikou it uva do kabanaran, it agama di Kristus, tu mamantug om mongindazou di Kinoringan.

Luk 1,74 I Kinoringan manahak sid di tokou do kolobusan antad sid palad dit ongosangod, supaya sumamba tokou sid dau ...sid saralom do kosusian om kabanaran sid tinoguvangon dau.

f) Kinoringan mongoguna di kabanaran dot ulun

Mat.5,6; 10;20: Osinang-no it ulun di monombitil om tuliohon do kabanaran, sabap it ulun dino envizahan. (10) Osinang-no it ulun di kopuriman do kosusaan, sabap gima i kabanaran, sabap it ulun dino kasanganu di karajaan do surga. (20) Bang aso kabanaran dikou di lobipo abanal mantadko i kabanaran dit ulun do Farisi om it ongoulun dit elo do Kitab, tantu-tantu-ko amu-kou kosuvang sid karajaan do sturga.

Mat. 6,33 Ihimo-no banal dikou i karajaan do Kinoringan om i kabanaran dau, tu ong iadino, itahak sid dikou it ongohal vokon.

Sid Mat. 19,30 sampai 20,16 monuriban i Yesus di tinomod do kabanaran do Kinoringan: ino-no suvaiko miuma om atag, ong ipat-ipat it ulun varo kosukupan di balanja dau bahagi dit ongekob dau do monumad kavi di suvang dit ongekob dau. It ulun di bai pukul lima do minsosodop kadapat do ponsohorian tumorima di kosukupan miabali dit ulun dit nasadapan gumaji di minangakun di gaji do kosukupan di gama dau sangadau.

Imatai sid vokon it ongoayat di manarang di kabanaran: Rom 5,21; 8,10; 1. Petrus 2,24; Yakub 1,20;3,18; Kentalangan 22,11.

2. KOBEBASAN/KOLOBUSAN: Sid bansa dit ulun Israel kaharati tokou dot amu oruhai i gama lumabus antad sid kinuripanan. Hiza di linumabus ioti antad sid Masir, nunu-nopo kananganko i hoturan do bansa ko pomogunan, nga amupo kaharati ioti. Ino-no o kaharati ioti, kodung monuhu i mandul, sumuhut ioti tumungag do sasarap, makan, gumama, mintoron om modop-no vagu, isuhut di suhu do mandul i kilalapos. Sabap tinounan do iadino i hoturan dioti dino, nakatandon-no banal sid dioti i vaza dino. Aso vokon ot elaan dioti diri. Iti-no o sabap dot sid saralom dot 40 tinounan sid tanga do belantara i Musa minonuduk do bahazan om undang-undang om hoturan do monodiri di rontob dot atag om amu. Ong i kakal-po sid Masir, kodung varo kakanan, mad asu tumoronong sid akanon dino dot aso't engat do hoturan, ko ong varo barang, ong sukul aso moniag, onuvoni ino barang dino. I lalapos o minonuduk di rontob do kavasa.

Pengkaa dino, hiza di toun 1834, varo nokorikot pandita sid Banjermasin, sid Kalimantan Selatan do pazasad di Habal do Kovosihan o tomodon. Kenginan dau, minsamung dit ongoulun do Pasok Kalimantan, ino-no it ongoDAYA. Kasalaan-ko-nopo, ogumu ioti do baiko uripon dit ongosarip om solutan sid timbang do rahat om sid ongoolungan. Pongitung-nopo it ongo pandita do kuran kadapat monulung dit ongodaya dino. Alaid om netung-ogi dioti dot, Osuhul ong mogihim do siin dot iponobus dit Daya sid Sarip, supaya obebas ioti om kotibang-ogi ioti mongining di Habal do Kovosihan. Kodung nakadapat ioti do siin antad sid Europa, tinobus-no dioti i kogumuai i Daya diri, dot notobus-po, siunsub-no di sanganu laid inot ongouripon dau, retanko, Obebas-kou-no biano.

Hiza do tanga hari, sinunsub-no ioti dino, nga amu-po nakakan it adau diri, Tu koubasan diri, suvai sumakai it adau om makan-ogi. Na minindamo-no ioti dot akanon. Topot boros di Sarip, Obebas-kou dino. Amu-oku pakan dikou ong biano, tu ikou dino, okon-noko ioku-po o sanganu. Aso-no tanggung jawab-ku bahagi dikou dit obebas-kou dino, ka. Iri-ogi rinumikot-no ioti sid valai di pandita mokiakan om mokihoturan. Songkuro-nopo o gama di pandita manarang dot obebas-no ioti sampai kadapat-no ioti do mamantau sid siombo-nopo o kenginan, nga amu-no minogidu ioti, gam minurun-no mintoron sid valai di pandita. Ikau-no o manansanganu dahai, ka dioti. Ikau-no kavi o mogkonja do valai dot intoronon, kakakanan dahai diti, ka. Minogihim-no i pandita do tana om kosukupan do babaal bahagi muvalai. Suvai suhuon dau poturug do valai ko manangkul ko rumilik om mananom do kouvaan ko parai om gumama-ogi ioti, dot ong otopot malang-alang o gama dioti sumuhut, tu aso lalapos di minongindoronok dioti dino. Okudik nga aso gama dioti dot antad sid dioti do kenginan om ginavo. Suvai varo monuhu, gam sinumurut i karampus dioti dino sampai minongogorot ioti di pandita do posinang dioti dino, tu, ka dioti, iti diti, dikau do tanggung jawab do pakan om podop om posinang dahai, ka. Banalko aso tinganan do poromot sid dioti diri do harati KOBEBASAN/KOLOBUSAN, sabap a-nakaharati ioti do varo tomodon om rikoton tanid mantadko makan, modop om rumonok di lalapos. Na i kogumuai do hoturan dit ongobansa nga sumusui di kobuatano di iadino, dot amu kosodiri Kapitalism, Kolonialism, Komunism, ko Demokrasi ko Diktatorship. Varo monuhu om kumavid di lalapos ko i pakakas di miabal o guna, om rumonok-ogi i razat di hal dino sampai sumuhut om monumbozo di hoturan di iadino, vokon-no ong suvai agaran, vokon-no ong mad ozi do iadino, supaya amu osusa do mogihim di dau om dau do tanggung jawab. Suhulon dit ulun do humogizo ko sumaringan.

3. **SAMOD:** ino pongoretan dino sid sampaping-no do kasanaan om i gama monongkudau. Amu osusa siti do panaru di panarangan dino, tu i Paulus minanahak do banalko avantang om arangkap o panarangan do samod, ino-no sid 1. Kor. 13. Sino dino emot tokou i rontob om i kosongoho om korolomo om kasavato om konoruvo do samod di posuntu i Yesus sid di tokou, ino-no i samod dit antad sid Kinoringan (Yahya 3,16).

Ino tolu o tajuk o mangahatul di hoturan di karajaan do Kinoringan. Aso kiroon di Matus dot ino karajaan dino hal di sid sodu ko ponong sid salaid-laid, inoi nga kiroon dau, kosunu sid dau do hiza, ong kodung nokorikot i Yesus. Sokoviai it ongobansa tumoguvang di Kinoringan, tu jumadi do koruhang (Mat. 28,18-20) om sumamba om sumuhut di Yesus, i monguasa di sokoviai. Ino hoturan dino okonko bai sid surga, ko baiko sid pongitungan om kosipan dot ulun, inoi nga sitid tanga do riniba. Banal-no, sid kovian di Tudukan di Yesus sid Burul, atalahas-no dot varo pitonidan kananganko i vaza sumuhut om i baiko mongining di suhu om kemumuzan. Kakali humarap i Matus do suvaiko varo kouvaan om kiguna-ogi i kazu. Ong baiko mangarait di ngaran di Tuhan dot aso panangan, minsanko nakamung-no sid gama pazasad di Habal do Kovosihan om mongimbulai-po do kosunduvo, kakali dot asot ontok. Suvaiko kaharati di vazaan di Yesus i tiruvan do suntuan om kiguna-ogi. I karajaan di Yesus okonko bai pongitungan sid utok om ginavo dot a-ko piro ot ulun, gam monimban di hoturan dit ongobansa om jumadi do kuasa di mangahatul dit ongopomogunan o tomodon dau.

Pengkaa dino i tudukan di Yesus sid di Lukas: i hoturan di Yesus ponong sid sokoviai it ongoulun sampai mangahatul di sokoviai i kobuatano om kavazao om bahazan dot ulun. Na varo't iso kuasa do sumaap di hoturan di Yesus, ino-no i kolunduo om i siin. Iti-no o sabap dot *oruhai-po it unta sumuvang sid luvang do jarom ko it ulun do lumundu sumuvang sid karajaan do Kinoringan*, ka di Yesus.

Kuran kopitoguvang om sumuhut it ulun di hoturan dino?

Boros di Yesus, Isai-nopo it engin mangahatul, iosido-no o tumabang om monulung om migaralo sampai monorundakiai di sokoviai. Amu atag do mamakai-po siti di pongoretan dot uripon, minsanko it ongorasul minangarait di kondiri dot uripon di Tuhan. Sid Momogun, ogumu ot ongopongoretan kananganko i gama tumabang om minggama-gama sid poginakanan om sid ongovalai om karaja, nga kakali asot iso o pongoretan kopionong banal di hal diti. Sid gama di Yesus momoug di hakod di kinoruhangan dau ot ohorotizan

tokou i tugas dino, tu otuntuvad-no om olumpatiu-no i kiniro do sandad riniba. Okonko it uripon o momoug dit ongohakod ko momuhau do palampag, inoi nga i sanganu di valai, ko i mongingut dit ongoulun sid poginakanan dau o monorundakai om migaralo di sokoviai it ongoulun. Kondiri di Yesus o minongimbulai om minokisuntu dino hoturan. Iri-ogi minonuhu-no iosido do mangatod om poromut di hoturan dino sid péntongkop do pomogunan (Mat. 28,16-20), tu iosido kakali sinod tanga di kinoruhangan dau om sid isai-nopo i sumuhut di hoturan dino. Kasalaan-nopo, hiza biano di nokomerdeka i kogumuai it ongobansa om kaharati-no it ongoulun di kobebasan dit ipat-ipat it ulun, banal-no, amu ozi it ongoulun kumavid dino hoturan do tumabang, monulung, monorundakai om migaralo. Enizo it ongoulun do mokitorundakai, tu mokipangkat om mokigalar om mokiosukod om mokiYB om mokimontiri, dot bai i kosinangan om koringgitan sid tugas om garal dino o tomodon, okonko i gama magavi tumabang om posurut di bansa om pomogunan dau. Sabap iadino i kobuatano do razat om pomogunan, i tokou ulun Kristian, varo tugas dot agazo do posuntu dino gama di Yesus sid sokoviai it ongoulun dot amu monodiri do bansa, suku bansa, ko boros om ugama. Gam monuhu-po i Yesus sampai posuntu di gama manamod-po di sangod, sampai ino samod dino mongohuzas di hoturan do pomogunan. Ino samod dino monori-po di nunu-nopo sangpakakas do rumpak om i kuta dit banalko apapag.

It inantadon di hoturan vagu dino, ino-no i Kinoringan, ino kuasa dit ozi dot i tokou tumoguvang sampai manangama: **Ot Ama dahai sid surga!** isuhut di pomintaan dua di Yesus (Mat. 6,9-13) Ong Ama-no i Kinoringan, okonko rumosi-po om rumonok-po i riniba sid tinoguvangon dau, inoi nga engat dot ino't Ama dino banalko kikuasa om osomok sid riniba om iosido-no o mogkonja di kosukupu di koposizon om koposizan do riniba. Sampai iosido o momiara ko monorundakai di tokou (Zabur 23), aso-not ihimon-ku. Iosido-no i Minamangun om i Minongurug sampai kakali minsanko it ombolog, nga sid paladi dau, om i piro-piro nouhat it obuk tokou (Mat. 10,28-31) iosido-no o kezapi. Sabap iosido-no o mangahatul di sokoviai: (Mat. 6,25-33) it ongobunga, i sakot sid butul, it ongoombolog, humarap i riniba sid kovosihan dit Ama, gam sumusui di gama dau om mogihim-po di karangka-po dit Ama (Mat. 5,48) Suvai iadino o gama dot ulun om jumadi iosido dot ulun di kenginan do Kinoringan antad di kourug, dot iosido-no o wakil om sakai do Kinoringan sid tanga di vinangun.

Ong mindamo tokou dot, **Posusio-no i ngaran-nu!** ka, okonko i pangkat om

garal om hormat do Kinoringan o tomodon tokou mindamo, inoi nga i vaza do Kinoringan minsomok sid riniba om ruminiba-po sid saralom di Yesus antad sid Nasarat. Tu sid saralom di gama dino tumanus-no i volit sid pialatan do kavantango om karaatan, sid ulun dot abanal om it ulun do kisala, it asakau om it osusi-no. Ong muli-no it anak di nokokozou sid ama, amu-po nokorikot, tumangkus-no it ama minsamung dit anak om mangahatul-no di poginakanan..- (Luk 15). Ong kodung nokotorima-no do samod dit ama di iadino, aso-no vazaan vokon dit anak tanid mantadko ohigak om otomon om aramai iosido vagu sid valai dit ama (dot i kogolivong, it obpinai dau do kotuaan humungot om mongivogu dit obpinai dau)

Iri-ogi tumabang-no it ulun sid gama **porikot di karajaan do Kinoringan** om i kosunuan di **kenginan do Kinoringan**. Ino kenginan do Kinoringan o monori di di tokou do kenginan om mangagazad sid gama dit atag. Ko sid gama mindamo dit kakanan di miuma do susab-suvab, engat tokou dot i Kinoringan mongingsukup di kopolison do riniba om pobebas di tokou, supaya i tokou nga mongohondom di vitil om i kosusaan dit ulun vokon.

Nokokuro-ka, tu suvai kenglimo sid pomintaan dua dino om mindamo-ogi kananganko i **karaatan om kasalaan** ko i mad utang dit ulun ponong sid Kinoringan om ino sid pialatan dot ulun? Mad okonko i karaatan om kasalaan o kongkod banal sid tinoguvangon do Kinoringan, naku? inoi nga i kobinsianan om kosianan do Kinoringan di mangada di karaatan om mangapus dit utang om mangatag ombo it amu atag, ong sukul agazo i ginavo dot ulun ponong sid ulun vokon di nokotimbaru do karaatan om kobungahan. Om i **pensubaan**, okon-ka ko iadko i gama di vozon do rogon monuba di Yesus, retanko asanganu-no di Yesus i sokoviai i vinangun, ong sukul sumamba sid dau, i harati, sumamba sid vaza momorinta isuhut di hoturan do sandad riniba. Kuasa, hak, garal, hormat, ino-no it ongopensubaan di mamalid dit ulun. Iti-no o sabap dot it ulun Kristian soumul mongontupat, supaya amu arato sid pensubaan di iadino. Tu ong i dang Kinoringan do **karajaan om kekuasaan om kohormatan**, nokembulai-no sid tanga do riniba, it amu koduzan di riniba, ino-no sid di Yesus, i boros om gama om tudukan, sampai i kinapatazan om kinogulianan di Yesus.

Manjadi, nunu-ka ot atag di di tokou do gamaon posurut di Misi di Yesus om i vaza mamung ko tumabang sid gama pahabal om poromot di Habal do Kovosihan? Ino-no it atag, mungkazut tokou-no om mamanau tokou mozo om

sumuhut di Yesus, sid ongoihud dau om sid ongovaza dau minsomok om sumamung dit ongoulun sampai porikot sid dioti di katamanan do Kinoringan. (Luk. 2,7)

I kopogulian sid Kinoringan om i karajaan do Kinoringan

Sid panarangan dino atalahas dot i pongitungan om i tudukan di Yesus amu kolu di pongitungan om kiroon di sandad riniba. Suvaiko ohorotizan ino tudukan dau om pongitungan dau, ong ponong sid karajaan do Kinoringan ot itungon om kiroon om jangkaon tokou. Na ino hoturan vagu i retanko karajaan do Kinoringan, nokotimpuun-no laid hiza di Yesus, ino-no i gama di Yesus kondiri o mad vaza om puun di hoturan dino. Ino koposizan om kavazao om kobuatano di Yesus o mad suntuan om jambatan om gambal di karajaan om hoturan do Kinoringan, iadko i boros dit ulun dit elo dot, I monuduk i Yesus di tudukan dau sid Burul mad noboros-no om natarang-no ino kondiri dau, ko, i monuduk om i tudukan, nga iseso-no o hal, ka. Ong i boros di Yesus dot, Piguli-kou-no sid Kinoringan, ka, ino-no i harati, it ulun koubasan om i sandad riniba nokotoguvang sid ralan ponong sid kobinasaan. Iti-no o sabap dot osusa it ulun, ipat-ipat it ulun om ensanan i riniba osusa miguli vagu, ko tolikudan i ralan ponong sid kobinasaan, supaya kotoguvang ponong sid katagan om sid koposizan. Ong it ulun di suvab-suvab-no mokiada di sala dau, mad kakali sid ralan ponong sid karaatan om kasalaan, tu mokiada-nopo iosido do karaatan dau, tu amu-po nengkod-ingkod iosido ponong sid kobinasaan. Amu-po nosimban-simban i ginavo dau i rikoton dau. Topot ong it ulun di mongining di gama di Yesus mongingut sampai mozo om sumuhut di hoturan vagu, iri-no it ulun di jumadi do vangun vagu om ulun vagu om sid gagamaon om i panahon vagu, okonko sumunsuri o gama, inoi nga tolikudan banal i panahon om ralan om vazaan laid. It ulun okonko mitopik-topik di sid gibang-no om sid vanan-no, gam tumolikud tantu. Suntuan, ong kumudat it ulun, tu intaman dau ong sid Kudat kopisomungan do raja, dot kakali sid tanga do ralan, om ohorotizan dau dot sid KK ot orikoton di raja, turus tumolikud iosido di panahon ponong sid Kudat, tu sid Kota Kinabalu-no o panahon dau. Na varopot ulun dit opiduvo o ginavo dot amu katama tumoguvang ko tumolikud. Iosido iadko it ulun dit antad sid alud tumindal dara, nga amu katama mogidu sid alud om amu katama mogidu sid jambatan. I gibang sid jambatan om i vanan sid alud. I jambatan nga opintod, it alud nga opintod, piangkang-po dit alud om i jambatan, naratu-no iosido sid rahat.

Minsanko i Buddha i minongimbulai dit ugama do Buddhism, ko i Karl Marx i minongimbulai do Komunism, nga nakaharati-no dino dot varo vazaan dot

araat di mamalid dot ulun, gima it ulun om i sandad riniba mogihim di dau do kosuruto om sumuhut di dau do karalazan om kenginan, dot ino vazaan dino pakaso do kogunaan do riniba, ka dioti.

Ong i Yesus mongingut di riniba sid dau do vazaan, amu atag mongitung dot i ralan om rikoton di Yesus nga tinumohiang antad sid ralan do koubasan, inoi nga i vazaan laid do riniba nokotihang-no antad sid vazaan di nosodia-no do Kinoringan. Suntuan, It ulun di nokentoron sid konopuan di norinding i kavut sampai a-no emot i mato dot adau, indoson dioti ong aso-no mato dot adau om amu-no atarang it adau. Suvai nokensavat-no it adau sampai nosidangan-no i konopuan dino om tinumanus-no i kavut, om elaan-ogi dit ulun dino dot okonko i mituvong ot koubasan do vinangun. Sabap ino, amu atag do humarati di karajaan do Kinoringan sid gama poperad di karajaan sid riniba antawa i karajaan di biano dot onuvon do ponukat om pongohorotizan di karajaan do Kinoringan. Suvai mozo tokou di pongitungan di Yesus om elaan-ogi do nunu o tinomod di Yesus rumikot sid riniba om nunu-nopo i tugas dau om ohorotizan-ogi i tugas ko misi tokou.

I pongoretan "kogulian sid Kinoringan" om "Karajaan do Kinoringan" sompi manarang-no di gama do Kinoringan minsomok sid riniba om i gama dot ulun tumoguvang sid hoturan vagu ko karajaan do Kinoringan.

Na i habal di karajaan do Kinoringan dino, nakazazad-no sid pentongkop do pomogunan. Topot kakali okurang o kohorotizan dit ulun, minsanko it onogorija kondiri di nakaramit-no banal di suromo di karajaan om hoturan dino. Banal-no, i Yesus minanarang di hoturan dino sid gama monuriban om manambatan. Ong ening i suriban dino, tumiim it ulun do rumamit di suriban dino do iadko okonko bai suriban, inoi nga mad abanal ko merad di suntuan dino. Topot it a-ko piro o suntuan om suriban di Yesus monuduk di tokou, supaya engkod tokou mamakai di boros om vaza tokou humarati sid gama rumamit di karajaan do Kinoringan. Kokiraai, i Yesus manarang di karajaan sid gama dot ulun mukabun dit nokemot do harta di nokosusut-no sid tana dau. Kodung nemot, nijuval-no dau i sokoviai i tana om valai om nunu-nopo, supaya miuma i ringgit dau dot idagang di tana di varo harta, i nosusut sino. Ko it ulun midagang di nokemot do butiza di banalko avantang om pilihan. Na idadagang-no dau i sokoviai it ongobutiza dau, supaya otobus i butiza di pilihan. Inot ongosuriban dino iseso ko manarang di karajaan do Kinoringan om i gama dot ulun tumopik sid rikoton om gamaon dau. Kogulu i karajaan kembulai om iri-ogi it ulun tumimpa sid gama dau tumoguvang sid karajaan dino om i gama

tumolikud di ponsohorian om gagama dau laid. Suvaiko nopurimanan om nohorotizan dit ulun i korikatan om i kasampazan di kuasa do Kinoringan om kadapat-ogi it ulun tumimpa om tumoguvang sid kuasa dino. Okonko it ulun kondiri o mongimbulai di kosimbanan di ginavo dau, inoi nga i kuasa di hoturan vagu o manarik di ginavo dot ulun, supaya it ulun muli sid Kinoringan. Iti-no o sabap dot i gama tumoguvang sid karajaan dino, ong otopot okonko hal do kaharati di ralan laid om i karaatan sino dino, inoi nga i karajaan manarik om mongonsug sid kavantango di hoturan dino. Suntuan, ong varo't ulun di mogihim do rangalau, nga indoson dau ong varo ponong sid Hobut, dot amupo korikot sid Hobut, kemot-no do rangalau do banalko mansak-no om asapou ot uva. Kodung kemot do iadino, amu-no osusa it ulun dino mongitung dot osuhul ong lumombus-po sid Hobut, tu kaluto ong aso-ogi rangalau ong sori dot mansak-no, inoi nga i rangalau di nemot-no o manarik om mongingut rumikot (aso boros-ku siti dot isai o sanganu di rangalau dino ko kuran, tu bai suntuan iti diti sampai i kiroon iadko kodori dot aso sanganu do kouvaan di sid govuton om sid himbaan.) Sabap ino, i karajaan do Kinoringan om i gama dot ulun tumoguvang sid karajaan dino mad iso-no o hal, di mad duvo o vuoros (iadko i linsou o ringgit), ino-no i vuoros ong i dang Kinoringan, ino-no i karajaan, om i vuoros ponong sid riniba, ino-no i gama tumimpa sampai tumoguvang sid karajaan dino.

Vokon-no ong i suriban di Yesus di manarang di karajaan do Kinoringan ino-no poginakanan ko pesta. Na i koubasan, ong noligou-no it ulun, engat-no dit ulun dot ginuna-no iosido dit ulun di minongoligou. Sabap ino, otomon iosido. Dot ong otopot, amu rumikot it ongolinigou diri(i sid suriban di Yesus). Mad amu nakaharati ioti di karajaan do Kinoringan. Suhulon dioti i kobuatano om gamaon om kohuntungan di dang riniba. Mad amu monodiri ioti dot ombo it otopot om ombo bai ngaran-no o guna. Suvaiko mongitung it ulun om humarati dot ombo it otopot om ombo i mad baiko inipi di tumanus ong tumoguvang iosido dit otopot. Insanpo dino, ino hal do karajaan okonko hal sid tohudi't adau, hiza do minatai-no it ulun, ko hal do surga, inoi nga hal di koposizan tokou biano om didino. Sitid tanga do Sabah iningutan tokou di Yesus tumoguvang om jumadi do karajaan do Kinoringan. It ulun dit amu mangambat di kodim om tugas di Yesus, okonko i koposizan sid tohudi't adau ot a-emet dau, inoi nga i koposizan dau di didino ot a-kosunu isuhut di hoturan do Kinoringan. Iti-no o boros di Yesus, Isai-nopo i mogihim di kopudan di koposizan dau, tumanus-no i koposizan dau. Topot isai-nopo ot otonusan do koposizan, tu ioku gima, ino-no o kemot di koposizan, ka (Matius 10,39).

Manjadi ino-no i panangan di gama tumoguvang sid karajaan do Kinoringan: It ulun mengkod mongitung di kondiri dau ko monongkudau, inoi nga apasi iosido ponong sid Kinoringan om ponong sid ulun vokon (Gal. 2,2o om 6,2). I Habal do Kovosihan o minonguasa dit ulun dino, iri-ogi iosido-no o polombus di habal dino, supaya it ulun vokon nga okuasa di habal di karajaan dino.

Ong sandad riniba mongitung, i tugas om pananangan dit ipat-ipat it ulun, ino-no monumad om mamasi di kondiri dau, mogihim do kavantango om kosinango kondiri. Sid gama mogihim di kavantango do koposizan kondiri, magavi tokou sampai mangalai tokou di sokoviai i hal vokon. Sukul ioku, ko i tokou, ka di tokou. Na boros di Yesus, ino gama di iadino baiko kapatazango o rikoton. Aso kosurutan sid gama di iadino. Sabap ino, ong sumuhut di Yesus, okonko i gama palanut ko mangapad om mongopud di kondiri o gama-ku, sid gama mansahari ko sid gama posurut dot ugama. Suvai obebas it ulun antad sid kenginan dau di mogihim di kondiri dau (di mad nuripon di kenginan om karalazan om kengkakatan kondiri) om kogoos-ogi iosido om katama do porikot sid ulun vokon di kobebasan di nokembulai sid Habal do Kovosihan.

(Rom 14,7-9) Sabap iso't ulun sid di tokou nga aso apasi bahagi di kondiri dau om iso nga aso matai bahagi di kondiri dau. Ong apasi tokou, dang Tuhan i koposizan tokou. Ong matai tokou, dang Tuhan i kapatazan tokou. Manjadi it apasi tokou-po antawa apatai tokou-no, nga i Tuhan o sanganu di tokou.

Minsanko i kinoruhangan di Yesus amu nakaharati koduruk dino vazaan di Yesus dino. Suvai ontok do Pentakosta om nakaharati-ogi ioti sampai nokemot-ogi ioti dot i Kinoringan kakali manguasa dioti, gima i Sundu dau di nokorikot sid ipat-ipat ioti dino. Sabap ino, siombo-nopo varot ulun di mongining om tumorima di kodim di Yesus sampai tumoguvang sid karajaan om mangasip, kaharati-no iosido dot i kuasa om Sundu do Kinoringan o minonulung om sumungkod om mongopud dit ulun.

I vaza tokou mitatabang mongusaha om monuluk di tugas di Yesus.

Minsanko nokotoguvang tokou di hoturan om karajaan do Kinoringan, kakali ulun tokou dit amu arangkap o gama. Songkuro-nopo o misingilo om mokituduk tokou, kakal tokou varo hiza dot okugui tokou om kakali ulun tokou di nakagavul om merad dit razat vokon. Okonko malaikat tokou antava ulun di nokezon sid surga. Ino-no rontob, engkod tokou do magavi mogihim di tokou do kosuruto om garal om hormat om pangkat sampai kohuntungan,

isuhut di gama dit ulun vokon do bai engat di dau om dau do kosodirizan ponong sid kosukupu do balanja ko sid politik. I Paulus momoros sid Rom 12,1-2 dot, Mindamo-oku dikou do patahako-no i guvas dikou do persembaan di mizau om osusi om ikozi do Kinoringan. Ino-no ot apatut om atarang o padsamba dikou. **Ino-no o di tokou do tugas om panangan.**

I tudukan do Pastoral Care

ko i tugas di manaud do puruvan om i tumpuk om ipat-ipat it ulun Kristian manaud om monunda dit ipat-ipat it ulun Kristian sid piumpugan, supaya mopud it ipat-ipat it ulun Kristian ponong sid kenginan do Kinoringan. Ino dino origi koturu sid hoturan do piumpugan ko perlembagaan do PCS, isuhut di boros sid 1. Petrus 2,9-10: *Ikou dino i varis di nopili-no om i piniizaan di pakarajaan om i rurungan dot osusi, i bansa do pasok do Kinoringan, supaya mangahabal-kou-no dit agazo o gamaon do Kinoringan, i minongodim dikou asid otuvong, posuvang dikou sid kanavahan dit aso kerad. Ikou dino dit okonko bansa dau diri, nga nakajadi-no do bansa do Kinoringan. Ikou dit i hiza diri a-po opitiim di kobinsianan dau, nga nosiaanar-kou-no do kobinsianan do Kinoringan.*

Umpatod: Nunu-ka i harati Pastoral Care? ino-no, manaud om monunda dit ulun Kristian. Ino gama dino tanid mantadko khotbah, renungan, kebaktian, pemahaman do Kitab, sabap okonko i kogumuo dot ulun o panangan, inoi nga i gama kumiboros do toduvo-duvo ot ulun hiza kikosusaan kumitoguvang dit ulun di hiza kikosusaan), okonko bai sakit ong guvas, inoi nga mad oruol o ginavo dot ulun.

I pongoretan PASTOR ino-no = manaud, isuhut di suriban sid Kitab Laid sid Zabur 23 ko 95,6 dot i mangagazad di piumpugan ko razat ko kampong dino, ulion di mad manaud do bahanan do dupot. I razat, iadko bahanan di tinaud om tinunda dau. Ino suntuan dino, napakai-no laid sid di Ibrahim, tu okonko bai dupot, inoi nga ogumu-po it ongoulun sid tinaud dau. Iri-ogi sid raja Daud. Iosido nga manaud do domba it omulok-po iosido om iri-ogi jinumadi iosido do raja. Manjadi i minongindazou iosido do Kinoringan sampai minindolongoi iosido, pinoluu dau di gama om tunda do Kinoringan di tugas dau di minanaud iosido do domba. Manjadi i panangan banal, monunda om mongimuhun sampai manaud di ginavo dot ulun dit osusa ko ogolivong om otigagang ko opipitan, ko mogihim di natagak. (care = monulung, manaud, monunda, mangapad, monorundakai).

Ong monunda, ino-no i gama papanau om mangagazad dot alud. Varo a-ko piro ot ulun gumau, supaya kapanau it alud, nga amu enizo posurut dit alud. Suvai iso mogkomudi, tu monunda, supaya varo rikoton om otunda i panau, vokon-no ong turus, vokon-no ong isuhut dit ongogumbang. Iadino i origi koturu di Hoturan do PCS:

Iti gorija diti mamakai di hoturan do monunda, supaya ahatul om agazad om oontupat it ongopimpugan. Manjadi it obpinai di rumanggal di hoturan dino, imuhunan-no vagu, supaya kouli sid ralan dot abanal om amu korungoi i ngaran di Kristus, gima notunda i gama dit ulun di karanggal. Ong amu sumuhut vagu it ulun dino di hoturan do gorija, kondiri dit ulun mongimbulai do nakalabus iosido sid piumpugan om gorija.

Pengkaa dino it ongogama dino:

- kumoruhang dot ulun sid ongokosusaan om kohigangan di koposizan dau dot i Habal do Kovosihan ot ogomon sid gama mogkovosihan om kumoruhang.
- Suvai ensanan i kavazao om gagamaon dot ulun i nokosuvang sid gama mangahatul, ong varo kinensoduhan antad sid kosipan sid Kinoringan, ko varo korualan om kopiduvaan do ginavo, varo karanggalan, sala, kopunavatan, kotongkihalana.
- Pemumui vagu dot ulun sid saralom di kosipan dau. Boros di Paulus sid 2. Kor. 1,3-7 *Monginsasamod-kou-no, supaya engkansangan tumahan om osolepulan-kou*, ka. ko 1. Tes. 5,11-16 *Piinsasamod-samod-kou om pipapanggol-panggol-kou-no dot ongoginavo. Ponginsasamod-no, tulungai-no dikou it okugui, polonuto-no dikou i ginavo dot ulun*, ka. Ino o harati, Sokoviai tokou kitugas do iadino, okonko bai i pandita ko i gembala om tumpuk. Topot ioti-no dino o suntuan om mogulu ko momuradsung posurut di gama di iadino.

I. I Yesus o suntuan dit atag o gama manaud om monunda

I Yesus minongimbulai di samod do Kinoringan sid tanga do riniba (Yahya 3,16). Ino-no i gama dau: Mat. 9,36-38 om 10,1-8 Basaon-ku ino:

- Tinumongkop iosido sid ongopomogunan om kavavalazan.
- Minonuduk iosido dit ongoulun
- minangahabal iosido di Habal do Kovosihan
- pengkod do panakit om nunu-nopo songoruol

Posunuon di Yesus i karajaan om hoturan do Kinoringan, i mad vangun vagu, hiza vagu, kinourugan vagu, ino-no:i bolou kosiroto, i kimai kapanau, i kibalang olingasan, i bongung nga kening-no, i minatai, nga ogulian-no vagu om i mosikim, nga orikatan-no di Habal do Kovosihan sampai obebas-no iosido antad sid tilikop (Mat. 11,5).

1. I karajaan do Kinoringan, ino-no i koposizan dit aso kurang (Yahya 10,10 supaya varo koposizan dioti om kosukupu sampai kilaba-po). I Yesus minonimpun do iadino (Mark. 1,15 nokorikot-no i karajaan do Kinoringan, ka di Yesus). It ulun di nopogos om nasaadan, om it natagak ko noboludan om okugui, i kikosusaan do ginavo, ino-no kavi otunda om osolepulan, ka di Yesus (Mat. 11,28-30)

2. Na i gama monunda om manaud mimbulai antad sid kenginan do

Kinoringan ponong sid kosopulan om kapangatagan di kavazao dot ulun. I kobinsianan do Kinoringan mongimbulai do kosianan. Osianan i Yesus diri.

3. Memot i Yesus di kavazao dot ulun, i nopogos, nasaadan, natagak. Suvai kotutun di kavazao dot ulun, dot ohigak ko olungui iosido, ohongkob, oruol o ginavo, osusa o buatan, ombo sid saralom do ginavo, ino-no mimbulai sid vuross om kavazao dot ulun. I vuross iadko soromin di ginavo dot ulun, iadko it anak vagu di lumundu Mark. 10,21 siratai-no di Yesus, tu manamod. I hiza dot olungui it anak vagu dino dit amu atamaan dot eduan om pada di kolundu dau.

4. Osodia i Yesus kumiboros dot ulun (it ondu sid talaga di Yakub Yahya 4), mongoduat, monginsosok dot odoromoi o gama iadko ulun dit obingharap, ulun di onining. Ino dino okonko sid tinoguvangon dot ulun. Ong khotbah, ahampan monuturan om mongonong di Habal do Kovosihan sid ongoginavo do sokoviai it ulun. Topot ong manaud om monunda, baiko toriso-iso ot ulun o panangan om toguvangon. Banal-no antad sid vaza mengkhotbah varo kopurimanan dot ulun dot onining di mengkhotbah om elo mogkovosihan, tu kadapat momurimon dit ongokosusaan om korualan dot ulun. It ondu diri, ong sino i kinoruhangan, aso tingan mumbongut, minsanko mininsomok sid di Yesus, nga amu-no.

5. Iti-ogi mamung i Yesus momurimon di kosusaan dot ulun, kumoruhang sid kosusaan. Rumikot sid valai di Zakai i Yesus, milang makan iosido sid ulun do kisala om i karani do sukoi om sundal. Ong sid kovian, kondiri di Yesus mokisian dit ama dau sid kabun do Getsemane.

6. Ohondom di Yesus i kovian ko adau do kopongohukuman (hiza do mongomot 9,37). Ong mongomot, ino-no i hiza do mimbulai-no do kihasil ko aso. Kentalangan 14,15 i kovian di pomogunan mad kamatan do pomogunan, ka. Matius 13,39 i suriban do gandum om i kutad: it ongomalaikat mongomot ontok do penlaid do monodiri di bai kutad om i parai ko gandum banal.

Ong kahabal i Habal do Kovosihan, varo kosodirizan di kasandatan di kopongohukuman penlaid. Yahya 3,18 isai-nopo it ulun dit amu mangasip, ohukuman-no, ka di Yesus.

Iti-no o sabap dot i gama monunda sid saralom di gama rumonok do Kinoringan (Amsal 1,3) iadko it ongoulun sid UR 9,31: oronok-no i piumpugan di pinonuhuan di Tuhan sampai tinunda-no ioti di Sundu dot Osusi, ka. I Paulus mindamo, *gima i kobinsianan do Kinoringan*, do pemumui dioti o tomodon, ino-no: *patahako-no i guvas dikou do parsambaan di mizau om osusi om ikozi do Kinoringan. Kadan sumusui di kobuatano di vinangun diti, gam mongimvagu-kou di ginavo dikou,*, ka (Rom 12,1-7)

7. Iamung di Yesus i pomintaan dua (Mat. 9,38) *Indamo-kou-no sid sanganu dit omoton, supaya monuhu-no iosido dot ongoulun di mongomot, ka. Pengkaa dino i tokou popuhondom sid Kinoringan dit ongokosusaan dot ulun, dot ino gama dino, inanu sid tugas antad sid palad di Yesus. Sabap i Yesus minonuhu-no om minongimuhun di kinoruhangan do iadino. Varo pamarasan di kiguna sid gama diti dot,*

Gulu-ko kumiboros dot ulun sid tinoguvangon do Kinoringan, kopiboros-po laid do Kinoringan, kananganko it ulun dino. Suntuan: amu osusa do mongoduat i Tpk Aloï do kuozon ong varo 't ulun kerja penoh sid PCS dit avuk-no ontok do minggu, nga amu sumombol sumambayang, minsanko dau do palan ino, ko i vokon mimbola di hiza do sumambayang i piumpugan. Amu osusa mongoduat laid di rombongan dit ongokerja penoh, tu noboros laid di Yesus sid Matius 18 dot kodung iadino, atag do tumoronong sid ulun dino dot iseso iosido do kopitoguvang kopiboros do doduvo ioti sampai monunda dit ulun dino. Suvai induvo intolu nga amu mongining, iri-ogi povoza-no do sasi. Ong iri-no ko iri, ovito-no sid piumpugan, tu manarang-no dot nokedu-no it ulun dino sid piumpugan om gorija. (iadino sid origi ka-8 natandon sid perlembagaan kagi).

8. I gama monunda dino, hak do piumpugan om ipat-ipat it ulun Kristian, okonko bai tugas di Manaud puruvan om tumpuk. I Yesus minongodim di kinoruhangan dau om pinotugas dioti (Mat. 10,1-8) sampai minanahak dioti di kuasa do monunsub do rogon om pengkod do sakit om oruol miabal di gama laid di Yesus (9,37) Sid gama di iadino, otunda ioti di Yesus. Kagi i Yesus minonuhu dioti sid tanga dit ongokosusaan do riniba. Ioti hopod om duvo i kinoruhangan diri o jinumadi do bansa om vangun vagu (Efes. 2,20) *Ikou dino iadko babaal di napakai-no sid puvavalazon. Nakavantai-kou sid ongorasul om it ongonabi. Ioti dino nokototol sid origi do kongkod, ino-no i Yesus Kristus dot i tugas dioti: Mogihim-kou dit ongodomba di natagak, ka (10,6) Na i gama om kakansangan dioti antad sid kuasa om kotulungan di Yesus (Yahya 15,5) Aso kopudan dikou vokon tanidko ioku, ka di Yesus).*

Atag dot osodiri tokou i tugas tokou do kuran i tokou: Bai mansahari dot akanon di kerja penoh tokou ko tumpuk sid PCS, ko elaan dot nokodim tokou do Kinoringan miabal di Yeremia ko Amos, i minomoros, Kuran-no, Ong monuhu i Tuhan Kinoringan, isai-ka ot amu sumuhut sampai ajadi do nabi? Ko i Yunus i minogidu dara, nga aso tinganan mogidu. Ong sid Inggeris, varo duvo o pongoretan di monodiri di duvo o vaza dino: varo **profession ko occupation**, ino-no ponsohorian dot ulun, tu ino-no o koringgitan. om iri-po **Vocation**, ino-no nokodim do Kinoringan sid tugas dino dit a-milo-milo nga

suhuton.

II. Misingilo do monunda dit ulun Kristian.

Ogumu it ongotugas dit ulun Kristian om ensanan i gorija di Kristus. Ong i gama monunda retanko iso karisma ko tahak do Kinoringan sid saralom dit ako piro o karisma ko tugas dit antad sid Kinoringan. Ong sid 1. Kor 12,4.. kihukum, elo paharati, kikosipan, kopongimbulai di kokuasaan, kopomoros di nituduk do sundu, koponodiri di pitonidan di kosunduvo, kumiboros do sundu, kapanalahas di boros do Sundu, om Rom 12,7 nabi, elo monulung, elo monuduk, elo mogkovosihan, elo mangahatul, elo monian, ka. Pengkaa-no dino ong i tugas do monunda:

1. Mongintutun di ginavo dot ulun (ginavo =nafsu BM ko nefesh Ibrani, ikapapasi dot ulun (Kinotim. 2,7 i pinuhobo do kapasi i kopiamung di tana dot osilou) Ong osusa it ulun, iadko Zabur 42,3 Lumangad i ginavo-ku sid dikau o Kinoringan, ka. Lumungui-no i ginavo, tu mungkolu mongohondom dikau o Kinoringan. Ong ginavo oboros, mad ensanan it ulun ot tomodon. Ong oruol o ginavo, osusa it ensanan it ulun (Zabur 103,1-3)

2. Pakansang di ginavo, patatap di ginavo dot olungui, ohongkob, kioruol, supaya kogoos vagu iadko i boros di Paulus sid Rom 8,38-39 Okonko i kapatazan ko i kopolisiran, i malaikat ko nunu-nopo i monguasa, i biano ko i rumikot-ogi om vokon, iso-nga aso kopotongkizad di tokou antad sid samod do Kinoringan, i nokembulai sid di Kristus Yesus, ka. I kakansangan tokou okonko komondirian, inoi nga suvai sumokot sid Tuhan Yesus. Iosido i sondihon dit ulun monunda, supaya kogoos monunda. (Ong sid alud, suvai atarang ot ogomon).

Amu atag dot atalou it ulun, retanko aso hak, aso kuasa, amu katama, ekum. Ong i Paulus: *Ong kikovosihan-oku-no sid dikau, osukup-no, tu sid kokuguzo-nu o kembulazan di kokuasaan-ku*, ka di Tuhan sid di Paulus (2. Kor. 12,9).

Amu atag dot osumbung it ulun, retanko elo-no kavi, kogoos iosido om ahatul o gama iadko i koburuvako di Petrus diri, supaya it ulun dit otunda humarati dot ensasamadan iosido di Kristus, isuhut di boros di Yesus sid Mat. 11,28-30.

3. Antad sid harapan sid di Kristus o gama monunda. (Ibrani 6,19 *I harapan tokou iadko labu di ginavo tokou dit opihot om atahan*). I gama monunda om manaud ong otopot okonko bai hal sid pialatan di duvo ot ulun, inoi nga kamung-po i Kinoringan, gima sid tinoguvangon do Kinoringan o mitoguvang i duvo it ulun. Manjadi it ulun dit otunda kopurimon do kuran it ulun di monunda om manaud dot otopot ulun iosido di kikosipan antawa i gama dau dino bai ponsohorian om kabalanjaan, iadko i boros di Yesus sid Yahya 10 do

varo t manaud di bai gumaji di suhulon dot apasi i kondiri mantadko manapul dit toudon dau.

4. I gama monunda om manaud ponong sid koulian om kosipan dot ulun, supaya kemumui vagu it ulun sid piumpugan om piniizaan dot ulun Kristian om ajadi iosido dot ulun di kiharapan om kopioondusan. I harati, okonko monunsub o tomodon.

III. Siombo i tempat di gama manaud om monunda?

It ongkob. Vokon-no ong it ongkob dot ulun o tempat do kosusaan om korualan do ginavo, tu a-kopening om a-miboros it ongominisavo ko i molohing om anganak. Sabap varo hal sid pialatan dioti di mad kohigangan dit a-otoliban. Ong anganak, iso nga aso ot elo monginsasamod dioti anganak ong okonko it idi dioti. Varo boros sid Yesaya 66,13 dot i gama do Kinoringan monginsasamod nokerad di gama dot idi monginsasamod dit anak dau, ko sid Efes. 3,15 i Kinoringan ot inantadon di sokovia i kapanangamaan sid savat om sitid riniba, ka. I harati, sid ongkob o rumbul satu do tempat di gama manaud om monunda sampai mongimuhun om monginsasamod dot ulun, ong sukul osihat it ongkob dot aso kosusaan. Ino iadino dino, ong sukul i gama minisavo nga antad sid kopiginavaan om sid tinoguvangon do Kinoringan ot jinadi. Ong ongohal vokon o puun om tinomod di kopisavaan diri, asarok do varo kosusaan do ginavo dit amu adapat hoturon ong sid pialatan dot ongkob.

I hiza dot i Yesus minonuduk di kinoruhangan dau minta dua (Mat. 6,7-15), varo boros dau dot ino gama ponong sid Kinoringan okonko sid tinoguvangon dot ulun ko sid pisisimpangan dot alun-alun, inoi nga sid ongkob di nolontop i rongobon, supaya olingob o gama minta dua. Na i gama kumiboros dot ulun dit osusa o ginavo, iadino ot atag o gama, okonko sid tinoguvangon dot ulun, inoi sid tempat ko ongkob dot aso't ulun vokon. Na ino iadino dino banalko amu oubas ong sid Momogun. I kodori diri, ong i kakal-po sid binatang it ongoulun, okudik nga aso kolingob dot a-orongou kavi dit ongoulun. Okudik nga aso kosusut dot okonko kalanta sid ensanan it ongoulun di kentoron sid valai dino. Kagi, minsanko it ongovalai biano, onipis i rinding om obuka-no sampai i boros sid sampaping do rinding, kakali atalang sid ongkob vokon. Banal-ko amu oubas ong Momogun do miduduvo it ulun miboros om miuupakat. I sokovia it ongokopisomungan, nga kasasi dot ulun vokon, savo ko anak ko i sid simbol om i iadino. Antawa, ong nakatanid dara i duvo it ulun, iri-ogi insasakan do nunu o piniupakatan om pinibarasan o garatan dot ulun vokon. Na i Kitab monuduk di tokou dit ahatul o gama manaud om monunda. Imatai i tuturan di raja Daud om i nabi Natan (2. Samuel 12). Suvai bai

doduvo ioti nabi om raja om minamakai i nabi di suriban dit ulun di mangaras di domba di dang koruhang om kadapat i nabi monudu di ginavo di raja om pembulai di karaatan di raja. Ombo i nokembulai sid pialatan di duvo it ulun dino, mad nolobong-no sid ulun di mogkovosihan om monunda, okonko oviton-po sid razat ko ulun vokon. Minsanko ong ulun mangakun do minamatai iosido dot ulun, i monunda amu mongoruput, inoi nga mongimuhun, supaya it ulun kondiri mangakun di sala dau sid porinta.

IV. I vaza manaud om monunda

Boros di Paulus sid 2. Kor. 5,18-21 dot i tokou pinangkat do popiaandus. Antad sid tugas dino tumoronong tokou sid ongoulun di varo kosusaan, hal do kosipan, hal do kopioduhan, kouhangan do Kinoringan om ongoulun, kopiduvaan do ginavo, korukungo, panakit, kahangkaban, do patod sid ulun dino di boros do Kinoringan ponong sid kosinangan om koruhunan. Ino gamaon dino amu oruhai om okonko iso-no o vazaan kadapat.

a) Gulu-po osusa mongimbulai di harapan dit ulun dit osusa, supaya kobongut iosido om monuturan om mongimbulai di kosusaan dau di nunu-nopo. I hiza dino, atag dot ening banal dit ulun dit engin monunda. Amu atag dot otungkag-tungkag, inoi nga mongining banal dot oboloti mangambat. Kopihiza it ulun mongining di kahangkaban ko kopiduvaan om kosusaan dot ulun om i kuran it ambat di Habal do Kovosihan sid kobuatano di iadino. Amu oruhai kagi do pavalang it ulun di kosusaan di nolobong sid ginavo dau.

b) Na i tomodon, ino-no i kosihatan om katagan dit ulun dino iadko i boros di Yeremia diri (17,14) dot, *O Tuhan, ubatai-oku-no, supaya osihat-oku om tulungai-oku-no, supaya akansang-oku vagu*, ka. I gama monunda poromut sid ulun, supaya kaharati iosido dot minsanko osusa iosido, nga kakal iosido sid palad do Kinoringan om otunda iosido do Kinoringan sampai kenginan do Kinoringan dot umbosihan, ombo it amu atag sid kobuatan om koposizan dau dino: sala kondiri ko nagama dot ulun, pioduhan ko karanggalan om vokon-po. I monunda tumabang, supaya it ulun humarati di dau do kobuatano om ombo it amu atag, supaya antad sid puun do kosusaan, varo kolingasan om katagan. Suvai opurimanan i kasalaan om kadapat-ogi mangakun di sala dino om mogihim do katagan om kaadaan do sala. (i raja Daud om i Natan, i raja Ahab om Eliya, 1. Yahya 1,9).

V. I vaza mangada do kasalaan

Atag do sodirizon tokou it ongopongoretan do SALA; KAADAAN DO SALA; KOOKUNAN DO SALA

1. **Sala:** nunu o harati dino? Ong sid Kitab, i sala ino-no i korungazan di kinopizaan dit ulun sid Kinoringan. Kenginan di Kinoringan sid kinourugan dot i riniba mad koruhang do Kinoringan, mongontok do Kinoringan sid tanga do vinangun. Topot i riniba minoguhang sampai minongivogu om mokiirad do Kinoringan. Iti-no o sabap, ong amu mongoguna it ulun di pinonuhuan keso, ino-no *Ioku-no diti o Tuhan Kinoringan-nu, kadan-ko-no sumamba sid baiko pinokokinoringan..* I pinonuhuan dino lavis ko kongkod di sokovia it ongopinonuhuan vokon. Ong aranggal ino, naranggal-no kavi it pinonuhuan vokon. Ong suribanon ino, miabal di hal do mamanan sid sodu. Ong manakau ko kumiagai om humarap sid kolunduo ko pemozoon do Kinoringan, okonko bai rumatu sid parit sid tanga ralan, dot oruhai kemumui vagu, inoi nga kotolikud-no sid rikoton, gima nensanan-no i panahon dot a-no nokonong. Kasalaan-nopo, asarok it ohorotizan dot ulun dot i sala, baiko toriso-iso o hal dot opodok di mad nokolisang ngaran sid ralan ponong sid rikoton, dot ong otopot, it iso o sala mad tanda dot ensanan nokotolikud-no sid rikoton om panangan dot ulun.

Ong biano, okurang-no ot ulun dit atarang-ko pakaso do varo Kinoringan. Ino-no i kogumuai, it ulun atapatan do varo Kinoringan, nga kakali bozoturur iosido sampai amu mongitung dot varo tanggung jawab dau ponong sid Kinoringan. Mad it ulun kondiri dino o kihak tanggung jawab sampai mongitung dot iosido-no o sanganu di kondiri dau. Aso kiroom dau dot i Kinoringan o manansanganu dit ulun. It ulun mongitung dot iosido o hakim di kondiri dau. Kagi, sid saralom do razat ogumu it ongohal dit amu atarang, hal do monipu, korapsi, makau-takau, aso kiroom dit ulun dino dot ino gama dino araat ong gumavul iosido sino, tu bai sumusui di gama dit ulun vokon. Ong kenginan do Kinoringan, okonko bai atarang i kobuatano dit ulun sid tinoguvangon do Kinoringan, inoi nga atarang-po it ulun sid ongokoruhang om sid tanga do razat. Iti-no i tinomod di nabi Amos om Yesaya pohodtol di kenginan do Kinoringan ponong sid kopioondusan om kabanaran di riniba (i schalom it aso monipu ko otipu). I suriban di Yesus, kananganko i talenta (Mat. 25,14-30) manalahas dot ipat ot ulun varo panahak dit atag gunaon ponong sid razat om ponong sid ulun dit kikokurangan. Okonko bai amu monimbaru dot araat om miuma-ogi, inoi nga suvai posurut-po do katagan om kavantango om kotulungan isuhut di kosukupu dau, om miuma-ogi. Ino-no i

sala banal sid tinoguvangon do Kinoringan, it okurang o gama-ku mongitung dit ulun vokon om manaud om monunda om monulung dit ulun vokon, tu sid gama do iadino okodim tokou.

Atag do hondomon tokou-no do kuran i gama tokou mamakai di pongoretan do sala sid khotbah do bai mongohondom dit ongosala dit opodok dot alazan ong i puun do sala di nokotolikud it ulun sid tinoguvangon do Kinoringan.

2. Kaadaan do Sala: ino dino okonko iadko sabun di mongohugus dit asakau om dungit. Tanid i gama di Yesus mangada do sala, ino-no, pengkakat dit ulun sid ralan ponong sid rikoton, mad potorontog dit ulun, supaya kiontok i panau dau pouli sid Kinoringan. Sid ondu sid Yahya 8 varo boros di Yesus: Amu-oku-no mongohukum dikau. Pamanau-no. Kada-no pangagama vagu do sala, ka. om sid Zakai sid Lukas 19 Bianco nokosondot-no i kosopulan sid valai diti, ka. I kaadaan do sala, ino-no o vaza tumimpun vagu sid ralan ponong sid karajaan do Kinoringan. Kagi i kaadaan do sala o pohigak dit ongomalaikat sid surga, ka di Yesus. Ko sid Lukas 15 varo karamazan sid valai dit ama, hiza di nokouli it anak dau di mad natagak. Iti-no o sabap, Piguli-kou-no sid Kinoringan, ka di Yahya minomodsus Mark. 1.

3. I kopongokunan do sala. Amu oubas i razat do Momogun do mangakun, ong varo hal dit ajadi dit a-nokonong. Ogumu o vaza tokou mangadahava ko peva do sala sid vokon. Sid hal dino mimbulai dot okurang o kopurimanan dot a-nokonong i kavazao tokou ko i gama tokou sid tinoguvangon do Kinoringan. Sabap ino amu osimbunan i ginavo om amu osimbunan i panahon tokou, iri-no ko iri. Suvai pogili banal om pavalang di kosusaan do ginavo om kaharati tokou-ogi dot ombo it amu atag om it amu nonong, iri-ogi om kemot-ogi di kaadaan om i kotimpunaan vagu. Banal-no, ong sid RC, varo hoturan dot kodung sumambayang, mangakun laid di kasalaan, ka. Topot ino hoturan di iadino minongimbulai dit adat do kopongokunan dot it ongoulun mangarait dit ongohal dot opodok iadko hal do momudut om varo pongitungan dot asakau, mad bai hal do komoluan retan-no do kisala, ka, sampai ino hoturan dino o sabap dot sid gereja Protestant amu mamakai di kopongokunan do sala iadko kaadato sid gorija ponong sid pandita ko isai-nopo. Rontob-nopo, ino iadino, mad kolonduan vagu sid sampaping, tu ensanan it ongokolonduan om karanggalan, isusut om piovit matai a-insan katanus. Iti-no o sabap dot ogumu it ongohal ahandaman pempatai om osusa i ginavo dot ulun sampai penlaid. Ong kadapat tokou do vaza vagu poromut sid ongopiumpungan di kogunaan di kopongokunan do sala, kaluto ong varo katagan sino dino.

Ong bianco, tu nosimbanan i hoturan sumambayang sid PCS do sumusui di hoturan do Anglikan, amu elaan-ku dot iti-no i vaza mangatag. Sabap sid hal dino, suvai nokosimban i kopongohorotizan dot nunu o sala om kasalaan om karanggalan, iadko noboros-ku do dino-no, iri-ogi kadapat do mangahatul di vaza sumambayang do tanid mantadko diri.

Sid hal diti, varo-po boros-ku sid dikou, Ino-no,

keso, ong sid England, i gorija di dang raja, tu iosido ot ulion, gima i raja minonuhu di Reformasi sid pomogunan dau, sabap magapid iosido (dot i Pope amu minangakun do mangada i raja di savo laid), banalnoko minongogorot i raja om i gorija dau do pasala om pangakun dit ongoulun do razat (okonko i sala di raja), supaya oruhai o gama di raja om it ongoulun do lumundu momorinta do pomogunan. Ong ulun do mosikim di minanakau do bai songbungkus o lopit, ohukuman iosido dot ovit sid Australia do pempatai a-no kouli sid pomogunan dau. Topot ong i raja ko it ongodato sid England, ensanan i pomogunan tinakau dioti om mongorugi di razat, okudik nga aso sala, tu iadino i hoturan do raja. Iosido mangaratu ombo it abanal om otopot ko it araat, okonko i Kitab apakai sid gama monodiri dit araat om avantang. Iadno dino o gama do gorija Anglikan mongoringing dit ongoulion do pomogunan om pasala di razat.

Koduvo, pengkaa dino, ong varo hoturan tokou bianco sid PCS iadko i nokosurat sid Longoi vagu do varo kopongokunan do sala. Ino dino suvai atag om varo-po panarangan di sumungkad, isuhut di liturgi hiza di poginakanan di Tuhan Yesus, ino-no, boros di Tuhan, Siti-kou-no ot ongoulun di nasaadan-no. Takahan-ku ikou i kosinangan om koingkadan do kosusaan dikou, ko, Sid ngaran di Yesus pentahan-oku dikou do nakada-no i sokovia i kasalaan om karanggalan dikou, ka. Ong alazan ino, mad amu-po nompus i kogunaan di pomintaan do kopongokunan do sala. Rontob, ong ioku, kakali amu mongitung dot iadino kopionong sid PCS. Mad amu-po nansak-no inot upakat monimban di liturgi.

Kotolu, Ong iadino o vaza tokou sumambayang, amu atag dot it ulun di mangagazad ong nopongo ino, iri-ogi mansadang-po do longoi di kakali momoros dot, Mokiada tokou di kasalaan tokou. Tu ong iadino, mongododol tokou do Kinoringan. Ong ulun dot lovong, banal-no, suvai sumuhut ong induvo ko intolu ko ingapat o kobongut om kosuhu. Okonko i Kinoringan i iadino o kolovongo. Iti-no o sabap mad kakali amu-po ahatul i gama sumambayang mamakai di kopongokunan do sala om kapangadaan do sala. Kakali mad oholian oluvau o boros tokou mangarait di pongoretan sala om

dusa om i iadino. Osusa tokou bukakangan i dila tokou, kananganko inot ongopongoretan dino.

Na sid kovian, Engin-okupo mamasa di tudukan di Yehezkiel sid fasal 34 kananganko it ongomanaud sid bansa dot Israel om i Manaud dit avantang o taud. Sid fasal dino arait it avantang om it araat o gama manaud di piumpugan om gorija.

Poghiiman:**nalad**

A. I Teologia do PCS	3
B. Pastoral Teologia do Kitab (ituduk-no sid PLA 1990)	13
I. Isai-oku diti om isai-ka i gorija om piumpugan?	26
II. Nunu-ka i gorija om piumpugan dot ulun Kristian?	30
1. I gorija, ino-no i bansa do Kinoringan	30
2. I gorija, ino-no i guvas di Kristus	32
3. I gorija, ino-no it inintonon di Sundu dot Osusi	34
4. I gorija, ino-no i institusi ko perusahaan	35
III. I tinomod om panangan do Gorija	37
1. I tinomod om panangan di kodim do Kinoringan	37
2. I tolu i kobuatano di tugas do gorija.	43
a) I kobuatano di mad nabi i gorija.	43
b) I kobuatano do gorija mad Imam	45
c) I kobuatano di gorija mad suntuan do karajaan do Kinoringan	48
IV. It onsi di kahabaran do gorija	51
1. I Habal do Kovosihan monuluk di harapan di Kitab Laid	52
a) I harapan dot Israel	50
b) I hiza do kopioondusan	52
c) I harapan dit ogomitan sid tanga do kosusaan	53
2. I Habal do Kovosihan di notuluk-no di Yesus	55
a) I Yesus minongimbulai di hiza vagu	53
b) I kinembulazan di kabanaran do Kinoringan	54
c) I kinembulazan di kopioondusan do Kinoringan	54
d) I Minongurug di riniba vagu	55
V. I VAZA MONGUSAHA DI HABAL DO KOVOSIHAN	61
1. It onogamut di kopongusahaan di Habal do Kovosihan	61
2. I gama sumasi	66

C. Misi om Evangelisasi	70
Nunu-ka i Habal do Kovosihan?	72
I panangan om rikoton tokou	73
I tugas di Yesus, di nakaraliu sid di tokou	75
I Yesus o posuntu di gama monginjil	75
Kuran kopitoguvang om sumuhut it ilun do hoturan	83
I kopogulian sid Kinoringan om i karajaan do Kinoringan	85
I vaza tokou mitatabang mongusaha om monuluk di tugas di Yesus	89
D. I tudukan do Pastoral Care	95
Umpatod	95
I. Yesus o suntuan dit atag o gama manaud om monunda	95
II. Misingilo do monunda dit ulun Kristian	99
III. Siombo i tempat di gama manaud om monunda?	100
IV. I vaza manaud om monunda	101
V. I vaza mangada do kasalaan	102
Pogihiman	106